

ANG UNANG SELYO



Iduko nato ang atong mga ulo karon alang sa pag-ampo. Langitnon namong Amahan, nagapasalamat kami Kanimo karong gabhiona tungod niining, usa na usab nga kahigayonan nga makaanhi aron sa pagsimba Kanimo. Mapasalamaton kami ingon nga buhi ug ang magkaaduna niining dakung kapadayagan sa Kinabuhing Walay Katapusan nga ania sa sulod kanamo. Ug nanganhi kami, niining gabhiona, Amahan, aron magtuon sa Imong Pulong, nga magkauban, kining daku og gililong nga mga tinago nga natago sukad pa sa pagkatukod sa kalibutan. Ug ang Kordero mao ang bugtong Usa nga makapadayag Niini kanamo. Nagaampo ako nga moanhi Siya sa among taliwala, karong gabhiona, ug dalhon ang Iyang Pulong ug ipadayag Kini kanamo, aron among mahibaloan kung unsaon nga mamahimong labi pang maayo nga mga alagad Niya, sa niining katapusang mga panahon. Oh Dios, maingon nga makita namo nga kami ania na sa katapusang panahon, tabangi kami nga maila namo ang among nahimutangan, Ginoo, ug ang among huyang nga pagkatawo, ug ang kasiguradohan sa Pagbalik sa Ginoo, nga haduol na. Ginapangamuyo namo kini sa Ngalan ni Jesus. Amen.

² Nagatoo ko nga si David kadto, ang miingon, “Nalipay ako sa pag-ingon nila kanako, mangadto kita sa balay sa Ginoo.” Kini sa kanunay usa ka dakung pribilihiyo ang pagtambong. Ug—ug tun-an ang Pulong, nga magkauban, mao’y nagahatag kanato niining dakung paglaum.

³ Karon daghan ang mga tawong nagatindog, ug pagadalion ko sa labing madali nga mahimo ko. Apan nagatoo ko nga nalipay kamo sa Presensya sa Balaang Espiritu, sama kanako, sa niining nangaging pipila ka higayon. [Nagaingon ang kongregasyon, “Amen.”—Ed.]

⁴ Ug, karong adlaw, adunay butang sa ako nga nahitabo nga dugay na nga wala nahitabo kanako sa taas nga panahon. Nagtuon ako bahin niini, bahin niining kapadayagan dinhi, bahin sa pag-abli sa Selyo.

⁵ Pila na ka mga tuig ang milabay nga nahisgotan ko Kini dinhi, mga baynte ka tuig na ang milabay, siguro, o mga ingon niana, apan sa kung unsa mang hinungdan wala ako nakuntento niadto. Morag aduna pa kini og ubang mga butang, ilabi na gayud niining mga Selyo, tungod kay kining mga Selyo mao ang tibuok nga Libro. Kita n’yo? Kini ang Libro. Ang maong tibuok nga Libro usa ra ka Librong, selyado. Nagasugod kini . . .

⁶ Pananglitan, kung aduna ako og usa ka butang dinhi, ipakita ko kaninyo kung unsa ang buut kong ipasabot. [Ginahulagway

ni Igsoong Branham ang paglukot ug pagselyo sa basahong-linukot, pinaagi sa paggamit og mga panid sa papel—Ed.] *Ania* ang usa ka selyo. Kana’y usa, ug lukoton mo kini nga sama *niini*, sa paagi nga paglukot niini. Ug lukoton mo kini sa ingon niini nga paagi. Ug, sa mismong tumoy, aduna og gamay’ng bahin nga nakasiwil, nga sama *niana*. Mao kana ang unang selyo. Sige, dayon, mao kana ang unang bahin sa libro. Dayon, ang sunod nga selyo linukot usab sa ingon *niini* nga paagi, sa mismong tupad niini. Ug linukot kini sa ingon niini nga paagi, sama *niini*. Ug dayon, sa tumoy, mismo *dinhi*, adunay lain na usab nga nakasiwil. Nangahulugan, duha ka selyo.

⁷ Ug ingon niana ang paagi nga nasulat ang tibuok Biblia, diha sa mga basahong-linukot. [Ginabukhad ni Igsoong Branham ang linukot nga mga panid sa papel nga iyang gigamit sa ilustrasyon—Ed.] Ug, busa, ang . . . sa pag-abli niining mga Selyo, ginaablihan niini usab ang mga tinago sa Libro.

⁸ Natun-an n’yo na ba ang Jeremias, kung giunsa niya nga nasulat kana, daghan ba kaninyo ang naglista niini kagabii? Kung giunsa pagsulat kadtong mga selyo ug gidala ngadto sa halayo, aron maitago, hangtud siya makabalik human sa setenta ka tuig, sa pagkabinihag. Mibalik siya ug giangkon ang iyang mga panag-ya.

⁹ Ug gusto ko mismong tun-an Kini. Dili ninyo mahimong . . . Wala gyu’y paagi nga maipahayag Kini, tungod kay Kini Eternal nga Pulong. Ug Kini Eternal nga Libro, busa kinahanglan lang nato nga matumbok ang importanteng bahin. Ug karon, sa pagtuon ko, gipangsulat nako ang daghang mga Kasulatan aron mahimong tun-an pud ninyo Kini. Ug lakip pud . . . Ug ang mga teyp magpadayag og daghan pa bahin Niini, samtang nagatuon kamo. Ug aduna pa’y daghan kaayong mga butang!

¹⁰ Kung mahimo ko lang nga motindog dinhi sa entablado ug ipadayag Kini kaninyo, sa paagi nga gipadayag Kini kanako didto sa lawak, grabe, mamahimo kining makahibulongan gayud. Apan, pag-ania ka na dinhi, gadalidali ka, ug basta mo na lang ginalaktawan ang ubang mga butang, ug ginapaninguhan mo na lang nga maipasabot sa mga tawo ang pinaka-importanteng bahin, aron nga makita nila Kini.

¹¹ Nagapasalamat gyud ako tungod nianang kanta nga bag-ohay pa lang gikanta ni Igsoong Ungren; *Down From His Glory*. Kung wala Siya mikanaug gikan sa Iyang Himaya, asa na kaha kita karong gabhiona? Busa mapasalamaton kita nga Siya mikanaug aron tabangan kita.

¹² Karon, tungod daghan ang mga nanindog, dalion nato nga makatapos dinhi, sa—kutob sa atong mahimo. Wala ko mag-ingon nga tapuson nato dayon, kondili ang buut kong ipasabot nga dalion nato nga makasugod dayon kon mahimo. Ug karon ablihan nato, karon, pagkahuman sa . . .

13 Nahuman na nato ang unang kapitulo, ika-2, ika-3 ug ika-4. Ug ang ika-5, kagabii. Ug karong gabhiona, magsugod kita sa ika-6 nga kapitulo sa Pinadayag.

14 Karon, sa pagtuon nato niining kapitulo, mopahinungod kita sa nagkalainlaing mga bahin, diha sa Daan ug Bagong Tugon, pareho, tungod kay ang tibuok nga Libro mao man ang kapadayagan ni Jesus Cristo. Kita n'yo? Kana maoy kinatibuk-an nga kapadayagan ni—ni Ginoong Jesus, ang kapadayagan ni Jesus Cristo. Ang Dios Kini, nga ginapadayag ang Iyang Kaugalingon diha sa Libro; ginapadayag ang Iyang Kaugalingon, pinaagi ni Cristo, diha sa Libro. Ug si Cristo mao ang kapadayagan sa Dios. Mianhi Siya aron ipadayag ang Dios, tungod kay Siya ug ang Dios mao ra. “Ang Dios diha kang Cristo, nagapasig-uli sa kalibutan ngadto sa Iyang Kaugalingon.” Sa ubang pinulongan, dili mo gayud maila kung unsa ang Dios hangtud nga gipadayag Niya ang Iyang Kaugalingon pinaagi ni Cristo; dayon makita mo na.

15 Kaniadto ko pa nahunahuna, daghan nang mga tuig ang milabay, nga tingali ang Dios nasuko kanako, pero gihigugma ako ni Cristo. Nadiskobrehan ko, nga kini ang mao rang Persona, kita n'yo. Ug si Cristo mao ang mismong kasingkasing sa Dios.

16 Ug karon samtang ginatun-an nato kini, ikompara nato kini karon. Ang unang tulo ka mga basahon sa Biblia, ang bahin sa Pinadayag, nga ato na kanang bug-os nahisgotan, ang mga kapanahonan sa iglesia, ang—ang pito ka mga kapanahonan sa iglesia. Karon adunay pito ka mga kapanahonan sa iglesia, Pito ka Selyo, Pito ka Trumpeta, ug mga Panaksan, ug—ug ang mahugaw nga mga espiritu sama sa mga baki, ug ang tanan niini nagakatakdo gayud.

17 Grabe, daw sa unsa ko ka gustong magkaaduna og—usa ka daku og halapad nga mapa, ug i-drawing kini tanan, sa paagi nga nakita ko kini, kabalo na mo, kung unsa ang pagkaplastar sa matag usa niini. Gidrowing ko na kini kaniadto sa usa ka panid sa papel, apan akong. . . Kabalo na mo niini. Ug ang tanang butang, sa karon, eksaktong nagakatakdo mismo. Ug ang oras ug ang mga kapanahonan, ang mga pag-abot nila ug paglabay, ug ang tanan hingpit gayud nga nagakatakdo mismo. Bueno, dili man tingali kini mahimong husto tanan, apan kini ang pinakamaayo nga akong nahibaloan bahin niini, bisan pa man. Ug nahibalo ko, kung—kung buhaton ko ang akong pinakamaayo, ug nasayup ako diha sa pagpaningkamot sa pagbuhat sa akong pinakamaayo, ug ang pinakamaayo nga nahibaloan ko, siguradong pasayloon ako sa Dios sa pagbuhat. . . sa sayup kung nakabuhat man ako og sayup.

18 Apan, karon, sa niining mga naunang tulo ka basahon maoy una ang, Pito ka mga Kapanahonan sa Iglesia. Ug dayon makita nato, diha sa ika-4 nga kapitulo sa Pinadayag, nga si

Juan gisakgaw. Kita n'yo? Mga iglesia ang makita nato. Wala kaayo og paghisgot mahitungod sa mga kapanahonan sa iglesia. Dinha kon diin sa tan-aw ko masorpresa gayud og ayo ang mga tawo. Ilang—ilang—ginaaplikar man nila ang Iglesia didto na sa panahon sa Kasakitan, sa mga butang nga mahitabo pa lang. Ug sama sa akong giingon, sa Dominggo, kagahapon: nga mahibal-an mo na lang, miabot na ang kasakitan, ug manghibulong kamo kon nganong wala pa man ang. . . Ang unang pag-anhi mao ang Pagsakgaw. Ug mahitabo kini nga daw sa mao lang sa gihapon: milabay na diay kini ug wala ninyo nahibaloan. Kita n'yo?

¹⁹ Karon, dili kaayo daghan ang gisaad para nianang Iglesia, para nianang Gentil nga Iglesia, ang Pangasaw-onon. Karon, gusto kong ibutang ninyo sa iyong hunahuna, nga adunay usa ka iglesia ug usa ka Pangasaw-onon. Kita n'yo?

²⁰ Kinahanglan nga kanunay ninyo kining tan-awon sa tutulo; sayup pag-inupat. Sa tutulo gyud! Basta mga tulo, mga pito, mga napulo, mga dose, ug mga baynte-kwatro, ug mga kwarenta, mga singkwenta, kanang walay bungkig nga mga numero. Ang Biblia maoy. . . ug ginapalihok sa Dios ang Iyang mga Mensahe diha—diha sa num. . . diha sa mga numero sa Biblia, kana nga mga numero. Ug kon makakuha kamo og unsa man nga dili usa sa nianang mga numero, magbatay gyud mo. Dili gyud kana mogawas nga husto, pagkasunod. Kinahanglan ibalik kana dinhi kung asa kamo nagsugod.

²¹ Igsoong Vayle, si Igsoong Lee Vayle, siya—siya. . . Siguro ania siya dinhi. Nahisgotan namo sa miaging adlaw ang mahitungod sa mga tawong misimang. Sama ra kini sa pagpusil sa usa ka target. Kung hingpit ang pagka-balanse nianang pusil, maayong pagkation ug tanos-ang-pagkapunting, maigo gayud niini ang maong target; gawas lang kung milihok ang tubo sa maong pusil, o miirog kaha, o miisog pagkakurog sa pusil, ug sa kung asa pa. . . o gihuyop sa hangin. Kon asa man kini misugod og simang, adunay usa lamang ka paagi aron mahusto kini, kana ang pagbalik sa kung asa kini misimang, ug magsugod pag-usab, kung ig-on gyud ang maong target. Kay kon dili man, aba, dili gyud niini maigo ang target.

²² Ug ingon niana ang paagi sa pagtuon sa Kasulatan, sa akong gitoohan. Kung makita nato nga adunay butang nga atong gisugdan dinhi, ug dili kini magresulta nga husto, masuta ninyo nga dili gyud kini mao, oo, nakahimo kita og sayup sa kung asa man, kinahanglan nga balikan gyud nato. Dili gayud ninyo Kini mahimong sabton sa inyong hunahuna. Dili Kini basta. . .

²³ Dili pa lang dugay nakita nato, pinaagi sa Kasulatan, nga walay tawo sa Langit, o sa ibabaw sa yuta, o sa ilalum sa yuta, o nagkaaduna man kaniadto, o magkaaduna man sa umalabot nga panahon, nga makahimo niini. Ang Cordero lamang ang bugtong makahimo niini. Busa, ang mga pahayag sa mga seminaryo,

bisan unsa pa kini, walay kapuslanan. Kita n'yo? Ang Cordero ang gikinahanglan aron nga maipadayag Kini, kana lang, busa nagasalig kita nga tabangan Niya kita.

²⁴ Si Juan, gisakgaw, diha sa ika-4 nga kapitulo, aron makita ang mga butang “nga kaniadto, nga sa karon, ug sa umalabot.” Apan ang Iglesia natapos sa ika-4 nga kapitulo. Ug gikuha pataas ni Cristo ang Iglesia, gisakgaw ngadto sa kawanangan, aron sa pagsugat Kaniya, ug wala magpakita pag-usab hangtud sa ika-19 nga kapitulo, sa dihang nagabalik Siya uban sa . . . ingon nga Hari sa mga hari ug Ginoo sa mga ginoo, uban ang Iglesia. Ug karon, oh, nagalaum ko nga moabot ang adlaw nga matapos gyud natong hisgotan kining tanan, tingali sa dili pa Siya moabot. Kung dili man, makita nato kini, sa gihapon, busa dili kini problema.

²⁵ Karon, dinhi sa ika-5 nga kapitulo, ang pag-abli na kini sa mga Selyo, ug karon ang maong Libro nga adunay pito-ka-selyo. Una, gusto natong basahon ang Unang Selyo.

²⁶ Sa miaging gabii, aron sa paghatag og dugang pa nga pasiunang paghulagway niini, makita nato, nga, sa pagtan-aw ug pagkakita ni Juan nianang Libro nagapabilin Kini diha sa mga kamot sa orihinal nga Tag-iya, ang Dios. Nahinumdoman ba ninyo kung giunsa Kini sa pagka-wala kaniadto? Ni Adan. Nawala niya ang maong Libro sa Kinabuhi, kay gibaylo man niya Kini sa kaalam ni Satan, ug nawala kaniya ang iyang panulondon, nawala ang tanan-tanan; ug wala na'y paagi aron siya matubos. Dayon, ang Dios, nga nagpakahisama sa tawo, mikanaug ug nahimong Manunubos alang kanato, aron matubos kita.

²⁷ Ug karon makita nato nga, kaniadtong mga panahon, kining mga butang nga misteryoso pagaablihan na kanato sa kaulahiang mga adlaw.

²⁸ Karon makita nato, usab, diha niini, nga, pagkadungog mismo ni Juan sa niining anunsiyo alang sa—sa Kabanay'ng Manunubos nga moduol ug para himoon na ang Iyang mga pag-angkon, walay bisan kinsa nga tawo ang makahimo niini; walay bisan kinsa nga tawo nga atua sa Langit, walay bisan kinsa nga tawo nga anaa sa yuta, walay bisan kinsa nga tawo sa ilalum sa yuta. Wala'y ni usa ang takus bisan sa pagtan-aw sa Libro. Hunahunaa lang kana. Walay bisan kinsa nga tawo, man lang, ang takus bisan sa pagtan-aw Niini.

²⁹ Ug misugod na nga mihilak si Juan. Nahibaloan niya nga, oh, wala gyu'y paglaum alang sa katubsanang kung ingon-ana. Ang tanan nangapakyas.

³⁰ Ug dihaduha nakita nato nga ang iyang paghilak mihunong, sa gilayon, tungod kay gianunsiyo man sa usa sa upat ka mga Buhing-binuhad, o mga anciano, diay. Usa sa—sa mga anciano ang miingon, “Ayaw paghilak, Juan, kay ang Leon sa banay

ni Juda nagmadaugon,” sa laing pinulongan, “nangbuntog, ug nangdaug.”

³¹ Si Juan, milingi, Cordero ang nakita niya nga migawas. Dugoan Kini ug gihiwa ug samdan. Daw sa gipatay Kini, ang. . . miingon, nga, “Usa ka Cordero nga daw gipatay.” Ug, siyempre, dugoan sa gihapon; kung inyong hiwaon ang nating-carnero ug—ug patyon kini sama ra sa paagi sa pagpatay kaniadto sa Cordero, pareho gyud. Kini gitigbas-tigbas kaniadto sa krus, dinugsak diha sa kilid, ug gipanglansangan ang mga kamot ug tiil, ug may mga tunok nga nakatusok sa kilay. Atua Siya kaniadto sa makaloolooy nga kahintang. Ug kining Cordero miabot, ug miduol ngadto Kaniya nga naglingkod diha sa Trono, nga naggunnit sa kumpletong titulo sa Katubsanan. Ug miduol didto ang Cordero ug gikuha ang Libro gikan sa kamot Niya nga naglingkod sa Trono, ug sa nakuha na, ug gitangtang ang mga Selyo ug giablihan ang maong Libro.

³² Ug dayon sa dihang nahitabo kana, makita nato nga daw sa may—may sa kung unsang butang ang nahitabo didto sa Langit. Tungod kay, ang mga anciano, ug ang baynte-kwatro ka mga anciano, ug ang mga Buhing-binuhat, ug—ug ang tanan nga atua didto sa Langit, nanagsugod sa pagtuaw, “Takus gayud!” Ug ania miabot ang mga Anghel, ug gibubo ang mga Panaksan sa mga pag-ampo sa mga balaan. Ang mga balaan sa ilalang mga halaran nanagtuaw, “Takus Ikaw, Oh Cordero, kay kami Imong gitubos, ug karon gihimo Mo kaming mga hari ug mga saserdote, ug kami magahari sa yuta.” Oh, grabe! Ug ingon niana ang nahitabo, sa dihang giablihan Niya kanang Libro.

³³ Nakita n’yo, ang Libro sa pagkatinuod kaniadto pa naplano ug nasulat na sa wala pa ang pagkatukod sa kalibutan. Kining Libro, ang Biblia, sa pagkatinuod nasulat na kaniadto sa wala pa ang pagkatukod sa kalibutan. Ug si Cristo, ingon nga mao ang Cordero, gipatay na sa wala pa ang pagkatukod sa kalibutan. Ug ang—ang mga miyembro sa Iyang Pangasaw-on, ang ilang mga ngalan nasulat na kaniadto sa Basahon sa Kinabuhi sa Cordero sa wala pa ang pagkatukod sa kalibutan. Apan, selyado Kini sa dugay nga panahon, ug Kini ginapadayag na karon; kang kinsang mga ngalan nga nasulat didto, ug ang tanan bahin Niini, pagkamahinungdanon gayud nga butang.

³⁴ Ug si Juan, sa pagkakita niya niini, siya—miingon siya, “Ang tanang butang sa kalangitan, ang tanang butang ilalum sa yuta. . .” Ang tanan nakadungog kaniya nga nagaingon, “Amen, mga panalangin, ug kadunganan!” Nagkaaduna gyud siya og usa ka malipayon kaayong panahon, ug, tungod nga, “Ang Cordero takus.”

³⁵ Ug ania karon ang Cordero. Karon, niining gabhiona, sa pagsulod nato sa Ika-6 nga kapitulo, nakuha na Niya sa Iyang kamot ang Libro, ug nagasugod na nga ipadayag Kini.

³⁶ Ug, oh, ako hingpit na gyud karon. . . Ug nanghinaut ko nga espirituhanon ang mga tawo. Grabe gyud unta ang pagkasayup ko bahin Niana, kung dili pa tungod, mga alas dose niining adlaw, misulod sa lawak ang Balaang Espiritu ug gitul-id ako sa pipila ka butang nga akong gisulat aron isulti unta.

³⁷ Gikuha ko man gud Kini gikan sa usa ka kanhing konteksto. Wala man gud ko og unsa man nga nahibal-an bahin Niini. Wala ko masayod kung unsa ang Ikaduhang Selyo, wala gyud og unsa man. Apan aduna ako og pipila ka mga kanhing konteksto sa uban nga butang nga akong nahisgotan mga pipila na ka tuig ang milabay, ug nasulat ko kini. Ug akong gitigum kining mga konteksto, konteksto nga gikan ni Dr. Smith, daghan pa nga mga bantugan, inila nga mga magtutudlo nga akong—akong natigum kini. Ug silang tanan mitoo niana, mao nga gisulat ko kini. Ug andam na unta akong moingon, “Bueno, karon akong tun-an Kini basi nianang baroganan.”

³⁸ Ug didto, mga alas dose sa kaudtohon, ang Balaang Espiritu kalit nga miabot sa sulod sa lawak, ug ang tibuok butang naablihan alang kanako, ug atua Kini, kita n’yo, mao nga. . . kining—kining Unang Selyo naablihan. Sigurado ako ingon nga nagatindog ako dinhi niining gabhiona, nga kini mao ang Ebanghelyong Kamatuoran nga akong igawali karon dinhi. Akong—nahibaloan ko nga mao gyud kini.

³⁹ Tungod kay, kung ang usa ka kapadayagan nagasupak sa Pulong, kung ingon niana dili kini Kapadayagan. Ug, kabalo mo, adunay mga butang nga daw sa matuod kaayo kon tan-awon, ug dili man diay matuod. Kita n’yo? Halos kaanggid gyud, apan dili man diay.

⁴⁰ Karon, makita nato, ang Cordero nga gikuha na ang Libro, karon. Ug karon sa ika-6 nga kapitulo atong mabasa.

Ug nakakita ako sa diha nga ang Cordero mibukhad sa usa sa mga selyo, ug nadungog ko, ang tingog nga daw usa ka dalugdog, ug ang usa sa upat ka mga buhing-binuhat nga nagaingon, Umari ka ug tuman-aw.

Ug nakita ko, ug ania karon ang usa ka maputi nga kabayo: ug ang nagkabayo niini may usa ka pana; ug gihatagan siya og usa ka purongpurong: ug siya milakaw nga nagmadaugon, ug aron sa pagpanaug.

⁴¹ Karon, kana ang Unang Selyo, ang usa nga atong paninguhaan, pinaagi sa grasya sa Dios, nga isaysay Kini karong gabhiona. Kutob sa mahimo. . . Ug naamgo ko nga ang usa ka tawo, nga maninguhang isaysay Kana, nagalakaw sa makuyaw nga kahimtang kung wala ka nahibalo sa kung unsay imong ginabuhat. Kita n’yo? Mao nga kung miabot kini kanako pinaagi og kapadayagan, sultihan ko kamo og ingon niana. Kung maghisgot ko niana nga gikan lang sa akong kinaugalingon nga panghunahuna, nan akong—sultihan ko usab

kamo niana sa dili pa ako maghisgot bahin niini. Apan sigurado gyud ako, ingon nga nagatindog ako dinhi niining gabhiona, nga lab-as gyud Kini nga miabot kanako, niining adlaw, gikan sa Makagagahum-sa-tanan. Dili ko hilig magsulti og mga butang nga ingon niana, kung paghisgotan na kining bahin sa Kasulatan. Ako—ako’y . . .

⁴² Nagalaum ako nga nahibaloan ninyo kung bahin ba sa unsa ang ginahisgotan ko karon, nakita n’yo. Karon, kabalo mo, ug dili kamo puedeng magsulti og mga butang. . . Kung aduna ma’y butang nga kinahanglan napahimutang *dinhi* sa dili pa kini mahitabo, kamo—dili ka puedeng magsulti niini hangtud adunay ingon niana nga napahimutang dinhi. Kita n’yo? Mabasa ba ninyo? Aduna ba mo’y napatalinghugan? Kita n’yo?

⁴³ Karon, ang Pito-ka-Selyo, nga Librong linukot ginahatud na karon sa Cordero. Nagaduol kita nianang bahina karong gabhiona. Dios, tabangi kami. Sa diha nga ang mga Selyo ginabadbad ug ginatangtang na, maipadayag na ang mga tinago sa maong Libro.

⁴⁴ Karon, nakita n’yo, usa *Kini* ka selyado nga Libro. Karon, nagatoo kita niana. Dili ba? [Nagaingon ang kongregasyon, “Amen.”—Ed.] Nagatoo kita nga selyado Kini nga Libro. Karon, wala nato kini nahibaloan kaniadto, apan selyado gyud Kini. Kini selyado sa Pito ka mga Selyo. Kana’y, anaa sa likod sa Libro, selyado ang maong Libro og Pito ka mga Selyo.

⁴⁵ Kung paghisgotan nato ang *kini* nga matang sa libro, mora og ginabutangan mo kini og bugkos ang palibot niini, pito ka mga bugkos. [Nagapakita si Igsoong Branham og libro ingon nga usa ka ilustrasyon—Ed.] Apan dili kana ingon *niini* nga matang sa libro.

⁴⁶ Usa Kana ka basahong-linukot. Ug sa dihang ang basahong-linukot mabadbadrang na, usa pa lang kana; dayon ang sunod mismo nianang linukot mao ang ikaduha. Ug mismo *dinhi* ginaingon Niini kung unsa Kini, apan usa Kini ka misteryo. Apan, bisan pa niana, naninguha kitang salagmaon Kini; apan, hinumdomi, selyado ang Libro. Ug ang Libro mao ang Libro sa misteryo, sa kapadayagan. Kini mao ang kapadayagan ni Jesus Cristo, kita n’yo, usa ka Libro sa mga kapadayagan. Ug karon kabalo mo, nga sa tanang kapanahonan, nanalagma ang mga tawo ug naningkamot nga hibaloan Kana. Kitang tanan nagbuhat niana.

⁴⁷ Ug, mao nga, usa ka higayon, nahinumdoman ko . . . Kung—kung ania man si Mr. Bohanon, o—o ang pipila sa iyang mga paryenti, ako—dili ko tuyo nga mang-insulto. Si Mr. Bohanon usa ka suod kong higala, ug siya ang superintendente kaniadto sa Public Service sa dihang nagtrabaho pa ako didto. Sugod niadtong naluwas ako, giingnan ko siya bahin sa pagbasa sa Basahon sa Pinadayag. Miingon siya, “Nasulayan ko nang

basahon kana,” sulti niya. Ug si Mr. Bohanon usa ka buutan nga tawo, ug siya—miyembro siya sa usa ka iglesia. Ug—ug wala ko masayri kung asa pa siya nahimong miyembro, apan miingon siya, “Sa hunahuna ko si Juan siguro nakakaon lang og siling pula sa pag-panihapon niya niadtong gabhiona, ug natulog nga busog kaayo.”

⁴⁸ Giingnan ko siya, bisan pa nga puede kadto nga mahimong hinungdan nga mapahawa ako sa trabaho, miingon ko, “Wala ka ba maulaw sa pagsulti niana?” Ug usa pa ako niadto ka batanon. Apan ingon ko, “Wala ka ba maulaw sa pagsulti niana bahin sa Pulong sa Dios?” Kita n’yo? Bisan pa man, ug usa lamang ka manghud, nga dili pa molabaw sa...siguro mga bayntuno, baynte-dos anyos ang panuigon; ug lisud makapangita og trabaho niadtong panahona, ug pit-os kaayo ang ekonomya kaniadto. Apan, bisan pa man, anaa na kanako ang kahadlok kaniadto, kung ako...magsimang, pagmay madungog og unsa man nga pagsimang sa Pulong sa Dios. Kini’y Kamatuoran; ang bug-os nga Kamatuoran. Busa, dili kini tungod sa usa lamang ka damgo o usa ka urum; dili kini tungod sa nakaon ni Juan.

⁴⁹ Atua siya kaniadto sa Isla sa Patmos tungod kay gipaningkamotan niyang isulat ang Pulong sa Dios sa usa ka libro, ug didto gilabay sa maong gobyernong Roma. Ug atua siya sa maong isla, sa Adlaw sa Ginoo. Ug hingdunggan niya gikan sa iyang luyo ang Tingog sa daghanang mga tubig, ug milingi siya aron tan-awon, ug nakita niya ang Pito ka mga Kandilirong Bulawan. Ug atua didto nagtindog ang Anak sa Dios, sa taliwala kanila, karon.

⁵⁰ Ug, dayon, kini nga Libro usa ka kapadayagan. Busa, ang kapadayagan usa ka butang nga nagapadayag sa kung unsa man, usa ka butang nga napadayag. Ug karon, himatikdi, aron dili ninyo kini mahikalimtan, kini’y “nakasirado hangtud sa kaulahiing mga panahon.” Kita n’yo? Ang tibuok nga misteryo Niini “sirado hangtud sa kaulahiing mga panahon.” Makita nato kana sa Kasulatan dinhi.

⁵¹ Karon, maipadayag lang ang misteryo sa Basahon sa dihang naablihan na ang mga Selyo. Ug pag-kumpleto nang maablihan ang mga Selyo, ang panahon sa pagtubos tapos na; tungod kay gibiyaan na sa Cordero ang dapit sa pagpangaliya, aron moadto didto ug kuhaon ang Iyang mga gipanag-iya. Siya usa ka Tigpataliwala, samtang wala pa kana. Apan sa diha nga ang tinuod nga kapadayagan mahitungod sa maong mga Selyo nagakahitabo na, sa diha nga ang mga Niini sugod nang maablihan, ang Cordero nagabiya na sa santuwaryo. Kini sumala sa Pulong. Nabasa nato kini kagabii. Siya nagagikan sa... nagagikan didto sa tunga, ug gikuha ang Libro, mao nga dili na Siya usa ka Tigpataliwala. Tungod kay, gitawag na gani nila Siya nga Leon, ug kana—kana mao ang Hari, ug Siya dili na Tigpataliwala nianang tungora.

52 Bisan pa man, ang mga magdudula sa niining mga Selyo nagsugod sa kapanahonan sa unang iglesia. Karon hinumdomi, aron nga inyong—makuha ninyo og ayo ang pagpatin-aw niini, kon mahimo nato, o ingon katin-aw kutob sa mahimo nato. Ang “mga magdudula,” ingon niana ang tawag ko niini tungod kay ang magdudula usa man ka tawo nga nagausb-usab og maskara. Kita n’yo?

53 Ug sa niining dula, niining gabhiona, makita nato nga si Satanas kini nga mao ang nagausb-usab sa iyang maskara. Ug, ang tanan, mga magdudula.

54 Si Cristo, nga ginadula lang ang bahin nga Iyang gibuhat kaniadto, niadtong Siya gikan sa pagka-Espiritu nahimong tawo, nagsul-ob lamang Siya og bisti sa magdudula, unod sa tawo, ug mikanaug diha sa porma sa usa ka Tawo, aron mamahimong duol nga Kabanay’ng Manunubos.

55 Karon—karon, nakita n’yo, sa porma ra kini sa usa ka magdudula. Mao kana kon nganong tanan sila anaa sa pormang pasumbingay ug sis- . . . ug nga kung unsa sila dinhi, ingon mga buhing-binuhat, ug mga mananap, og uban pa. Kini anaa sa usa ka pagdula. Ug kining mga magdudula nagsugod kaniadto sa unang kapanahonan sa iglesia, tungod kay si Cristo kini nga ginapadayag ang Iyang Kaugalingon ngadto sa pito ka mga kapanahonan sa iglesia. Karon nasabtan ba ninyo kini? [Nagaingon ang kongregasyon, “Amen.”—Ed.] Sige. Kita n’yo? Si Cristo nga ginapadayag ang Iyang kaugalingon ngadto sa pito ka mga kapanahonan sa iglesia.

56 Dayon, sulod niining mga kapanahonan sa iglesia, adunay usa ka dakung kalibugan nga miabot. Dayon, sa katapusan sa kapanahonan sa iglesia, ang Mensahe sa ikapitong manolunda mao ang magkuha niining mga nawala nga mga tinago ug aron ihatag kini ngadto sa Iglesia. Kita n’yo? Karon mamatikdan nato kana.

57 Apan wala pa kini napadayag kaniadto sa kung unsa gyud ang mga niini. Karon, sa mga panahon sa Biblia, didto na ang maong mga misteryo, ug nakita nila kining mga butanga nga mahitabo sa paagi nga nakita kadto ni Juan niadtong tungora. Karon miingon siya, “Adunay nagasakay sa usa ka puting-kabayo.” Apan, unsa man ang misteryo niini, aduna gyu’y misteryo nga nagauban nianang mangangabayo. Karon, kung unsa man kini, wala sila mahibalo, apan mapadayag ra kini. Apan mapadayag ra kini human nga biyaan sa Cordero ang Trono sa Amahan, ang Iyang pagpataliwala ingon nga Kabanay’ng Manunubos.

58 Medyo magbilin ako og gamay nga butang dinhi. Karon, kung aduna ma’y makakuha sa niining mga teyp. . . Bisan kinsa nga tawo makasulti sa bisan unsa ma’y gusto niya. Aduna siya’y katungod sa bisan unsang butang sa iyang kunbiksyon. Apan

kung...Kabalo mo, kung ayaw sa usa ka ministro kini para sa iyang kongregasyon, nan sultihi sila nga dili magkuha niini. Apan ako—ako... Para lang kini sa mga tawo nga gipadala ako aron isulti, busa kinahanglan kong ipadayag kung unsa ang Kamatuoran. Kita n'yo?

⁵⁹ Karon, ang Cordero, sa panahon *dinhi* sa pagpataliwala, nasayod Siya nga adunay mga ngalan nga gibutang didto sa wala pa ang pagkatukod sa kalibutan. Ug samtang kadtong mga ngalan wala pa napahayag sa kalibutan, kinahanglan Siya nga magpabilin didto ingon nga Tigpataliwala. Nasabtan ba ninyo kini? [Nagaingon ang kongregasyon, “Amen.”—Ed.] Pagkahingpit kaayo, nga predestinasyon! Kita n'yo? Sige. Kinahanglan nga magpabilin Siya didto, tungod kay Siya mianhi aron mamatay alang niadtong mga gikatagana na sa Dios ngadto sa Kinabuhing Walay Katapusan. Kita n'yo? Kita n'yo? Pinaagi sa Iyang paghibalo nang daan, nakita na Niya sila. Dili pinaagi sa Iyang Kaugalingong kabubut-on; ang Iyang kabubut-on mao nga wala'y ni usa ang malaglag. Apan pinaagi sa Iyang pagkahibalo nang daan nahibalo na Siya kung kinsa ang moduol ug kung kinsa ang dili. Busa, hangtud nga adunay usa pa ka ngalan nga wala pa, nga wala pa gipahayag—gipahayag sa kalibutan, kinahanglan magpabilin usá didto si Cristo ingon nga usa ka Tigpataliwala, aron mapanalipdan ang kanang ngalan.

⁶⁰ Apan sa dihadhiha nga kanang katapusang ngalan natuslob na diha sa Clorox o sa bleach, kung ingon niana human na ang adlaw sa Iyang pagpangaliya. “Siya nga mahugaw papadayona gihapon siya sa pagkamahugaw. Siya nga balaan, papadayona gihapon siya sa pagkabalaan.” Kita n'yo? Ug Iyang pagabiyaan ang santuwaryo ug mamahimo na kining Lingkoranan sa Paghukom. Alaut kadtong mga wala pa kang Cristo nianang panahona!

⁶¹ Karon matikdi, apan igapadayag Kini pag biyaan na sa Cordero ang Iyang dapit sa pagpangaliya gikan sa Amahan. Karon, kana ang Pinadayag 5. Karon Iyang ginakuha ang Libro sa mga Selyo, ang Libro sa mga Selyo, o usa ka Libro nga selyado sa mga Selyo, gibadbad ang mga niini ug ginapakita ang mga niini. Tan-awa. Karon sa katapusan sa kapanahonan, human nga ang pagpangaliya tapos na, ang mga kapanahonan sa iglesia nahuman na.

⁶² Siya miabot, diha sa unang kapanahonan, ang Kapanahonan sa Efeso; nagpadayag, gipadala ang mensahero.

⁶³ Matikdi kung unsay mahitabo, sa pagpadayon nato. Ania ang plano niini. Ang unang butang nga nagakahitabo, adunay usa—usa—usa ka pag-anunsiyo sa mga Langit, una. Unsa ma'y nagakahitabo? Giablihan ang Selyo. Unsa man kana? Gibukhad ang usa ka misteryo. Kita n'yo? Ug pagkabukhad sa usa ka misteryo, motingog dayon ang usa ka trumpeta. Nagadeklarar

kini og gubat. Moabot ang hampak, ug nagasugod ang usa ka kapanahonan sa iglesia. Kita n'yo?

⁶⁴ Unsa man ang “gubat” nga bahin niini? Pagnakuha sa manolunda sa Iglesia ang misteryo sa Dios, nga wala pa napadayag. Apan, pagnakuha na niya, nasabtan niya kining misteryo sa Dios, ug dayon moadto siya sa mga tawo human nga mahatag ngadto kaniya ang maong misteryo. Moadto siya sa mga tawo! Unsa ma’y buhaton niya didto? Mosugod siya sa pagsangyaw nianang Mensahe. Ug unsa man ang gisugdan niini? Usa ka gubat, usa ka espirituhanong gubat.

⁶⁵ Ug dayon kuhaon sa Dios ang Iyang mensahero, kauban ang mga Pinili sa nianang kapanahonan, ug ipapahulay silang, nangatulog. Ug dayon ipahamtang Niya ang hampak ngadto kanila nga nagsalikway Niini; usa ka temporaryong paghukom.

⁶⁶ Ug dayon pagkahuman niana, magsige kini og padayon, ug mangtukod sila og denominasyon, ug mapaingon na sa pagka denominasyon, ug magsugod na og simang palayo sa mga buhat nianang tawo, sama ni Wesley ug tanang uban pa kanila. Ug dayon modangat na usab kini ngadto sa kagubot.

⁶⁷ Ug dayon adunay moabot og usa na usab ka misteryo. Dayon unsay mahitabo? Usa na usab ka mensahero ang miabot sa yuta, alang sa usa na usab ka kapanahonan sa iglesia. Kita n'yo? Dayon, sa pag-abot niya, siya ang—ang trumpeta nagatingog na usab. Nagadeklarar siya og gubat. Kita n'yo? Ug dayon unsa ma’y mahitabo? Sa kaulahian, niana, ginakuha siya. Ug dayon pag-wala na siya, nan nagaabot ang hampak, ginalaglag sila. Nagaabot ang espirituhanong kamatayon sa iglesia, ug mamatay siya, kana nga grupo.

Dayon moanha Siya sa usa na usab. Oh, pagkahalangdon kini nga plano!

⁶⁸ Hangtud, nagaabot kini ngadto sa katapusang manolunda. Karon, wala siya og iyahang partikular nga misteryo. Apan iyang ginatigum ang tanan nga nangawala sa ubang mga kapanahonan, ang tanang Kamatuoran nga wala pa mapadayag kaniadto, kita n'yo, sa diha nga nagaabot ang kapadayagan, dayon ginapadayag niya kini nga mga butang diha sa iyang adlaw. Kung gusto ninyong basahon kini, anaa ra kini. Sa Pinadayag 10, 1 hangtud...1 hangtud sa mga 4, makuha ninyo kini. Sige. Kita n'yo? “Ginakuha ang Libro ug, ang mga Selyo, ug ginaablihan ang mga niini,” ug ginapakita sa ikapitong manolunda; tungod niini, ang mga misteryo sa Dios, mao ang ministeryo sa ikapitong manolunda. Karon, nahisgotan na nato ang bahin sa mga kapanahonan sa iglesia, lakip na ang kasaysayan, ug gipamatud-an kana. Kita n'yo? Kini mao ang—ang Mensahe sa manolunda, sa ikapitong iglesia, sige, nga ginapadayag ang tanang mga misteryo nga kaniadto pa, ang tanang butang nga kaniadto pa. Sa Pinadayag 10:1-7, mao kana

ang mahitabo. Karon, hinumdomi, “Sa mga adlaw sa ikapitong manolunda, sa dihang ginapatingog na niya, ginapatingog na ang trumpeta sa Maayong Balita, iyang tapuson ang tanang mga misteryo sa Dios.”

⁶⁹ Sama lang, sa nahitabo dinhi, sa nahaunang mga kapanahonan sa iglesia. Makita nato kini, human ang pipila ka gutlo, usa ra kaniadto ka doktrina. Ug, niadtong panahona, mahimong usa pa kadto ka panultihon, una; dayon nahimong usa ka doktrina; ug dayon nahimong usa ka kasugoan; dayon nahimo nang usa ka iglesia, ug nagpadayon kadto niadtong mangiub nga mga kapanahonan.

⁷⁰ Ug dayon gikan sa maong mangiub nga mga kapanahonan miabot ang unang repormasyon, si Luther. Ug dala-dala niya, mismo, ang tanang matang sa misteryosong mga butang nga nahitabo niadtong kapanahonan sa iglesia, niadtong nangaging mga kapanahonan, apan wala gayud niya kini natapos.

⁷¹ Dayon miabot si Wesley, dala ang pagpakabalaan, nga nadawat niya ingon nga dugang niadto. Sa gihapon, wala niya natapos kini; nagbilin og mga wala natino, sama sa pagwisik-wisik imbis og bautismo. Ug gibarugan ni Luther ang “Amahan, Anak, Espiritu Santo” imbes nga “Ginoong Jesus Cristo.” Ang tanan na niining nagkalainlaing mga butang!

⁷² Dayon miabot ang kapanahonan sa Pentecostes, dala ang bautismo sa Balaang Espiritu, ug gihatagan nila kadto og dakung kamahinungdanon. Karon, dili na mahimong magkaaduna og uban pa nga kapanahonan. Kana na ang tanan niini. Kana ang Philadelphia . . . o, karon, ang Kapanahonan sa Laodicea. Apan dayon ang . . .

⁷³ Makita nato, sa pagtuon sa Kasulatan, nga ang mensahero sa kapanahonan nagaabot mismo pag sa katapusan na sa kapanahonan, sa matag higayon. Si Pablo miabot sa katapusan na sa kapanahonan. Makita nato nga si Iranaeus miabot sa katapusan na sa kapanahonan. Si Martin, sa katapusan na sa kapanahonan. Si Luther, sa katapusan na sa kapanahonan sa Katoliko. Ug (unsa man?) si Wesley sa katapusan na sa kapanahonan sa Lutheran. Ug ang Pentecostes sa katapusan na sa kapanahonan sa pagpakabalaan, ngadto sa bautismo sa Espiritu Santo.

⁷⁴ Ug sa katapusan na sa kapanahonan sa Pentecostal, kita gitoohan nga angay’ng makadawat, sumala sa Pulong, maingon sa pagtabang sa Dios kanako karong gabhiona aron ipakita kaninyo, dinhi, nga kita makakita, makadawat og usa ka mensahero nga kuhaon tanan kadtong mga wala mapadayag kaniadto ug igapadayag ang tibuok nga tinago sa Dios, alang sa pagsakgaw sa Iglesia.

⁷⁵ Ug dayon aduna pa’y pito ka misteryosong mga Dalugdug nga wala gani nasulat. Husto kana. Ug nagatoo ako nga, pinaagi

nianang Pito ka mga Dalugdog, nga mapadayag sa kaulahi-ang mga adlaw aron hiusahon ang Pangasaw-onon alang sa pagtoo nga makapagpasakgaw. Tungod kay, kung unsa man ang aduna kanato karon, atong—dili nato mahimong buhaton kini. Aduna gyu'y butang. Kinahanglan natong moabante pa. Kita, wala pa gani kita'y igong pagtoo para sa Balaanong pagpang-ayo, halos. Kinahanglan magkaaduna kita og igong pagtoo aron mangausab, sa kalit, ug nga masakgaw gikan niining kalibutana. Ug makaplagan nato kana, pagkataud-taud, kung itugot sa Ginoo, hibaloon nato kung asa Kini nahisulat.

⁷⁶ Dayon, ang tanan na nga mga paghukom alang niining mga mamumuhat og kadautan! Karon, kita n'yo, sa pagpadayon sa mga kapanahonan sa niining mga Selyo, nagapadayon ang pag-abli, hangtud karon ginaablihan ang ulahing Selyo. Ug karon samtang sila—samtang sila nagatan-aw niining mga Selyo ug nagapanalagma lang, nagapanalagma kung unsa ang ilang ginabuhat. Karon, sa katapusan na sa mga kapanahonan, sa mga kapanahonan sa iglesia, ang tanan niining mga mamumuhat og kadautan mapahimutang gyud sa ilang puwesto ug mopaingon ngadto sa Kasakitan; tanan niining mga mamumuhat og kadautan sa Pito ka mga Selyo, nga tago lang nga nagapamuhat sulod sa iglesia.

⁷⁷ Ug makita nato, sa pipila ka minuto, nagpangabudlay pa gani kini diha sa ngalan sa iglesia. Ginatawag nila ang ilang kaugalingon, “Ang Iglesia.” Ug makita ninyo kung husto ba kana. Dili ikatingala kon nganong supak gyud ako sa denominasyon, nga wala nahibalo kon ngano. Kita n'yo? Kita n'yo?

⁷⁸ Midangat gyud silang ingon niana. Karon, misugod kini kaniadto nga halos wala lang, ug hinayhinay kining nagkadautan ug nagkadautan, hangtud sa... Ug nag-uyon-uyon pud ang mga tawo niini, nga nagaingon, “Oh, oo, okey ra man *kini*.” Apan sa kaulahi-ang mga adlaw, kining mga butanga mapadayag. Ug sa katapusan samot silang magkadautan pa hangtud diretso na silang paingon sa panahon sa Kasakitan.

⁷⁹ Ug unsaon pag-ingon sa usa ka tawo nga ang Pangasaw-onon ni Cristo mopaingon ngadto sa Kasakitan? Dili ko kini masabtan. Kita n'yo? Pagasakgawon siya pahilayo sa Kasakitan. Kung—kung ang Iglesia nahukman na, ug gihukman na nila ang ilang kaugalingon ug gidawat na ang Dugo, unsaon paghukom sa Dios sa usa ka tawong hingpit, ug bug-os nga walay sala?

Moingon kamo, “Walay ingon niana nga tawo.”

⁸⁰ Ang matag magtotoo nga natawo-na-pag-usab, matuod nga magtotoo, hingpit, bug-os nga walay sala sa atubangan sa Dios. Wala siya nagasalig sa iyang mga binuhatan; kondili sa Dugo lang ni Jesus, kon diin nagapaingon ang iyang mga pamahayag. Maoy ginaingon sa Biblia. Kita n'yo? “Siya nga—

nga natawo sa Dios dili na nagahimo'g pagpakasala, tungod kay siya dili makasala.” Unsaon ninyo paghimong makasasala ang usa ka tawo kung ang bleach nga iya sa Dugo ni Jesus Cristo nagapatunga kaniya ug sa Dios? Mao kana ang nagabungkag sa sala hangtud nga wala na’y nahabilin niini. Kita n’yo? Walay paagi nga mapalabay sa nianang putling Dugo ni Cristo ang usa ka sala dinha? Dili gayud Niya tugotan.

⁸¹ Si Jesus miingon, “Busa magmahingpit kamo, ingon nga hingpit ang inyong Amahan nga atua sa Langit.” Ug unsaon man nato pagsugod og hunahuna nga mahimong hingpit? Apan gimando kini ni Jesus. Ug kung gimando kini ni Jesus, kinahanglan maghatag Siya og paagi alang niini. Ug naghatag Siya; ang Iya Kining Kaugalingong Dugo!

⁸² Karon, tanan, ginapadayag ang tanang mga tinago nga nangahitabo kaniadto. Karon, ang punto mao, nga dinhi sa katapusan na nga panahon, nga ang mga misteryo nga nagsugod kaniadtong nangaging panahon ug nagpadayon sa mga kapanahonan sa iglesia, igapadayag ra dinhi sa pag-abli sa mga Selyo, dinhi sa kaulahiing mga adlaw, sa diha nga ang panahon sa pagpangaliya hapit na nga matapos, nianang panahona.

⁸³ Dayon, ang mga paghukom nagahulat na lang alang niadtong mga nahabilin. Paingon na sila niana. Kana maoy pagkahuman nga ang Pangasaw-onon gisakgaw na gikan sa maong eksena.

⁸⁴ Oh, basahon na lang nato sa Kasulatan. Gusto ba ninyong tanan magsulat og pipila ka Kasulatan? Kuhaon nato ang Ikaduhang Mga Taga-Tesalonica, sa kadali, ug tan-awon dinhi sa kadali. Kini—pagkamaanindot nga paghulagway dinhi! Gusto ko kini. Ug tan-awon nato. Oo, sa Ikaduhang Mga Taga-Tesalonica. Ug gusto ko ang ika-2 nga kapitulo sa Ikaduhang Mga Taga-Tesalonica, ug ang—ang ika-7 nga bersekulo. Tan-awon nato. Ikaduhang Mga Taga-Tesalonica 2:7. Siguro husto kana, karon. Ginasulat ko kini, nga nagkubakuba ug nagpangurog.

...ang misteryo sa pagka-masupilon gikapalihok na: mao lamang nga ang...nagapugong niini karon magapadayon pa sa pagpugong, hangtud nga kuhaon na siya.

⁸⁵ Kinsa man? “Siya nga nagapugong.” Kita n’yo? Kita n’yo, usa ka tinago, “ang misteryo sa pagka-masupilon,” gikan pa kini kaniadto sa pinakaunang kapanahonan sa iglesia. Ania si Pablo nga nagsulat, nag-ingon nga, “Ang misteryo sa pagka-masupilon.” Unsa ba ang pagka-masupilon? Ang pagka-masupilon, usa ka butang nga nahibaloan mo nga dili mo angay buhaton, ug ginabuhat mo kini sa gihapon. Ug si Pablo miingon nga aduna og mga ingon niana sa kalibutan karon, mga

mamumuhat sa kadautan. Oh, kon ikaw . . . Moadto kita sa . . . Basahon lang nato kana nga bahin, sa kadali lang. Medyo sugdan lang sa unahan gamay, sa ika-3 nga bersekulo.

Dili kamo magpalimbong ni bisan kinsa sa bisan unsang paagi: kay kadtong adlaw a dili pa moabot, hangtud nga mahitabo una ang pagkahulog gikan sa pagtoo, ug kana nga (t-a-w-o) tawo sa sala ikapadayag na, ang anak sa kalaglagan; (husto kana)

Nga nagabatok ug nagatuboy sa iyang kaugalingon sa tanan nga ginganlan og Dios, o sa bisan unsa man nga ginasimba; sa pagkaagi nga maglingkod siya ingon nga Dios diha sa templo sa Dios, magapasundayag sa iyang kaugalingon nga siya Dios, nagapasaylo og mga sala.

Wala ba kamo mahanumdom, nga, sa diha pa ako kaninyo, gipamulong ko na kaninyo kining mga butanga?

⁸⁶ Gusto kong molingkod ilalum sa pipila sa iyang mga pagtulun-an. Kamo pud ba?

Ug karon inyong hingbaloan ang nagaulang aron igapadayag siya sa iyang kaugalingon nga panahon.

⁸⁷ Dili kaniadto, kita n'yo, dili ang kaniadto; kondili, “sa iyang panahon,” kita n'yo, sa pag-abli sa nianang Selyo. Eksaktong nahibaloan na nato kung unsa gyud kini. Kinsa ba kining tawo sa kadautan? Kinsa ba kining tawo sa sala, kining tawo nga nagabuhat sa kadautan? “Apan igapadayag ra siya diha sa iyang adlaw.”

Kay ang misteryo sa pagka-masupilon gikapalihok na (mga maglilimbong, nakita n'yo, ginalimbongan ang mga tawo paingon sa usa ka butang, kita n'yo): mao lamang siya (ang Dios) nga nagapugong niini magapadayon pa sa pagpugong, hangtud nga siya (ang Iglesia, si Cristo, ang Pangasaw-onon) kuhaon na.

Ug unya igapadayag ang maong Masupilon, . . .

⁸⁸ Sa pag-abli sa Selyo, “sa iyang panahon.” Si Pablo miingon, “Dili sa akong panahon, kondili sa panahon kon diin igapadayag na siya.” Kita n'yo?

. . . nga pagapatyon kini sa Ginoo pinaagi sa ginhawa sa iyang baba, . . .

⁸⁹ Mopadulong kita niana sa dili madugay, “ang ginhawa sa iyang baba.” Bantayi kung unsa gyud kana.

. . . ug pagalaglagon pinaagi sa pagpadayag sa iyang pag-abot:

Nga siya, ang iyang pag-anhi sumala sa buhat ni Satanas . . .

90 Siya, “siya,” usa ka tawo nga ang buhat nahisubay sa buhat ni Satanas.

. . . pagaubanan og tanan nga gahum ug mga ilhanan ug mga katingalahan nga bakak,

Ug sa tanang limbong sa pagkadili-matarung, sa pagpanglimbong sa mga tawo pinaagi sa pagkadili-matarung, alang kanila nga pagalaglagon (dili ang Pangasaw-onon), alang kanila nga nagapangita og ingon nianang butanga; tungod kay sila nanagdumili man sa paghigugma sa kamatuoran, . . .

91 Ug si Cristo mao ang Kamatuoran, ug si Cristo mao ang Pulong; apan mas gigusto pa nila nga magkaaduna og kredo. Huh! Kita n’yo?

. . . aron unta mangaluwas sila.

Ug tungod niining hinungdan ang Dios nagapadala ngadto kanila sa buhat sa kasaypanan, aron managtoo sila sa—sa bakak:

92 Angay kining mahubad dinha, nga sa dihang gitan-aw ko sa lexicon, “ang bakak,” dili nga “usa ka bakak.” “Ang bakak,” nga mao ra sa giingon niya kang Eva kaniadto.

Aron sila tanan. . . mahukman nga wala motoo sa kamatuoran, kondili nahimuot sa pagkadili-matarung.

93 Grabe nga pamahayag! Grabe! Human nga gisakgaw na ang Pangasaw-onon, igapadayag dayon sa niining tawo sa sala ang iyang kaugalingon.

94 Siya, ang tinuod nga Pangasaw-onon ni Cristo, mga pinili gikan sa matag kapanahonan sa iglesia.

95 Karon, sa miaging adlaw mihimo ako og usa ka pamahayag, “Ang Pangasaw-onon mahimong naka-Pauli na ug wala gyud kamo’y nahibaloan og unsa man bahin niini.” Tinuod kana.

96 Adunay miingon, “Bueno, Igsoong Branham, gamay ra gyud kaayo diay kana nga grupo.”

97 Miingon si Jesus, “Maingon sa nahitabo kaniadto sa mga adlaw ni Noe,” karon magpakig-estorya kamo ngadto Kaniya bahin niini, kita n’yo, “diin walo ka mga kalag ang nangaluwas diha sa tubig, mao man usab sa Pag-abot sa Anak sa tawo.” Kung walo ka gatus lang sila ang mahiapil sa Pagsakgaw karong gabhiona, wala gyud kamo’y madungog nga sulti bahin niini pagka-ugma, o pagka-sunod adlaw, o sa unsa mang adlaw. Mangawala lang sila ug wala gyud mo’y hibangkaagan bahin niini. Kita n’yo, mao ra kini sa gihapon.

98 Unsa man ang gipaningkamotan kong isulti? Wala ko kamo ginahadlok, o ginapabalaka. Ako—gusto ko lang nga magmaalisto kamo. Mangandam, nagabantay, sa matag gutlo. Undanga na ninyo ang mga butang nga walay pulos.

Magpadayon sa buluhaton sa Dios, tungod kay mas haduol na kini kay sa inyong ginahunahuna.

Karon, hinungdoman ninyo, ang tinuod nga Pangasaw-onon!

⁹⁹ Karon, adunay mini nga pangasaw-onon. Makuha nato kana diha sa Pinadayag 17. Miingon ang babaye, “Ako usa ka balo, ug wala na magkinahanglan og bisan unsang butang,” nakita n’yo, nagalingkod ibabaw sa niining kolor-pula nga mananap, ug uban pa, ang mapintas-nga-mananap, diay.

¹⁰⁰ Karon, apan ang tinuod nga Pangasaw-onon linangkuban og mga linibo ka pilo sa mga tawo, apan kini mao ang mga Pinili gikan sa matag kapanahonan sa iglesia. Sa matag panahon nga adunay mensahe nga mogula, ug gitooan kini sa mga tawo ug gidawat kini sa tibuok nga Kahayag niini, nan kana sila selyado na hangtud sa Adlaw sa Katubsanan.

¹⁰¹ Dili ba mao ra sa gihapon ang gitudlo ni Jesus, niadtong miingon Siya, “Ang—ang tingog miabot sa—sa ikapitong pagtukaw”? Kana mao ang katapusan nga kapanahonan sa iglesia. Kita n’yo? Ug miingon, “Ania karon, nagaanhi na ang Pamanhonon; lakaw og sugata Siya.”

¹⁰² Ug dayon nagaabot ang nagakatulog nga mga dalagang ulay, gipahiran ang iyang mga mata, ug miingon, “Siguro kinahanglan makabaton ako og ingon niana nga Lana, usab, siguradong aduna gyud ka og pipila niana.”

¹⁰³ Ug ang matuod, tinuod nga Pangasaw-onon nga atua didto, miingon, “Aduna lamang kami og igo alang sa among kaugalingon. Uh-huh. Aduna lamang kami og igo aron makasulod, mismo. Wala na kami puedeng ihatag kaninyo. Kung gusto ninyo og pipila niini, pangadto mo og mag-ampo.”

¹⁰⁴ Ug sa diha nga milakaw siya, miabot ang Pamanhonon, ug misulod na ang Pangasaw-onon. Ug dayon sila nga nahabilin didto, ang kadtong bug-os nga mga maligdong, ang iglesia, nahabilin sa gawas. Ug Siya miingon, “Magkaaduna og nanagminatay, nanagdanguyngoy, ug nanagkagut sa mga gipon.”

¹⁰⁵ Kita n’yo, karon, kana ang Pinili. Ug sa dihang motingog nang, “Nagaanhi na ang Pamanhonon,” dayon ang matag usa kanila nga nangatulog niadtong mga kapanahonan, nahigmata, ang matag usa. Kita n’yo, dili ingon niana ang Dios, sama sa ginahunahuna nato, nga mangita lamang Siya og pipila ka libo nga mga tawo sa niini rang kapanahonan ug sakgawon sila. Ang mga Pinili kini mismo gikan sa matag kapanahonan. Ug kana ang hinungdan nga si Cristo kinahanglan magpabilin sa lingkuranan sa pagpatigpataliwala hangtud karon, ingon nga Tigpataliwala, hangtud nga kanang kaulahi-ang usa sa kaulahi-ang mga adlaw nakasulod na. Ug ang kining mga kapadayagan kung ingon-ana, kung unsa kini kaniadto, napadayag na ngadto sa mga tawo, ug makita nila kung unsa

ang nagakahitabo. Kita n'yo? Nakuha ba ninyo kini karon? [Nagaingon ang kongregasyon, "Amen."—Ed.] Sige.

¹⁰⁶ Matikdi, "Ang tanang uban pa nga mga patay," mga miyembro sa iglesia, "dili mabuhi pag-usab hangtud matapos una ang usa ka libo ka tuig." Ang mga miyembro sa iglesia, ang—ang mga Cristohanon, ang iglesia, dili mabuhi pag-usab hangtud sa katapusan na sa usa ka libo ka tuig. Ug dayon mamangon sila aron mobarug sa atubangan sa Pangasaw-onon, husto kana, magatindog atubangan sa Hari ug sa Rayna. Himaya!

Ang ubang iglesia sa karon ginatawag ang ilang kaugalingon, "Ang Rayna sa Langit."

¹⁰⁷ Ang Rayna sa Langit mao ang pinili nga Pangasaw-onon ni Cristo, ug Siya kauban Niya nga moabot. Nakita kini ni Daniel, ug miingon, "Napulo ka linibo ka pilo nga tig-napulo ka libo ang nanag-alagad ngadto Kaniya." Karon kung inyong tan-awon ug Kasulatan didto, sa Daniel, "gipahigayon na ang paghukom, ug ang mga basahon gibuklad." Karon hinumdomi, kung moabot Siya, moanhi Siya nga kauban ang Iyang Pangasaw-onon. Ang asawa nagaalagad ngadto sa iyang bana. "Ug napulo ka linibo ka pilo nga napulo ka linibo ka libo ang nanag-alagad ngadto Kaniya. Gipahigayon na ang Paghukom, ug ang mga basahon gibuklad." "Ug ang usa pa ka basahon gibuklad, nga mao ang basahon sa Kinabuhi," dili ang Pangasaw-onon, sa bisan unsa nga paagi. Nahuman na siyang gisakgaw ug mibalik pag-usab, ug nagtindog didto sa paghukom ngadto niadtong mga henerasyon nga nagsalikway sa Mensahe sa Maayong Balita.

¹⁰⁸ Dili ba nag-ingon man si Jesus? "Ang rayna sa Habagatan motindog kauban sa niining kaliwatan diha sa iyang mga adlaw, sa Paghukom, ug pagahukman ang kining maong kaliwatan; kay siya mianhi nga gikan pa sa mga kinatumyan sa yuta, aron sa pagpatalinghug sa kaalam ni Solomon, ug ania dinhi karon ang labaw pa kay kang Solomon." Didto nagtindog ang—ang paghukom, ang rayna sa—sa Sheba, sa Habagatan, didto nagtindog diha sa Paghukom, ug ang kaugalingon niyang pagpamatuod.

¹⁰⁹ Wala ni usa sa mga Judio ang nagpakita sa nianang kaliwatan sa mga Judio. Ug sila mga buta, ug wala Siya makita. Tungod kay, nangita man sila Kaniya, apan miabot man Siya sa ingon kayano kaayo nga napalagpas nila kini, nga ingon niana.

¹¹⁰ Ug, didto, ang kanang bantugang rayna nagpaubos sa iyang kaugalingon, ug miadto, ug gidawat ang mensahe. "Ug siya magatindog diha sa Paghukom," miingon Siya, "ug pagahukman kanang kaliwatan."

¹¹¹ Karon makita ninyo ang tulo ka matang, sa kanunay. Ang basahon, ang mga patay gipanaghukman; usa pa ka basahon, ang basahon sa Kinabuhi, kanila nga anaa ang ilang mga ngalan diha sa basahon sa Kinabuhi.

112 Nagaingon sila, “Kung ang imong ngalan anaa sa basahon sa Kinabuhi, okey na kana, uh?” Dili, sir!

113 Tan-awa gani, si Judas Iscariote anaa man ang iyang ngalan diha sa basahon sa Kinabuhi. Karon moingon mo og sayup kana? Si Jesus, sa Mateo 10, naghatag kanila og gahum aron sa pagpagula og mga yawa, ug nagpaadto kanila aron sa pagpangayo sa mga masakiton, ug aron ayohon ang mga sanlahon, ug banhawon ang mga patay. Ug nangadto sila, ug mibalik, nga kauban mismo nila si Judas. Ug nagpagula sila og mga yawa, ug gibuhat ang tanang matang sa mga milagro. Ug ningbalik, ug miingon, “Bisan ang mga yawa nagpailalum nga masinugtanon kanamo.”

114 Si Jesus miingon, “Ayaw pagkalipay nga ang mga yawa nagpailalum nga masinugtanon nghanha kaninyo, kondili magkalipay kamo tungod kay ang inyong mga ngalan nahisulat na didto sa Langit.” Ug kauban nila si Judas. Apan unsa ma’y nahitabo? Sa diha nga miabot ang panahon para sa Piniling pundok, aron nga moadto sa Pentecostes ug bug-os nga madawat ang Balaang Espiritu, gipakita ni Judas ang iyang kolor. Siya mahiadto gayud sa Paghukom.

115 Busa ang mga basahon gibuklad; ug usa ka basahon, ang Kinabuhi, gibuklad; ug ang matag tawo gihukman sa nakasulat niana. Karon, ang Pangasaw-onon nagatindog didto kauban ni Cristo, aron pagahukman ang kalibutan. Dili ba ang . . . Miingon si Pablo, “Ayaw kamong mangahas,” siya nga nagapakigsulti ngadto sa Pangasaw-onon, “nagkaaduna og unsa man nga matang sa sumbong batok sa usa’g usa, nga mangdangop kamo sa dili-makatarunganong balaod. Wala ba kamo masayod nga ang mga balaan ang maoy magahukom sa kalibutan?” Kita n’yo? Tan-awa. Ang mga balaan mao ang maghukom sa kalibutan ug magadumala niini. Husto kana.

116 Moingon, “Unsaon man niana pagkahimo sa diyutay’ng pundok nga sama niana?” Wala ako kahibalo kung unsaon pagpahigayon niini. Apan miingon Siya nga mahitabo gyud kini, busa mamaingon niana gyud kini, kutob sa akong nahibaloan.

117 Karon tan-awa. Karon matikdi. “Ang tanang uban pa nga nangamatay,” ang mga miyembro sa iglesya, patay nga mga miyembro sa iglesya, “dili sila mabuhi pag-usab hangtud nga matuman ang usa ka libo ka tuig.” Ug dayon pagkahuman sa usa ka libo ka tuig, sila pagatigumon; adunay usa pa ka pagkabanhaw ang mahitabo, nga mao ang ikaduhang pagkabanhaw, ug sila pagatigumon. Ug si Cristo ug ang Iglesia, ang Pangasaw-onon, dili ang iglesia; ang Pangasaw-onon, si Cristo ug ang Rayna, dili ang iglesia. Igles. . . atua didto si Cristo ug ang Pangasaw-onon.

118 Ug sila ipanghimulag, sama sa mga karnero nga ginahimulag sa mga kanding. Husto kana. Atua didto ang mga miyembro ra sa

iglesia. Ug kung nadungog nila ang Kamatuoran ug gisalikway ang Kamatuoran, nan ang mga igasulti didto sa diha nga ang halapad nga butang maibuklad na didto, nga bisan gani ang imo mismong mga hunahuna igabutyag didto, kung unsa man ang imong mga gihunahuna bahin Niini? Unsaon man nimo sa paghilingkawas niini, ug ginapakita kini mismo didto sa telon sa langit, ug didto sa dakong telebisyon nga iya sa Dios. Ang kaugalingon mong mga hunahuna nga nagapamatok. Ang kaugalingon mong mga hunahuna mismo nga nagasaksi batok kanimo nianang orasa.

119 Busa kung magsulti ka og usa ka butang, ug lahi ang anaa sa hunahuna, mas maayo pa nga ihunong mo kana. Itumong ang imong mga hunahunaa diha sa Dios. Siguradohon mo kini nga putli, ug ipapabilin kini nga ingon niana, ug magsulti og ingon niana sa gihapon sa tanang panahon. Kita n'yo? Ayaw pagsulti nga, "Bueno, isulti ko nga nagatoo ako Niini, apan hibaloon ko pa Kini." Toohan mo Kini! Amen.

120 Himatikdi, ang ingon niining mga tipo, ang hinungdan kung ngano sila nangamatay, mangagi ngadto sa paglimpyo diha sa pagsulay sa Kasakitan tungod kay sa pagkatinuod wala sila napailalum sa Dugo. Nagapamahayag sila nga napailalum sila, apan wala gayud. Unsaon man nila pag-agi sa pagbista, aron malimpyohan sila, kung aduna ma'y (bleach) Dugo ni Jesus Cristo nga nagatangtang sa tanan nga mga sintomas sa sala ug nagatangtang sa ingon nianang mga butang gikan kaninyo? "Ug patay ka na, ug ang imong kinabuhi natago na diha Kaniya, bug-os nga natago sa Dios, ug selyado na sa sulod dinha sa Espiritu Santo." Unsa pa man ang pagahukman kanimo? Asa mo man kuhaon ang pagpapatli kanimo? Unsa pa man ang anaa kanimo nga kinahanglan putlion, diin hingpit ka na man diha kang Cristo, walay sala? Unsaon . . . Para sa unsa pa ang paghukom? Apan kini para sa mga nangatulog nga pundok, sila nga mga dili makaapil didto.

121 Karon, wala nila kini nahimo sulod sa daghang katuigan, nakita n'yo, apan kini mao na ang oras sa kapadayagan, kita n'yo, kita n'yo, nga ginapadayag sa pag-abot mismo sa Pangasaw-onon; sa kaulahiang pagtapos, mangabot ang katapusang mga butang. Patapos na kini, higala, sa pagtoo ko. Kanus-a man? Wala ako masayod. Ako—dili ko masulti kaninyo. Apan kung unsa man . . . gusto kong magkinabuhi karong gabhiona nga mora ba kini og sa niining gabhiona na kini, nga andam na ako. Kita n'yo? Mahimong moabot na Siya niining gabhiona, bisan pa man, ug tingali dili pa Siya moabot sulod sa baynte ka tuig. Wala ako masayod kung kanus-a Siya moabot. Apan bisan kanus-a man kini, . . . Ug tingali ang akong kinabuhi matapos na, niining gabhiona; ug, dayon, unsa man ang akong mga nabuhat dinhi, kini mahuman sa oras na niana. Ako—siguradong pagatagboon ko Siya didto sa paghukom, sa paagi

kung unsa ang pagkamatay ko dinhi. “Kung asa naharag ang kahoy, didto kini matumba.”

122 Hinumdomi, sa dihang nangadto sila aron sa pagpalit unta og Lana, sila . . . “Oh,” moingon kamo, “karon sa makadiyut lang, Igsoong Branham. Wala ako masayod bahin niana.” Sa dihang nangadto sila aron sa pagpalit og Lana, niadtong nakabalik na sila, ang Pangasaw-onon wala na ug sirado na ang pultahan. Ug nanuktok sila, ug miingon, “Pasudla kami! Pasudla kami!” [Nagapanuktok si Igsoong Branham sa makadaghang higayon sa pulpito—Ed.] Apan sila didto na sa gawas sa bug-os nga kangitngit.

123 Karon, kung gusto ninyo og niana nga tipo, karon tan-awa. “Sa mga adlaw ni Noe,” miingon si Jesus, nagpahanungod ngadto niini. Karon, sa panahon ni Noe, misulod sila sa arka. Apan gidala sila sa . . . panahon sa paghukom, apan kana—dili kana ang tipo sa Pangasaw-onon ni Cristo.

124 Si Enoch ang tipo sa Pangasaw-onon. Si Enoch! Si Noe miagi, sa Pangasaw-onon . . . miagi didto, sa panahon sa kasakitan, ug nag-antus, ug nahimong palahubog, ug namatay. Apan si Enoch naglakaw sa atubangan sa Dios, sulod sa lima ka gatus ka tuig, ug adunay pagpamatuod nga, “nakapahimuot siya sa Dios,” pinaagi sa pagtoo nga makapalalin; ug milakaw lang siya sa gawas, ug gisakgaw ngadto sa langit, ug Mipauli nga wala man lang nakatilaw og kamatayon; wala man lang, namatay.

125 Usa kana ka tipo sa, “Kita nga mga buhi ug nahabilin, dili magauna, o magapugong, niadtong mga matang sa mga tawo nga nangatulog,” nga nahikatulog tungod sa tawhanong edad, tungod sa—tungod sa katigulangan sa edad. Nangamatay sila kaniadto, apan dili sila patay. Nahikatulog lang sila. Amen. Nangatulog sila, dili nga patay. Ug ang bugtong butang lang nga gikinahanglan niini mao nga pukawon sila sa Pamanhonon. Oo. “Ug kita nga mga buhi ug nahabilin, dili magapugong niadtong nahikatulog na. Kay ang trumpeta sa Dios magatingog, ug ang nangamatay diha kang Cristo magapamangon una; dayon kita nga mga buhi ug nahabilin pagasakgawon sa dungan uban kanila, ug pagatagboon nato ang Ginoo diha sa kawanangan.”

126 “Ug ang tanang uban pa nga mga nangamatay dili sila mangabuhi pag-usab hangtud nga matapos una ang usa ka libo ka tuig.” Tan-awa ninyo, moagi sila sa panahon sa Kasakitan.

127 Unsa man kadto? Sama ni Enoch. Kabalo mo, gibantayan ni Noe si Enoch. Kay, niadtong nahibaloan niya nga nawala na si Enoch, nahibalo siya nga haduol na ang paghukom. Kinahanglan niya nga magpabilin sa palibot sa arka.

128 Apan wala sakgawa si Noe. Gipalutaw lamang siya sa usa ka gamay’ng butang, ug gilabang ang mga kasakitan. Gidala siya patabok sa panahon sa kasakitan, aron mamatay sa

kamatayon tungod sa edad. Kita n'yo? Apan gipalabang si Noah sa kasakitan.

¹²⁹ Gilalin si Enoch, nga wala moagi og kamatayon, nga usa ka tipo sa Iglesia nga gisakgaw uban niadtong mga nangatulog, aron tagboon ang Ginoo diha sa kahanginan, ug ang tanang uban pa sa iglesia miagi ngadto sa panahon sa Kasakitan. Dili ko na maisaysay kini sa uban pang paagi, sa akong kaugalingon. Si Enoch, gisakgaw, nga walay kamatayon.

¹³⁰ Karon magsugod kita sa pagtuon og gamay karon, moadto na kita sa atong leksyon. Kung magpabilin lang ako dinha, dili gayud nato mahisgotan kini, kining Selyo. Karon matikdi. Hisgotan nato karon, tungod kay magkaaduna kita og, kauban niini, siguro ugma sa gabii o sa sunod nga gabii, mahisgotan nato ang Trumpeta, karon ug unya, tungod kay nagatingog ang Trumpeta dungan sa mga Selyo. Managsama ra kini nga butang. Ang kapanahonan sa iglesia nagasugod, ang . . . managsama ra kini nga butang. Kita n'yo?

¹³¹ Karon, ang trumpeta kanunay nangahulogan og gubat o, kondili, ang kagubot sa politika, ingon niana ang trumpeta, pulitikanhong kagubot, ug nagapahinungdan kana og gubat. Pag makighilambigit ka sa politika, ug magkahinungdan nga magkagubot, sama sa aduna kita sa karon, bantayi, ang gubat nagakahaduol na. Apan, kita n'yo, ang gingharian gipanag-iyu pa sa gihapon ni Satanas. Gigunitan pa niya kini nga bahin sa gihapon diha sa iyang kamot.

¹³² Tungod kay ngano man? Gitubos na kini ni Cristo, apan ginabuhat Niya ang pagka-Kabanay'ng Manunubos, ginatawag ang Iyang mga ginsakupan, hangtud nga ang katapusang usa nga (ngalan) nga naisulat nianang Basahon, nakadawat na Niini ug bug-os na nga naselyohan. Karon nasabtan n'yo ba kini? [Nagaingon ang kongregasyon, "Amen."—Ed.]

¹³³ Dayon miduol Siya gikan sa Iyang Trono, sa Trono sa Iyang Amahan, miduol didto, gikuha ang Libro gikan sa kamot sa Dios, gikan sa Trono, ug giangkong ang Iyang katungod. Ang unang butang nga Iyang gibuhat mao ang pagtawag sa Iyang Pangasaw-onon. Amen! Dayon unsay Iyang kuhaon? Kuhaon Niya ang Iyang kaaway, si Satanas, ug gapuson kini, ug itambog kini ngadto sa kalayo didto, kauban ang tanan nga nanagsunod niini.

¹³⁴ Karon, hinumdomi, dili kana ang Russia. Dili. Ang anticristo usa ka buutan nga tawo. Bantayi lang kung unsa siya ka buutan. Maalam siya, karon. Oo, sir. Gikinahanglan lamang ang Espiritu Santo; ang bugtong butang nga makabuntog kaniya.

¹³⁵ Himatikdi, ang mga Trumpeta nangahulogan og pulitikanhong kagubot, mga gubat. Sa Mateo 24, si Jesus naghisgot mahitungod niini. Miingon Siya, "Makadungog kamo og mga gubat ug mga dungogdungog nga mga gubat, kita n'yo,

nga magapadayon hangtud sa karon.” Mahinumdoman ninyo ang . . . si Jesus naghisgot nianang, “Gubat, mga dungogdungog ug mga gubat, ug mga dungogdungog ug mga gubat, ug magapadayon hangtud sa katapusan.” Karon, kana mao ang mga Trumpeta nga nagatingog.

¹³⁶ Karon, pagmakadangat na kita mahitungod sa mga Trumpeta, mobalik kita dinha ug hisgotan ang matag usa sa niining mga gubat, ug ipakita kaninyo nga ang mga niini nanagsunod niining mga iglesia, ipakita kaninyo nga nagasunod ang mga niini sa niining mga Selyo. “Mga gubat ug mga dungogdungog nga mga gubat.” Apan, ang Trumpeta, nangahulogan og pulitikanhong kagubot.

¹³⁷ Sanglit, ang mga Selyo adunay kalambigitan sa relihiyosong kagubot. Kita n’yo? Pag-giablilian ang usa ka Selyo, nagaabot ang usa ka Mensahe. Ug dayon ang iglesia ingon na ka-estabilisado sa kaugalingon niining politikanhong mga pamaagi, ug sa kung unsa pa, ug sa tanan nang pagkadungganon niini. Ug sa pag-abot nianang tinuod nga Mensahe, mosangyaw kana nga mensahero ug pangmakmakon niya sila og ayo. Husto kana. Usa kini ka pangrelihiyong kagubot sa dihang ginaablilian na ang usa ka Selyo. Mao kana kon unsay nagakahitabo. Oo. Oo.

¹³⁸ Silang tanan anaa na sa kaharuhay diha sa Zion. Ang iglesia bug-os nang estabilisado, ug, “Nahimo na gyud nato kini.” Sama ra sa church of England, estabilisado na sila kaayo. Ang iglesiang Katoliko, estabilisado na kaayo, ug dayon miabot si Luther. Nagkaaduna og usa ka pangrelihiyong kagubot. Oo, sir! Sigurado! Bueno, nabahin ang iglesia, tungod ni Zwingli. Ug gikan kang Zwingli, miabot ang nagkalainlaing uban pa niini, ug si Calvin. Ug wala magdugay, ang iglesiang Anglican nahimong estabilisado na, ug nagpaharuhay kini, ug dayon miabot si Wesley. Nagkaaduna na usab og pangrelihiyong kagubot. Husto kana. Kita n’yo, kanunay kining nangahulogan og pangrelihiyong kagubot.

¹³⁹ Karon, ang Selyo. Basahon lang nato Kini og diyutay karon. Gusto ko nga—nga makuha gyud kini, basahon lang nato Kini. Ako nang hisgotan. Akong . . .

Ug nakita ko sa dihang ang Cordero mibukhad sa usa sa pito ka mga selyo, (unsa ma’y nahitabo?) ug nadungog ko, sama kini sa tingog sa usa ka dalugdog, . . .

¹⁴⁰ Oh, gusto kong magpabilin niana sa pipila lang ka minuto! Ug ako nagalaum karon nga ang tanang mga tawo nga nasayod niining mga butanga ug nanagpaabot og kahupayan sa Ginoo, managtuon karon og ayo; ug kadtong mga nagapaminaw sa teyp, usab, nga pamalandungan ninyo kini.

¹⁴¹ Ang unang butang nga nahitabo, sa dihang giablilian sa Kordero kanang Unang Selyo, usa ka Dalugdog ang nagdahunog. Karon, aduna kana og kamahinungdanon.

Kini adunay...Mahinungdanon kaayo kini. Aduna kini og kahulogan. May kahulogan kini. Walay butang nga nagakahitabo nga walay kahulogan. Husto, usa ka Dalugdog, usa ka Dalugdog ang nagdahunog. Makapatingala kung unsa kaha ang kanang Dalugdog?

¹⁴² Karon magbasa kita og dugang pa. Ablihan nato sa Mateo . . . Dili, kuhaon nato ang San Juan, usá. Sa San Juan, ika-12 nga kapitulo, ug ipabilin lang kana dinha sa makadiyut. San Juan, sa ika-12 nga kapitulo. Ug karon sugdan nato sa ika-23 nga bersekulo sa San Juan 12. Karon paminaw dinhi, karon, og maayo, dayon dili na kamo kinahanglan matingala pa kung unsa kini.

Ug si Jesus nagtubag kanila, nga miingon, Miabot ang takna, nga ang Anak sa tawo pagahimayaon.

¹⁴³ Kita n'yo, anaa na kamo sa katapusan sa kapanahonan, ania na. Pahuman na ang Iyang ministeryo. Kita n'yo? "Miabot na ang takna, nga ang Anak sa tawo pagahimayaon."

¹⁴⁴ Unsa na man ang bahin sa, "Miabot na ang takna nga ang Pangasaw-onon kinahanglan na nga pagasakgawon"? Unsa? Miabot na ang takna, nga, "Matapos na ang panahon." Andam na ang Manulonda nga itunob ang usa ka tiil sa yuta, ug ang usa pa diha sa dagat, nga adunay usa ka balangaw diha sa ibabaw Niya, nga nagatindog, ug nagaingon, "Human na ang panahon." Ug gawas pa niana, gipataas Niya ang Iyang kamot ug nanumpa nga "pahuman na ang panahon," pag-mahitabo na kini. Unsa—daw sa unsa ka hingpit kini, usa mismo ka pinanumpaang pamahayag ngadto sa Iglesia!

. . .Miabot na ang takna, nga ang Anak sa tawo pagahimayaon.

Sa pagkamatuod, sa pagkamatuod, nagaingon ako kaninyo, Gawas kong ang usa ka lugas sa trigo mahulog sa yuta ug mamatay, magapabilin kini nga mag-inusara; apan kong mamatay kini, magabunga kinig daghan.

Siya nga nahagugma sa iyang kinabuhi mawad-an hinoon niini; . . .siya nga nagadumot sa iyang kinabuhi dinhi niining kalibutana magapatunhay niini alang sa kinabuhing walay katapusan.

Kon kinsa ang moalagad kanako, monunot siya kanako; ug diin gani ako, atua . . .usab ang akong alagad: kon kinsa ang moalagad kanako, siya pagapasidunggan sa akong Amahan.

Karon naguol ang akong kalag; . . .

¹⁴⁵ Moingon ka, "Bueno, Siya, sa pag-abot Niya sa katapusan niining panaw, ug naguol gani?" Unsa na lang kaha pagmay mahitabo nga usa ka dakung espirituhanong butang kanimo, nga magapaguol kanimo? Oh, grabe! Uh-huh!

Karon naguol ang akong kalag; ug unsay igaingon ko? Amahan, luwasa ako gikan niining taknaa: apan tungod niini mianhi ako niining kalibutana, sa niining taknaa.

Amahan, himayaa ang imong ngalan. Unya miabot gikan sa langit ang usa ka tingog, nga nagaingon, Gihimaya ko na kini, ug pagahimayaon ko kini pag-usab.

Ang mga tawo miingon, nga nanag-alirong, nga nagpakadungog niini, miingon sila . . . midalugdog: . . .

146 Dayon, sa dihang gikuha sa Cordero ang Basahon ug giablihan ang Unang Selyo, ang Dios nagsulti gikan sa Iyang Walay Katapusang Trono, aron isulti kung unsa kadto nga Selyo, nga igapadayag. Apan sa dihang giplastar kini sa atubangan ni Juan, anaa Kini diha sa usa ka simbolo. Pagkakita Niini ni Juan, usa gihapon Kadto ka tinago. Ngano man? Wala man kini napadayag niadtong tungora mismo. Dili Kini mahimong ipadayag hangtud nga moingon Siya dinhi, “sa katapusan na nga panahon.” Apan miabot kini nga usa ka simbolo.

147 Sa diha, nga “midalugdog.” Hinumdomi, ang usa ka makusog nga paglipak nga dinahunog sa usa ka Dalugdog maoy usa ka Tingog sa Dios. Mao kana ang ginaingon sa Biblia, kita n’yo, “usa ka paglipak sa Dalugdog.” Abi nila nga usa lang kadto ka dalugdog, apan ang Dios na diay Kadto. Iyang nasabtan Kadto, tungod kay napadayag man Kadto Kaniya. Kita n’yo? Usa Kadto ka Dalugdog.

148 Ug, matikdi, giablihan ang Unang Selyo. Ang Unang Selyo, sa dihang giablihan Kini diha sa pormang simbolo, nagdalugdog. Karon unsa pa kaha pag-ablihan na Kini diha sa iyahang tinuod nga porma Niini? Grabe. . . Midalugdog mismo sa diha nga gitangtang sa Cordero ang Selyo. Ug unsa man ang gipadayag Niini? Dili ang tibuok Niini. Una, atua Kini sa Dios; sunod, atua Kini sa pormang simbolo; dayon, gipadayag na Kini. Tulo ka butang. Kita n’yo? Nagagikan Kini sa Trono.

149 Una, dili Kini makita, madungog, o unsa pa man. Selyado Kini. Ang Dugo sa Cordero ang nagbayad sa bili.

150 Midalugdog sa dihang gisulti Niya Kini. Ug pagkasulti Niya, usa ka nagasakay sa puting-kabayang ang migawas, ug Kini sa gihapon usa ka simbolo. Karon bantayi, miingon Siya nga Kini igapahibalo diha sa kaulahiyan adlaw. Apan Kini nagaabot diha sa simbolo sa iglesia. Nasabtan n’yo ba kini, iglesia? [Nagaingon ang kongregasyon, “Amen.”—Ed.] Kini nagaabot diha sa—sa usa ka pang-iglesiyan simbolo, nga nasayod sila nga adunay Selyo. Apan kung unsa Kini, bisan pa man, wala sila mahibalo, tungod kay Kini usa ra man ka nagasakay sa puting-kabayang.

151 Ug igapadayag lamang sa kaulahiyan adlaw, sa diha nga ang aktuwal nga Selyo pagaablihan na. Pagaablihan para kang kinsa? Dili kang Cristo, kondili ngadto sa Iglesia. Himatikdi,

karon. Oh, grabe, nakapakurog kana mismo kanako! Ako—ako—nanghinaut ako nga tinuod gyud nga nasabtan Kini sa iglesia, kung unsa ang buot kong ipasabot, kaninyo nga mga tawo. Pagatawgon ko kamo nga Pangasaw-onon, kita n'yo, aron masabtan Ninyo Kini.

¹⁵² Ang Tingog usa ka Dalugdog. Asa man nagagikan ang maong Tingog? Gikan sa Trono kung asa bag-o lang mibiya ang Cordero, ingon nga Tigpataliwala. Karon nagatindog Siya dinhi aron angkonon na ang Iyang katungdanan ug ang Iyang mga katungod. Apan ang Dalugdog naggikan sa sulod sa Trono, nga nagdalugdog pagawas. Ug nagtindog ang Cordero dinhi sa gawas. Ang Dalugdog, migikan kon diin mibiya ang Cordero. Mibiya gikan sa Trono sa Amahan, aron sa pag-adto og kuhaon ang Iyang Kaugalingong Trono. Himaya! Karon, karon ayaw ninyo kini sipyata, mga higala.

¹⁵³ Nasayod kitang tanan, ingon nga mga Cristohanon, nga nanumpa ang Dios ngadto kang David nga pagabanhawon Niya si Cristo aron molingkod diha sa iyang Trono, ug hatagan Siya og walay katapusang gingharian dinhi sa yuta. Gibuhat Niya kini.

¹⁵⁴ Ug si Jesus miingon, “Ang magmadaugon batok sa anticristo ug sa tanang mga butang nga iya sa kalibutan, magalingkod uban Kanako sa Akong Trono, maingon nga Ako nagmadaugon ug naglingkod sa Trono sa Akong Amahan.” Kita n'yo?

¹⁵⁵ Karon, sa umalabot nga adlaw magatindog Siya gikan sa Trono sa Amahan, ug moadto aron kuhaon ang Iyang Kaugalingong Trono.

¹⁵⁶ Karon mitungha Siya aron sa pagtawag sa Iyang mga sakop. Unsaon man Niya pag-angkon kanila? Nakuha na Niya ang Basahon sa Katubsan sa Iyang kamot. Himaya! Oh, daw sa gibati kong mokanta og usa ka himno.

Sa dili madugay pagakuhaon na sa Cordero
 ang Iyang Pangasaw-onon aron nga maanaa
 na kanunay sa Iyang kiliran,
 Ang tibuok panon sa Langit magakatigum,
 (aron pagatan-awon kana);
 Oh, mamahimo kining usa ka mahimayaong
 talan-awon, ang tanang mga balaan nga anaa
 sa walay-buling nga ka puti;
 Ug managkumbira kita kauban ni Jesus sa
 Walay Katapusan.

¹⁵⁷ Oh, grabe! Kanang paghisgotan lang “nga nagalingkod na karon diha sa Langitnong mga dapit”? Unsa pa kaha! Kung mabati na gani nato ang ingon niini, nga ania pa lang sa yuta, nga wala pa ang Pagsakgaw, sa niining kahimtang nga ania kita karon; ug makahimo kita sa paglipay, ug magtindog sa kilid sa mga bongbong, ug magpabilin sa ulan, aron lang madungog Kini; unsa pa kaha kini kung makita na nato Siya nga

nagalingkod didto! Oh, grabe! Oh, mamahimo kining usa gayud ka mahimayaong panahon.

158 Gibiyaan ang Trono sa Amahan, mitungha aron sa...ang Iyang Anak, aron mamahimong...Siya ang Anak ni David. Ingon niana ang gihunahuna sa Israel nga Iyang pagabuhaton kaniadto. Hinumdomi ang babayeng Sirofenisa, nga miingon, “Ikaw nga Anak ni David!” Hinumdomi ang buta nga si Bartimaeus, “Ikaw nga Anak ni David!” Uh-huh! Ug si Jesus, nga nahibalo na sa plano, apan wala sila nasayod niini. Gipaningkamotan nila nga puwersahon Siya ug pugson Siya nga kuhaon ang trono. Ug bisan si Pilato nangutana Kaniya.

159 Apan miingon Siya, “Kung ang Akong gingharian sa niini pa nga kalibutan, nan ang Akong mga alagad nakig-away na unta. Ang Akong gingharian anaa sa Itaas.” Apan miingon Siya, “Kung mag-ampo kamo, pag-ampo og, ‘Umanhi ang Imong Gingharian. Pagabuhaton ang Imong kabubut-on dinhi sa yuta, maingon sa Langit,’” Amen. Uh-huh! Pagkamahimayaon kining dakung butang!

160 Gibiyan ang Trono sa Amahan, aron kuhaon ang Iyang Kaugalingong Trono. Siya karon nianang tungora mihawa gikan sa Iyang buluhaton nga pagpangaliya, aron angkonon ang Iyang Kaugalingong Trono, ang Iyang tinubos nga mga sakop. Mao kana ang hinungdan sa Iyang pagbiya gikan sa Trono aron buhaton. Niadtong tungora dayon nga ang susama’g-leon nga Binuhat miingon kang Juan, “Umari ka, tan-awa.” Bantayi. Ginabasa ba ninyo kini?

*...usa sa mga selyo, ug kini...daw sama kini sa
usa ka tingog sa dalugdog, ug ang usa sa upat ka mga
buhing-binuhat...*

161 Kabalo na mo kung unsa ang mga Buhing-binuhat. Nahisgotan na nato sila. “Ang usa sama sa leon; ang usa sama sa nating-baka; ug ang usa sama sa tawo; ug ang usa sama sa agila.” Karon, kining unang Buhing-binuhat miingon...Bantayi, ang matag panahon adunay nagkalainlaing Buhing-binuhat, hangtud nga nakalabay na kining upat ka mga mangangabayo. Adunay upat ka mga Buhing-binuhat, ug adunay upat ka mga mangangabayo.

162 Himatikdi, naga-anunsiyo ang matag usa sa niining mga Buhing-binuhat. Mateo, Marcos—Marcos, Lucas, ug Juan. Balikan nato ug pamatud-an hain man sa, Mateo, Marcos, hain man sa Marcos—Marcos, hain man sa Juan, ang matag usa kanila samtang sila!...?...

*...ang usa sa...mga buhing-binuhat nagaingon,
Umari ka...tan-awa.*

163 Nakadungog siya og tingog sa usa ka dalugdog. Ug ang usa sa mga Buhing-binuhat miingon, “Karon umari ka, tan-awa.”

164 Sa ubang pinulongan, karon, *ania* nagatindog ang Cordero, ug si Juan nagatindog didto og nagalantaw samtang nagakahitabo kini. Ang Cordero mitindog gikan sa Trono, nga daw Siya gipatay, Duguan Siya. Siya lamang ang Usa nga hingkaplagan nga takus. Ug sa dihang gikab-ot Niya ug gikuha ang Basahon, dayon nagsugod ang tanan sa paghugyaw, ug pagsinggit, ug nanagkalipay, nakita n'yo, tungod kay hingbaloan nila nga ang kaluwasan nabayran na.

165 Karon mianhi Siya aron angkonon ang mga Iyaha Mismo. Busa, gikuha Niya ang Basahon, mitindog didto sa atubangan ni Juan, ug gibira Niya Kini ug giablihan ang Selyo. Gibira aron matangtang ang Selyo! Ug sa dihang gibira Niya ang Selyo paubos, naglipak ang Dalugdog sa tanang dapit. Ug sa dihang naglipak ang Dalugdog, walay pagduhaduha nga milukso tingali si Juan, sa dihang nagdinahunog ang Dalugdog.

166 Ug dayon ang usa sa upat ka mga Buhing-binuhat miingon, “Karon umari ka, tan-awa kung unsa Kini, kung unsa ang napadayag sa ubos dinhi.” Oh, grabe! “Juan, isulat mo kung unsay imong nakita.” Busa miduol si Juan aron tan-awon, tan-awon kung unsa Kadto. Miduol si John aron tan-awon kung unsay gisulti sa Dalugdog. Niadtong tungora dayon nga ang maong Binuhat misulti kang Juan, “Umari ka, tan-awa kon unsa ang tinago nga napailalum sa Unang Selyo.” [Nagapanuktok si Igsoong Branham sa pulpito sa upat ka higayon—Ed.] Ang Dalugdog, ang Tingog sa Magbubuhat ang nagsulti Niadto. Karon, kinahanglan nga hibaloan Niya kung unsa ang atua Didto. Kita n'yo? Oh, grabe! Apan, hunahunaa n'yo ha, siya'y nagsulat Niini.

167 Apan sa diha nga sugdan na niyang isulat ang kadtong uban pa sa, Pito ka mga Dalugdog, Siya miingon, “Ayaw Kini isulat.” Gisugo siya nga isulat ang tanang butang nga iyang nakita. Apan sa dihang ang Pito ka mga Dalugdog, diha sa Pinadayag 10, nagsulti, Siya miingon, “Ayaw isulat ang mga Niini, sa unsa mang paagi.” Mga tinago kini. Wala pa nato nahibaloan kung unsa gayud kini. Apan, sa akong opinyon, mapadayag ra sila sa dili madugay. Ug sa dihang maipadayag na kini, magahatag kini og pagtoo alang nianang makapasakgaw nga grasya, aron puede nang mobiya kanang Iglesia. Kita n'yo?

168 Giagian na nato ang tanan nga atong nahibaloan, ang tanang mga dispensasyon. Nakita nato ang tanan. Ug nakita nato ang mga tinago sa Dios. Nakita nato ang pagtungha sa—sa dakung panaghiusa sa Pangasaw-onon sa katapusang mga adlaw. Apan, bisan pa man, aduna pa'y butang Dinha nga dili pa gyud nato maiklaro sa atong kaugalingon. Adunay sa kung unsa pa.

169 Apan mahunahuna ko, sa dihang ang maong mga tinago nagasugod na'g panungha, ang Dios miingon, “Pugngan mo Kini. Hulat sá. Igapadayag Ko lang Kini sa nianang

adlawa. Ayaw Kini isulat, ayaw gayud, Juan, tungod kay sila mangapandol lang Niini. Pasagdan—pasagdi lang kini, kita n'yo. Apan igapadayag Ko lang Kini sa nianang adlawa pag-kinahanglan na nga buhaton kini.”

¹⁷⁰ Wala gyud sila nagsulti nga walay kapuslanan. Hinumdomi, sama sa usa ka gamay'ng tulo sa tinta, ang tanang butang adunay katuyoan. Ang tanang butang adunay hinungdan. Apan, himatikdi, nagsulti ang Magbubuhat. Ug iyang—nadungog ni Juan kining Tingog, ug siya miadto aron tan-awon.

¹⁷¹ Apan karon ginapakita sa Cordero kang Juan, diha sa simbolo og . . . usa—usa ka kasulatan sa iglesia, medyo, aron masayran sa iglesia. Kung unsa ang angay niyang isulat, gipakita Niya ngadto kaniya. Miingon, “Karon, ayaw—ayaw kini isulti, ang eksakto lang kung unsa kini. Ayaw na nga isaysay, Juan, ug moingon, ‘Karon, ingon niini kini kung unsa kini, kung unsay anaa sa ilalum niining Ikapitong Selyo.’ Ayaw, ayaw na nga isaysay ug isulti pa kana. Tungod kay, kung itug-an Ko kana kang Juan, nan ang tanan diha sa mga kapanahonan, ang tibuok plano mahibal-an na. Usa Kini ka sekreto.” Kita n'yo? Gusto lamang Niya . . . ang Iya kining Pag-anhi! Miingon Siya, karon, “Ug walay-usa nga mahibalo kon kanus-a Ako moabot. Basta moabot na lang Ako.” Kita n'yo? Kita n'yo? Kana lang. Dili ko buluhaton kini aron hibaloon kung kanus-a. Basta mangandam lang ako, nakita n'yo. Busa dayon miingon siya . . .

Karon miadto si Juan, naghunahuna siya, “Makita ko na Kini karon.”

¹⁷² Ug unsay gibuhat niya, sa dihang miadto si Juan? Siya, karon, unsa ang kinahanglan niyang buhaton? Karon kinahanglan niyang isulat kini ngadto sa kapanahonan sa iglesia. Mao kana ang angay niyang buhaton, isulat kini ngadto sa mga kapanahonan sa iglesia. “Isulat kung unsa ang imong makita sa niining Pito Ka Mga Tangkawan Nga Bulawan, sa sugod pa lang. Isulat mo kini sa niining iglesia ug isulti kanila.” Husto.

¹⁷³ Ug midahunog ang usa ka Dalugdog. Nasayod si Juan nga kadto mao ang Tingog sa Dios. Ug dayon ang—ang susama'g-leon nga Binuhat miingon, “Umari ka, tan-awa kung unsa kini.” Ug miadto karon si Juan, dala ang iyang igsusulat, aron isulat kung unsa ang iyang makita.

¹⁷⁴ Karon, wala niya makita eksakto kung unsa gyud kadto. Wala niya kadto masabti. Apan kung unsa ang iyang nakita mao ang ginapadala sa Dios ngadto sa iglesia alang “sa maong panahon.” Karon kinahanglan Niyang . . . buhaton man Niya kini; Kanunay man Niya kining ginabuhat; Ginaklaro man Niya kini kung panahon na aron iklararong kini. Apan wala pa Niya kadto giklaro niadtong panahona. Ngano man? Tungod kay, ipapabilin Niya kining tinagdo hangtud sa katapusang kapanahonan. Ug ang

pagtingog na sa Mensahe sa ulahing manulonda maoy motigum sa niining mga tinago. Kita n'yo?

¹⁷⁵ Wala kadto gipaklaro. Apan ang nakita ni Juan, nakita niya lang ang, "Usa ka puting kabayo nga migawas, nga adunay nakasakay niini," busa kadto lang ang iyang gisulat, kita n'yo, sa dihang nakita niya.

Mao kana ang iyang giingon, "Umari ka, tan-awa."

¹⁷⁶ Busa miadto si Juan aron tan-awon kung unsa ang puede niyang makita, aron isulat ngadto sa iglesia. Ug sa dihang miadto siya, nakita niya ang, "Usa ka puting kabayo, ug ang nagsakay niini adunay usa ka pana; ug siya milakaw nga nagmadaugon, ug aron sa pagpangdaug; ug adunay gihatag kaniya nga usa ka korona." Ug, karon, kadto lang tanan ang nakita ni Juan, busa gisulat lang niya, kadto lang tanan ang nasulat. Karon, kita n'yo, naka-simbolo kadto. Sa ingon niana nga paagi Kini nga nadawat sa iglesia.

¹⁷⁷ Apan, tungod sa saad, ug sa kaulahiing adlaw Iyang ipadayag Kini, igapakita kung unsa Kini. Dios, tabangi kami aron masabtan namo. Mga kapanahonan sa iglesia, apan wala kini bug-os gipahibalo hangtud sa ikapitong Mensahe, sa niining kaulahiing kapanahonan sa iglesia. Matikdi, nagpasugod siya . . .

¹⁷⁸ Kining mensahero sa ikapitong kapanahonan sa iglesia, kung mamatikdan ninyo, wala siya nagpasugod og usa ka denominasyon, sama sa gibuhay sa uban pa kanila. Hinumdomi, kung wala siya nagpasugod og . . . Dili. Kung makita ninyo siya, batok siya niini. Dili ba si Elias, dili ba batok niini si Elias kaniadto? Sigurado, batok gayud siya. Dili ba batok niini si Juan kaniadto, tungod sa Espiritu ni Elias?

¹⁷⁹ Unsang matang ba sa Espiritu nga aduna si Elias kaniadto? Siya'y . . . Wala ni usa ang nahibalo bahin kaniya. Tawo lamang siya, apan usa siya ka propeta. Gikadumtan siya. Grabe! Ug unsa mang panahona nga siya mitungha? Sa mismong panahon sa pagka-popular sa Israel, sa dihang tanan sila kaniadto nahimong kalibutanon. Ug nakuha niya kini didto, ug siya gibansagan nga "madumtanon-og-babaye." Uh-huh. Oo, sir. Sigurado gyud. Ug mahigugmaon siya sa kamingawan. Mao kana ang iyang kinaiya.

¹⁸⁰ Mao nga, sila nga mga tawo nahibalo na unta sa dihang kanang tawhana mitungha didto nga dala kanang mao ra nga Espiritu nga anaa kaniya, nga miadto didto, kining si Juan. Wala nakabisti og sama sa mga bantugang-tawo, sama sa giingon ko kagabii; mga tawong mohalok sa mga bata, ug mangkasal ug manglubong, ug uban pa. Apan miadto didto kini nga tawo ingon nga usa ka tawong lasangnon. Unsa man siya kaniadto? Mahigugmaon siya sa kamingawan. Ang usa pa ka butang kaniya, gikadumtan niya ang denominasyon. Miingon siya,

“Karon, ayaw gayud kamo pagsulti, ‘Miyembro man kami og *ingon niini* o *niana*,’ kay sultihan ko kamo, ang Dios makahimo niining mga bato, sa pagpatindog og mga anak alang kang Abraham.”

¹⁸¹ Dili siya tawong mopakigkompromiso. Dili nila mahimo . . . Miingon, “Nangadto ba kamo aron makita ang usa ka tigbaw nga ginapalid-palid sa hangin? Dili ingon niana si Juan.” Dili, sir.

¹⁸² Unsa man ang iyang gibuhay, usab? Sama lang ni Elias nga nagsulti kang Jezabel, siya nagsulti usab kang Herodias. Miadto siya mismo sa atubangan ni Herodes, ug miingon, “Dili uyon sa balaod alang kanimo nga pangasaw-onon siya.” Gipapunggotan siya’g ulo ni Herodias, tungod niadto. Kita n’yo? Gipaninguhaan kaniadto ni Jezabel nga patyon si Eliseo. Kanang mao ra nga espiritu, nga atua kaniadto kang Jezabel, anaa usab nianang bayhana.

¹⁸³ Ug ang mao rang butang ang anaa usab sa iglesiang Jezabel sa karon, mao rang butang. Karon matikdi kini. Pagkadakung leksyon ang atong makita dinhi!

¹⁸⁴ Ug, karon, mora og naila na unta siya niadtong mga tawo. Sa misugod na si Juan og pagpangbadlong kanila nga mga tawo, ug nagabarug didto, medyo mahibaloan na nila unta nga mao na kadto ang Espiritu ni Eliseo. Nasabtan na nila unta kadto. Nga ingon niana siya.

¹⁸⁵ Karon, ug makita nato, ug makita mismo sa mga kapanahonan sa iglesia, pinasubay sa Kasulatan, nga gikasaaran kita nga kanang Espiritu magabalik, sa dili pa ang katapusan sa panahon. Tinuod ba kana? [Nagaingon ang kongregasyon, “Amen.”—Ed.]

¹⁸⁶ Karon, ug matikdi, inyong mamatikdan ang kinaiya niini. Karon, dili siya magpasugod og usa na usab ka kapanahonan sa iglesia, sama ni Luther, ug Wesley, ug sa tanang uban pa kanila nga nagpasugod niini. Ayaw niyang magpasugod og usa na usab ka iglesia, tungod kay wala na’y mga kapanahonan sa iglesia nga sugdan na usab. Kita n’yo? Wala na’y mosunod pa. Busa siguradong batok gyud siya niini, tungod kay ang iyang Espiritu mamahimong eksaktong susama gayud kanila kaniadto, ingon nga mao ra nga Espiritu.

¹⁸⁷ Sama sa giingon ko na kagabii, nakapahimuot kini sa Dios nga gamiton Kini sa tulo ka nagkalainlaing mga panahon. Mao kana ang Iyang numero, tulo, dili duha; tulo. Nagamit na Kini sa makaduhang higayon, karon gamiton Niya usab Kini. Maoy Iyang giingon, gisaad na kini. Karon matikdi, siya’y . . .

¹⁸⁸ Himatikdi karon, pag-gibuhay na kini sa Dios. Dili Siya magpasugod og usa ka denominasyon, tungod kay ang Kapanahonan sa Iglestiag Laodicea mao ang kaulahiag kapanahonan. Ug ang mensahero, sa ikapitong manulonda, nga mao ang ikapitong mensahero, ngadto sa ikapitong

kapanahonan sa iglesia, mao ang tawong magapadayag, pinaagi sa Balaang Espiritu, sa tanan niining tinagong mga butang. Kana mamahimong . . . Pila man ang ania dinhi kagabii? Patanaw sa inyong kamot. Siguro dili ko na Kini kinahanglan nga basahon pa pag-usab, kung ingon niana. Kabalo na mo kung asa kini, sa—sa ika-10 nga kapitulo, kita n'yo. Oo. Sige.

189 Miabot ang mga repormador aron ireporma ang katapusang nahulog nga kapanahonan sa iglesia nga nag-una kanila. Ug dayon, pagkahuman nga miabot ang mga repormador ug nareporma ang—ang kapanahonan sa iglesia gikan sa kung asa kini kaniadto, ug mibalik na usab sa kalibutan, dayon nagpasugod sila og bag-ong kapanahonan sa iglesia. Kanunay nila kining ginabuhat, kaniadto pa. Karon, nahisgotan na nato kana. Kita n'yo?

190 Sa laing pagkasulti, *dinhi* ang dugay nang kapanahonan sa iglesiang Katoliko, sa iglesiang Romano Katoliko. Dayon miabot si Luther, usa ka repormador. Gitawag siya nga usa ka repormador. Ug unsay iyang gibuhat? Nagsugod siya kaniadto, nga nangdukduk og ayo. Ug, sa pagbuhat niya niadto, giprotestahan niya ang iglesia. Ug, mahibaloan mo na lang, unsa ang iyang gibuhat? Mitukod siya og mao rang butang nga iyang giahian aron protestahan, usa na usab ka iglesia.

191 Dayon nagkaaduna sila og usa pa ka kapanahonan sa iglesia. Dayon, mahibaloan mo na lang, ania na usab . . . Ang Napaingon na usab sa kagubot ang maong kapanahonan sa iglesia. Dayon miabot si John Wesley, usa na usab ka repormador. Kita n'yo, nagpasugod og usa na usab ka kapanahonan sa iglesia. Nakuha ba ninyo ang buut kong ipasabot? Nagpasugod og usa na usab ka kapanahonan sa iglesia. Tanan sila mga repormador.

192 Himatikdi, sa niining katapusang Mensahe, sa katapusan nga kapanahonan sa iglesia, dili na usa ka repormador. Usa na siya ka propeta, dili usa ka repormador. Ipakita n'yo kanako kung aduna ba ni usa ka propeta nga nagpasugod og usa ka kapanahonan sa iglesia. Dili na kini usa ka repormador. Usa siya ka propeta.

193 Ang uban mga repormador lamang, apan dili mga propeta. Kung sila kaniadto mga propeta, ang Pulong sa Ginoo miabot unta kanila. Mao kana ang hinungdan nga nagpadayon sila diha sa bautismo sa “Amahan, Anak, Espiritu Santo,” og sa tanan niining uban pang mga butang, tungod kay mga repormador man sila, ug dili mga propeta. Apan bisan pa niana sila'y mga halangdon nga tawo sa Dios, ug nakita ang panginahanglan sa adlaw nga ilang gikinabuhian. Ug gidihogan sila sa Dios, ug gipadala sila didto ug gipangbadlong og ayo kadtong mga butanga. Apan ang kinatibuk-ang Pulong sa Dios wala gyud miabot kanila, tungod kay sila dili man mga propeta. Sila mga repormador.

194 Apan sa kaulahi-ang mga adlaw, gikinahanglan na ang usa ka propeta, nga maoy magpadayag sa mga tinago sa Dios, aron mapahibalik kini, tungod kay sa mga propeta lamang ginapadayag ang mga tinago. Busa, kinahanglan gyud nga moabot kining tawhana. Nakita ba ninyo kon unsa ang buut kong ipasabot karon? Dili siya puedeng usa ka repormador. Kinahanglan usa gyud kini ka propeta, tungod kay nagkinahanglan kini og usa ka tawong adunay gasa ug mapahiluna didto, nga kaniya nagaabot ang Pulong.

195 Karon, nahibaloan niadtong mga repormador nga aduna gyu'y sayup. Nasayod si Luther niini, nga ang tinapay dili mao ang lawas ni Cristo. Ug busa nagwali siya, "Mabuhi ang matarung pinaagi sa pagtoo," ug mao kadto ang iyang mensahe. Ug sa pag-abot ni John Wesley, nakita niya nga aduna kinahanglan og pagpakabalaan, busa nagwali siya og pagpakabalaan. Mao kadto ang iyang mensahe. Kita n'yo? Ang mga Pentecostal usab naghatud og mensahe mahitungod sa Espiritu Santo, ug uban pa.

196 Apan sa kaulahi-ang mga adlaw, sa niining kaulahi-ang kapanahonan, ang mensahero niini dili magpasugod og unsa man nga repormasyon, kondili kuhaon ang tanang mga tinago nga wala nasulbad niadtong mga repormador, ug tigumon kini ug sulbaron kini ngadto sa mga tawo. Tugoti kong basahon ang Kini pag-usab. Pagkamaanindot kini paminawon para kanako! Ako—gusto kong basahon Kini.

... Nakita ko ang usa ka kusgan nga manulonda nga nanaug gikan sa langit, nga sinul-oban sa usa ka panganod: . . . usa ka balangaw . . . anaa ibabaw sa iyang ulo, ug ang iyang nawong . . . sa adlaw, ug ang iyang mga tiil maingon sa mga haligi nga kalayo:

197 Karon, nakita nato ang mao mismong butang, nga mao si Cristo. Ug nahibaloan nato nga si Cristo mao sa kanunay ang Mensahero ngadto sa Iglesia. Oo. Pagatawgon Siya nga Haliging Kalayo, ang Manulonda sa Pakigsaad, ug uban pa.

Ug may usa ka basahon nga diyutay nga nabuklad diha sa iyang kamot: . . .

198 Karon, ang mga Selyo human na nga naablihan, dinhi. Ginaablihan na nato ang mga niini karon. Apan, kini, abli na ang maong Butang.

. . . ug gitunob niya ang iyang tiil nga too diha sa dagat, ug ang iyang wala . . . diha sa yuta,

Ug siya misinggit . . . sa makusog nga tingog, maingon sa usa ka leon nga nagangulob: ug sa iyang . . . pagsinggit, mitingog ang pito ka mga dalugdog. (Grabe! Ang tanan gyud!)

Ug sa nakatingog na ang pito ka mga dalugdog, ako si Juan isulat na unta (isulat ang unsa?) ang unsay giingon nila: ug akong hingdunggan ang usa ka tingog gikan sa langit (Dios) nga nagaingon kanako, Ililong ang gisulti sa pito ka mga dalugdog, ug ayaw kini isulat. Dili mo isulat ang mga niini. (Kita n'yo?)

Ug ang manulonda nga nakita ko nga nagatindog sa dagat. . . mibayaw sa iyang mga kamot ngadto sa langit,

Ug nanumpa sa niadtong buhi sa walay katapusan, nga nagbuhay sa mga langit, ug sa mga butang nga ania diha niini, ug sa yuta, ug sa mga butang nga anaa dinha, ug sa dagat, ug sa mga butang nga mga ania niini, nga wala na gayu'y langanlangan pa:

199 Bantayi! Ayaw kalimti kini karon, samtang nagpadayon kita.

Apan sa mga adlaw (mga adlaw) sa tingog sa ikapitong manulonda, . . .

200 Kanang katapusang manulonda, yutan-on nga manulonda. *Kining* Manulonda nga nanaug gikan sa Langit. Dili kadto Siya; Gikan man Siya sa Langit. Apan ang ginahisgotan Niya dinhi mao ang tingog sa ikapitong manulonda, nga maoy usa ka . . . ang *Manulonda* nagkahulogan og usa ka “mensahero,” ang si bisan kinsa man nahibalo niana, ug mensahero kini ngadto sa kapanahonan sa iglesia.

. . . sa mga adlaw sa tingog sa ikapitong manulonda, sa diha nga siya sugod nang magtingog, ang tinago (ang Pito Ka mga Selyo, tanan, ang tanang tinago) sa Dios matapos na, sumala sa mga maayong balita nga gimantala niya sa iyang mga ulipon nga mga propeta.

201 Igapadayag ang tibuok tinago. Mao kana ang ministeryo sa nianang manulonda. Kita n'yo? Mahimo kining yano ra kaayo, nga labyan ra kini sa mga tawo. Apan, bisan pa niana, hingpit kini nga pagapamatud-an. Hingpit kini nga igapadayag. Kita n'yo? Ang si kinsa man nga gustong makakita niini makakita gyud niini. Kita n'yo? Husto kana. Apan kadtong mga . . .

202 Miingon si Jesus, sama sa Iyang giingon sa dihang miabot Siya, miingon, “May mga mata man unta kamo, ug dili man makakita. Gisulti kana ni Isaias nga ingon niana kamo. Kita n'yo? Ug may mga dalunggan man unta kamo, ug dili man kamo makadungog.” Karon, busa makita nato nga . . .

203 Nakapahadlok kana kanako. Milantaw ako dinha nianang orasan ug abi ko nga alas diyes na. Apan, kini, Ako—abi ko . . . Wala pa man mag-alas nuebe, diay, kita n'yo. Sige. Oh, grabe! Tumbokon na nato karon. Himatikdi. Gusto ko kini.

204 Ang uban, ang maong mga repormador, apan, ingon nga mga bantugan nga mga tawo sa Dios, nakita ang panginahanglan sa maong adlaw, ug nagpasugod kadto og repormasyon.

205 Apan nag-ingon ang Pinadayag 10 nga ang iyang Mensahe mao ang pagpadayag, dili pagreporma; pagpadayag sa mga tinago. Ipadayag ang mga tinago! Ang Pulong kini nga anaa sa maong tawo. Miingon ang Mga Hebreohanon 4, nga, “Ang Pulong sa Dios labi pang mahait kay sa espada nga duhay-sulab, nga nagadulot bisan pa sa gitagboan sa bukog, ug usa ka Tigpadayag sa mga tinago sa kasingkasing.” Kita n’yo? Kining tawhana dili usa ka repormador. Usa siya ka tigpadayag, tigpadayag sa (unsa?) sa mga tinago sa Dios. Kon diin ang mga iglesia bug-os nga nangalibog Niini ug tanan na, moabot siya nga dala ang Pulong sa Dios ug igapadayag ang maong butang.

206 Tungod kay, siya ang “magpasig-uli sa Pagtoo sa mga bata balik ngadto sa mga amahan.” Igapasig-uli sa ikapitong manulonda ang orihinal nga Biblikanhong Pagtoo. Karon, oh, gusto ko gayud kini! Ang tanan nga mga tinago mahitungod sa mga Selyo, nga wala mahisabti og ayo sa mga repormador! Kita n’yo? Karon tan-awa ang Malaquias 4, sa kadali. Bueno, markahi na lang ninyo kini. Usa siya ka propeta, ug, “magapasig-uli sa orihinal nga Pagtoo sa mga amahan.” Karon nagapaabot kita nianang tawhana nga motungha sa maong eksena. Kabus ra kaayo siya nga napulo ka minilyon ka pilo nga napulo ka milyon ang. . . Bueno, magkaaduna man pud og diyutay’ng pundok nga makasabot Niini.

207 Kung, mahinumdoman ninyo niadtong usa ka adlaw, sa dihang si Juan gipaabot, gitagna na, nga usa ka mensahero nga moabot sa dili pa ang pag-abot ni Cristo, “usa ka tingog nga magasinggit sa kamingawan.” Nakita siya kaniadto ni Malaquias. Tan-awa, ang ika-3 nga kapitulo sa Malaquias mao ang mahitungod sa pag-abot sa Elias nga ginapaabot ug mag-una sa pag-abot ni Cristo.

208 Moingon kamo, “Oh, dili, dili, Igsoong Branham. Sa ika-4 kini nga kapitulo.” Pasayloa ko ninyo.

209 Miingon si Jesus nga sa ika-3 kini nga kapitulo. Karon kuhaa ang San. . . Ablihi ang San Mateo, ang—ang ika-11 nga kapitulo ug ang ika-6 nga bersekulo, Siya—moingon Siya niini. Ang 11—ika-11 nga kapitulo, nagatoo ko nga sa ika-6 kini nga bersekulo; ika-4, ika-5, o ika-6, dinha lang mismo. Miingon Siya, “Kung madawat ninyo kini,” sa dihang nagapakig-estorya Siya mahitungod kang Juan, “siya kining gipahanungdan, ‘Akong ipadala ang Akong mensahero sa Akong atubangan.’” Karon basaha ang Malaquias 3. Ang uban kanila ginapamugos nga iaplikar kini diha sa Malaquias 4. Dili, sir, dili ingon niana kini.

210 Himatikdi ang Malaquias 4, sa diha nga mibiya na kana nga mensahero, ang kalibutan bug-os nang gisunog, ug ang mga

matarung manglakaw diha sa Milenyum, ibabaw sa mga abo niining mga tawo. Busa, nakita n'yo, kung ibutang ninyo siya dinha, kung—kung ingon niana ang Biblia mora og nagasulti nga dili mao. Nagkaaduna na kita og duha ka libo ka tuig, ug ang kalibutan wala pa man masunog, ug ang mga matarung nagkinabuhi pa dinhi. Busa siguradong sa umalabot pa kini. Oh, grabe! [Ginapalakpak si Igsoong Branham ang iyang mga kamot sa makausa—Ed.]

²¹¹ Pagmakaabot na kamo dinhi sa Pinadayag, ug matanaw n'yo kung unsa ang gipaabot nga pagabuhaton niining mensahero sa katapusan niining kapanahonan, dinha ninyo makita kung unsa kini. Kinahanglan nga usa siya ka propeta. Kinahanglan niyang mapatakdo kining mga butanga nga wala makita sa mga repormador, ug maiplastar Kini dinha.

²¹² Unsaon n'yo man pagpatakdo sa Mateo 28:19 sa Mga Buhat 2:38, kung wala ang espirituhanong kapadayagan sa Dios? Dili mahimong ingnon sa niining mga tawo nga ang mga adlaw sa mga milagro milabay na, ug uban pa nga sama niana, ug (huh!) gawas lang kung wala sila'y kapadayagan sa Dios? Mao lang kana ang bugtong paagi nga mahibaloan nila kini, nga mahibaloan nila kung husto ba kini o sayup! Kita n'yo? Apan gikan baya kana sila sa mga seminaryo. Aduna pa kita unta og oras aron mahisgotan ang bahin niana.

²¹³ Gusto kong dalion na, tungod kay dili ko gusto nga padugayon pa kamo dinhi nga sobra sa usa ka semana, kabalo na mo kung unsa ang buut kong ipasabot, kining, pag-abli niining mga Selyo. Aduna ko'y usa pa ka adlaw, ug gusto kong igahin kini alang sa pag-ampo sa mga masakiton kana nga adlaw, kung mahimo ko.

²¹⁴ Karon tan-awa, ang Malaquias 4, usa siya ka propeta, ug “magapasig-uli sa orihinal nga Pagtoo sa mga amahan.”

²¹⁵ Ug sa kaulahi pang panahon, sa dihang ang panahon sa Kasakitan moabot. . . Karon ania ang usa ka gamay'ng butang nga pagabalikan nato, sa kadali, kung diin ang tulo-ug-tunga ka tuig, o, ang kapitoan ka semana ni Daniel, ang ulahing katunga sa kapitoan ka semana ni Daniel, nga mao ang tulo-ug-tunga ka tuig. Karon, atong, pila ba ang nakahinumdom niana, gikan sa mga kapanahonan sa iglesia? [Nagaingon ang kongregasyon, “Amen”—Ed.] Kita n'yo? “Adunay gigahin nga kapitoan ka semana.” Tan-awa kung unsa ka eksakto kana. Miingon, “Ang Mesias moabot, ug Siya pagapatyon, ingon nga usa ka halad, sa tunga-tunga sa semana, ug pahunongon na ang mga paghalad.” Dayon, aduna pa'y tulo-ug-tunga ka tuig nga ginapaabot, tungod niining pang-Mesias nga Doktrina alang sa mga Judio.

²¹⁶ Ug wala dungana sa Dios nga nagapakigtigayon sa Judio ug sa Gentil. Nagapakigtigayon Siya sa Israel ingon nga

nasud, sa Gentil ingon nga indibidwal. Wala Niya pilia ang mga Gentil aron himoon Niyang Pangasaw-onon; Nagkuha Siya og mga tawo gikan sa mga Gentil. Kita n'yo? Karon nagapakigtigayon Siya sa Israel ingon nga nasud. Ug karon atua kini nga napahimutang na, didto mismo karon, ingon nga usa na ka nasud.

²¹⁷ Nakadawat ako og surat nga gikan kang Paul karong adlaw, Paul Boyd. Ug ingon niya kanako, miingon, "Igsoong Branham, unsa man ka tinuod kini! Kining mga Judio kono aduna pa sa gihapon og dili-maayo nga pagbati ngadto sa mga Gentil, bisan pa sa mga nangahitabo." Sigurado, mobati gyud sila og ingon niana. Angay lang nila.

²¹⁸ Sa dihang si Martin Luther naghimo og proklamasyon, nga, "Ang tanan nga mga Judio kinahanglan pahawaon, ug ang ilang mga bilding kinahanglan sunogon, tungod kay sila mga anticristo." Kita n'yo? Naghimo si Martin Luther og ingon nianang pamahayag, siya mismo, diha sa iyang mga sinulat. Karon, gituman lamang ni Hitler kung unsa ang giingon ni Martin Luther. Nganong nasulti man kadto ni Martin Luther? Tungod kay usa ra man siya ka repormador, dili usa ka propeta.

²¹⁹ Ang Dios, nga, "Gipanalanginan sa Akong propeta ang Israel, nga miingon siya, 'Ang si kinsa man nga magapanalangin kanimo pagapanalanginan, ug ang si kinsa man nga magapanghimaraut kanimo pagapanghimarauton.'" Mahimo ba diay sa usa ka propeta nga motindog ug isalikway kung unsa ang gisulti sa usa na usab ka propeta? Dili niya mahimo kana. Kinahanglan nga may pagkauyon kini, kita n'yo.

²²⁰ Apan mao kana ang hinungdan kon nganong ilang gipakaingon... Kita n'yo, ang Germany usa unta ka Cristohanong nasud, ug, sila, ang ila lang gyud pagtratar sa Israel! Aduna pa sa gihapon sila og ginapas-an diha sa ilang mga abaga, ug dili mo sila mabasol niana. Apan hinumdomi lang, kung aduna ma'y naglingkod dinhi nga mga Judio, ayaw kamo og kabalaka, moabot ra gyud ang adlaw! Dili sila puedeng hikalimtan sa Dios. Gibutahan lang sila alang kanato.

²²¹ Kabalo mo, miingon Siya ngadto sa propeta, Siya... Ang propeta misinggit, miingon, "Mahikalimtan Mo ba ang Israel?"

²²² Miingon Siya, "Kuhaa kanang pang-sukod; ug sukda kung unsa ka habog ang kawanangan? Kung unsa ka halawom ang dagat?"

Miingon siya, "Dili ko masukod kini."

²²³ Miingon, "Mao nga dili Ko gayud pagakalimtan ang Israel." Iya kanang katawhan, Iya kanang mga alagad.

²²⁴ Ug ang Gentil, diyutay lang ang pagakuhaon gikan niini, nga mamahimong Iyang Pangasaw-onon. Eksakto gyud kana. Ang Pangasaw-onon kana.

225 Karon, kapitoan ka semana ang gitagal na daan, nga eksakto, sama sa giingon ni Daniel nga ang Mesias moabot ug pagapatyon diha sa tunga-tunga sa semana. Ug nagpropesiya si Jesus og tulo-ug-tunga ka tuig. Karon, sa tunga-tunga niini, ang tulo-ug-tunga ka tuig ni Daniel, sa tunga-tunga niini, pagapatyon Siya. Apan karon ang ulahing bahin niini mao na ang panahon sa Kasakitan, nga masinati sa iglesiang Gentil. Oh, pagkamahinungdanon niini! Karon ayaw sipyata. Ang Pangasaw-onon misulod na kauban ang Pamanhonon; dayon, pagkahuman sa Milenyum, magalakaw didto ibabaw sa mga abo sa dautan.

226 Tugoti nga aduna ko'y ipakita kaninyo dinhi, samtang ania pa kini sa atong hunahuna. Tugoti nga ipakita ko kaninyo kung unsa ang gisulti Niini, kung unsa ang ginasulti sa Biblia. Ug dili nato mahimong ilimod Kini ingon nga Pulong sa Dios. Pag-ilimod nato, nan kita'y mga dili-magtotoo. Kita n'yo, kinahanglan nga toohan gyud nato Kini. Moingon kamo, "Dili ko masabtan Kini." Ni bisan man ako. Apan nagasalig lamang ako Kaniya nga ipadayag Kini. Tan-awa.

Kay, ania karon, ang adlaw moabot na, nga nagasunog daw hudno; ug ang tanang mga palabilabihon (sama sa mga Amerikano, ug uban pa), oo, . . . ang tanang nanagbuhat sa kadautan, mangahimong tuod sa mga balili: (Kini pagasunogon.) ug ang adlaw nga moabot, Ako magasunog kanila, nagaingon ang GINOO sa mga panon, . . . nga kini dili magpabilin kanila bisan sa gamut o sanga.

227 Giunsa mo man pagkaaduna og Walay Katapusang impiyerno didto kung ingon-ana? Kita n'yo, sa katapusang mga adlaw kini, kon diin kini nga mga butang igapadayag. Walay dapit diha sa Biblia nga nagsulti nga adunay impiyerno nga Walay Katapusan. Kung mao man, aron maatua ka sa Walay Katapusan nga impiyerno, kinahanglan aduna ka'y Kinabuhing Walay Katapusan aron nga magpabilin didto. Adunay usa lamang ka porma sa Kinabuhing Walay Katapusan, ug mao kana kung unsa ang gipaningkamotan nato. Ang tanantanan, nga adunay sinugdanan, adunay katapusan. "Ang impiyerno gibuhat alang sa yawa ug sa iyang mga manulonda," ug pagapapason ug pagahanawon kauban niini. Husto. Kita n'yo? Apan sa dihang mahitabo kini, "Kini dili magbilin kanila og gamut o sanga man lang."

Apan kanila nga may kahadlok sa akong ngalan ang Adlaw sa pagkamatarung magasubang nga adunay kaluwasan sa iyang mga pako; . . . kamo manggula, ingon nga managlumpat sa kalipay sama sa mga nating vaca sa toril.

Ug pagatamakan ninyo ang mga dautan; kay sila mangahimong abo sa ilalum sa mga lapa-lapa sa inyong mga tiil sa adlaw nga Akong pagahimoon kini, nagaingon ang GINOO sa mga panon.

228 Asa man mopaingon ang mga dautan pagkahuman sa Kasakitan? Ngadto sa pagka-abo.

Hinumdomi...ang mga kasugoan ni Moises...nga akong gisugo...kaniya didto sa Horeb alang sa tibuwok nga Israel, bisan ang kabalaoran ug mga paghukom.

Ania karon, akong ipadala nganha kaninyo si Elias ang propeta sa dili pa moabot ang kanang daku ug makalilisang nga adlaw sa GINOO:

229 Amen! Ania ang Daang Tugon nga nanghinapos sama niana, ug ania ang Bag-ong Tugon nga nanghinapos sa mao gihapong butang. Unsaon man ninyo sa paglikay niini? Dili gyud mahimo. Tan-awa, “Akong ipadala kaninyo si Elias nga propeta sa dili pa moabot kanang adlaw.”

Ug iyang pabalikon ang mga kasingkasing sa mga amahan ngadto sa mga bata, ug ang mga kasingkasing sa mga bata ngadto sa ilang mga amahan, tingali unya ako moanhi ug samaran ko ang yuta pinaagi sa usa ka panghimaraut. (Uh!)

230 Tan-awa ninyo. Mao kana ang Pulong sa Ginoo. Gisaad Niya kini. Kinahanglan nga moabot kini. Ug karon kung mamatikdan ninyo kung unsa nga nagakahitabo kini. Pagkamaanindot, kung giunsa kini pagbuhat sa Dios. Ang Pangasaw-onon mobiya na, ug makauban na sa Pamanhonon. Ug—ug dayon human niana, pagasunogon ang mga dautan sa dili-mapalong nga kalayo. Ug human nga malimpyohan na ang kalibutan, mabag-o kini. Ang tanan kinahanglan mamaingon niana, kinahanglan nga moagi sa paglimpyo.

231 Manggibuga og kalayo ang mga bulkan nianang katapusang panahon, ug mangbuto ang kalibutan, ug mangbusikad ug kung unsa pa; ug ang tanan niining mga katipun-ogan sa sala, ug ang tanan nga anaa ibabaw sa yuta, pagatunawon ngadto sa pagkahanaw. Mangasunog kini sa ingon ka hilabihang kainit, nga mahisama kini sa bleach nga ginabalik ang—ang kolor sa—sa tinta paingon sa orihinal nga gigikanan niini. Mao usab ang Kalayong gikan sa Dios nga mamahimong ingon ka hilabihan ang kainit, nga magpabalik sa tanang hugaw’ng mga butang paingon sa orihinal nga kahimtang niini pag-usab, sa dihang si Satanas ug ang tanang sala pagasunogon na, ug ang tanan-tanan na. Ug mamahimo na kining ingon ka maanyag susama sa kung unsa kini kaniadto didto sa tanaman sa Eden. Husto. Oh, kanang pagkamaanindot nga oras anaa na sa unahan lang nato!

232 Sa mismong panahon sa Kasakitan. Ania ang gusto kong himatikdan ninyo karon, usa ka gamay’ng butang ilakip

ko dinhi. Sulod niining panahon sa Kasakitan, human nga gisakgaw na ang Pangasaw-onon, ug moagi ang iglesia sa panahon sa Kasakitan, ang usa ka gatus ug kwartentay-kwatro ka libo pagatawgon na sa duha ka mga saksi sa Pinadayag 11. Karon tan-awa. Magapropesiya sila, sulod sa usa ka libo duha ka gatus ug kan-uman ka mga adlaw, nga nagbisti og saku.

233 Karon, nasayod kita nga kining Romanhong kalendaryo adunay. . . Aduna kita og baynte-otso ka mga adlaw ug, usahay, traynta, ug trayntay-uno. Apan, sa pagkatinuod, ingon niini ang pagbasa sa kalendaryo, traynta ka mga adlaw matag bulan. Husto. Ug kalkulaha ang usa ka gatus. . . usa ka libo duha ka gatus ug kan-uman ka mga adlaw, ug bahinbahina kana sa tig-traynta, ug tan-awa kung unsay katumbas niana. Tulo ka tuig ug tunga, eksakto gayud. Mao kana ang gigahin nga panahon, panahon alang sa pang-Mesias nga Mensahe nga igawali ngadto sa Israel, sama sa gibuhat kaniadto. Pagmoabot na Siya ug ipaila na Niya ang Iyang Kaugalingon, diha sa usa ka simbolo pagmoabot na Siya. . .

234 Niadtong, si Joseph gidala ngadto sa laing nasud, ug gisalikway sa iyang mga igsoon, tungod kay siya usa ka espirituhanon nga tawo. Makakita man siya og mga panan-awon ug makahubad og mga damgo. Ug tungod ingon niana ang ginabuhat niya, gidala siya ngadto sa laing nasud ug gibaligya sa halos katloan ka buok nga salapi. Ginahulagway niya si Cristo, sa eksakto, tungod kay anaa man sa sulod niya ang Espiritu ni Cristo.

235 Matikdi kung unsa ang nahitabo dayon. Ug matikdi nga, sa gibuhat na niya kini, gibalhog siya sa bilangoan, ug usa ka tawo ang naluwas ug ang usa namatay. Eksaktong si Jesus, sa dihang atua Siya didto sa bilangoan sa krus, naluwas ang kawatan ug nalaglag ang usa, eksakto gayud.

236 Gitambog ngadto sa lubnganan, gitooan nga patay na, ug gipasaka, ug gibayaw ngadto sa tuong kamot ni Faraon, nga walay puedeng makapakigkita kang Faraon nga dili makigkita una kang Joseph. Naglingkod si Jesus sa tuong kamot sa Dios, ug walay tawo nga makaadto sa Amahan kondili pinaagi sa Anak. Husto.

237 Ug matikdi sa matag higayon nga mobiya si Joseph, sa dihang motindog na si Joseph gikan sa tuong kamot sa nianang trono. Bantayi! Himaya! Didto naglingkod si Joseph, sa tuong kamot ni Faraon. Ug pagmotindog na si Joseph, nga ginabiyaan kanang trono, ginapatingog ang trumpeta. "Mangluhod, ang tanan! Paanhi na si Joseph!"

238 Sa dihang biyaan na nianang Cordero ang Trono, didto, sa Iyang mga adlaw sa tigpataliwala nga buluhaton, pagbiyaan na Niya ang Trono didto sa itaas, ug kuhaon na kanang Basahon

sa Katubsanang ug molakaw na, ang tanang tuhod magaluhod. Anaa na Siya. Himatikdi.

²³⁹ Ug si Joseph, nga gisalikway sa iyang mga igsoon, gihatagan siya ug Gentil nga asawa. Si Potipar ang naghatag kaniya. . . O, gihatagan siya ni Faraon og usa—usa ka Gentil nga asawa, ug nakaangkon siya ug Gentil nga mga bata, mga mistisong Gentil ug Judio. Nagahatag kini og usa ka dakong simbolo. Sa dihang gipanalanginan sila ni Jacob, si Ephraim diha sa usa ka kilid ug si Manases usab diha sa pikas, gikrus niya ang duha niya ka kamot ug nahatag ang maong panalangin ngadto sa manghud nga bata. Ug ang maong duha ka bata gidugang ngadto sa dose ka mga banay, nga napulo pa lamang niadtong panahona, ug gipanalangin sila mismo ni Jacob. Ug si Joseph, ang iyang propetang anak, nga nagatindog didto, miingon, “Amahan, nasayup ka.” Miingon pa, “Nabutang mo ang imong tuong kamot sa pagpanalangin ngadto sa manghud nga bata, nga didto man unta kini sa magwang.”

²⁴⁰ Ug miingon siya, “Nahibalo ako nga ang akong kamot nagkrus, apan ang Dios ang nagkrus sa mga niini.” Ngano man? Ang Israel, nga mao unta ang may katungod nga mamahimong Pangasaw-onon, gisalikway ug gibaligya ang ilang pagkapanganay, ug ang . . . mibiya kini gikan sa magwang nga anak-nga-lalaki, ang Israel, padulong ngadto sa bag-o, ang Gentil. Ug ang mga panalangin mibalhin gikan didto, pinaagi sa krus, paingon sa mga Gentil.

²⁴¹ Apan matikdi human niadto, kita n’yo, tungod niadto, sa diha ang tanang. . . Iya nang gikuha ang iyang pangasaw-onon. Apan sa dihang miadto sila nga mga kalalaken-an aron sa pagpamalit og pagkaon. . .

²⁴² Oh, usa kana ka maanindot nga hulagway! Wala pa ako sa Selyo, apan kinahanglan ko lang nga isulti kini, kita n’yo, tungod kay mas mahulagway ninyo kung ingon niini, nagatoo ako. Matikdi.

²⁴³ Karon, sa dihang miadto sila didto aron sa pagpamalit og pagkaon, kabalo mo, naila sila dayon ni Joseph. Ug si Joseph mao ang anak sa kauswagan. Bisan asa pa siya moadto, kanunay siyang nagmauswagan.

²⁴⁴ Hulata n’yo lang pagmobalik na Siya sa kalibutan; hulata lang pagmoabot na ang atong Joseph! Kita n’yo? “Ang diserto magapamulak sama sa usa ka rosas, ug ang Adlaw sa Pagkamatarung magasubang nga adunay kaayohan diha sa Iyang mga pako.” Oh, grabe! Ang tanan nianang mga kaktus sa tibuok Arizona mamahimong matahum nga mga kahoy, ug kini—ug mamahimo kining matahum.

²⁴⁵ Himatikdi, ania siya nga migawas, ug medyo gidula-dulaan niya sila didto. Ug nagpadala siya, ug miingon siya, “Buhi pa ba sa gihapon ang akong amahan?” Kita n’yo? Gusto niyang

mahibaloan kung ang amahan sa bata buhi pa. Miingon, “Oo.” Nasayod siya mismo nga iya kadtong igsoon. Apan namatikdan ba ninyo sa diha nga ipaila na niya ang iyang kaugalingon ngadto sa iyang mga igsoon?

²⁴⁶ Ug nakita niya ang gamay nga si Benjamin, nga natawo niadtong wala na siya. Ug nagarepresentar kana sa niining mga Judio, niining gatus ug kwarentay-kwatro ka libo nga nagakatigum na karon didto sukad niadtong pagbiya Niya. Ug kung mobalik na Siya, miingon Siya . . . Pagkakita ni Joseph kang Benjamin; daw sa mahugno ang iyang kasingkasing.

²⁴⁷ Ug, hinumdomi, sila kaniadto . . . siya . . . Wala sila mahibalo nga siya makasulti diay og Hebreohanon. Migamit siya og usa ka tighubad. Nanglihok siya nga daw usa siya ka Egiptohanon. Kita n’yo? Ug dayon sa dihang magpaila na siya, nga gusto na niyang ipaila ang iyang kaugalingon, kanunay siyang nagatan-aw kang Benjamin. Ug, hinumdomi, gipapalakaw niya ang iyang asawa. Atua sa palasyo ang iyang asawa sa dihang gipaila niya ang iyang kaugalingon ngadto sa iyang mga igsoon.

²⁴⁸ Ug ang Gentil nga Pangasaw-onon, ang Asawa, human nga si Jesus gisalikway sa Mismo Niyang mga tawo, nagkuha Siya og usa ka Gentil nga Pangasaw-onon. Ug dalhon Niya Siya gikan dinhi, paingon sa Palasyo, ngadto sa Balay sa Iyang Amahan diha sa Himaya, alang sa Pangkasal nga Panihapon. Ug mobalik dayon dinhi, aron ipaila ang Iyang kaugalingon ngadto sa Iyang mga igsoon, ngadto sa usa ka gatus ug kwarentay-kwatro ka libo . . . ? . . . nianang panahona.

²⁴⁹ Atua nagatindog si Joseph. Ug, hinumdomi, tan-awa ang simbolo nga pagkahingpit gayud. Ug sa iyang pagbalik sa kung asa kadto, nagtan-aw siya ngadto kanila, ug miingon siya—miingon siya . . . nagsugod og tan-aw. Ug sugod silang nag-estoryahanay. Ingon nila, “Karon, Reuben, kabalo ka nga delikado gyud ta ani karon, kita n’yo. Tungod, kabalo na baya ka kung unsay gibuhat nato. Gipahimutang nato kining bataa sa niining kakuyaw nga kahimtang. Karon, kung wala lang unta nato gibaligya ang atong igsoon.” Pero kadtong nagatindog didto mao mismo ang ilang igsoon, ang gamhanang prinsipe, ug wala sila masayod niini.

²⁵⁰ Kana ang hinungdan kon nganong dili makasabot Kaniya ang Israel sa pagkakaran. Dili pa man kini ang takna aron masayran nila kini.

²⁵¹ Ug dayon, siya, abi nila nga wala siya makasabot og Hebreohanon, apan nagapaminaw siya mismo kanila. Ingon nila, “Karon delikado gyud ta ani.” Ug si Joseph, pagtan-aw niya kanila, wala na siya makapugong pa.

²⁵² Karon, hinumdomi, ang iyang asawa ug mga anak atua didto sa palasyo niadtong panahona. Ang mga balaan nakahawa na, wala na didto sa pag-atubang.

253 Ug miingon siya, “Ako mao si Joseph, ang inyong igsoon.” Ug miduol siya didto ug gikuha ang gamay nga si Benjamin, gigakus kini, ug misugod sa paghilak. Kita n’yo? Ug gipaila niya ang iyang kaugalingon.

254 Ug dayon miingon sila, “Karon kabalo ta nga siguradong moabot gyud kini, tungod kay ato man siyang gibaligya. Kita ang nagbaligya kaniya. Gisulayan pa nato nga patyon siya, karon kabalo kita nga patyon niya gyud kita.”

255 Miingon siya, “Ayaw, ayaw kamo’g kasuko sa inyong kaugalingon, gibuhat n’yo lamang kadto aron magpreserba og kinabuhi. Mao kana kon nganong gipadala ako sa Dios dinhi.”

256 Ug sa dihang gipaila ni Jesus ang Iyang Kaugalingon, ang Biblia miingon. . . sumala sa atong hingsayran dinhi. Sa dihang ipaila na Niya ang Iyang Kaugalingon sa nianang usa ka gatus ug kwarentay-kwatro ka libo didto, ang gamay’ng Benjamin sa niining panahon, ug sa mga nahabilin nga mga Judio didto; sa diha nga ipaila na Niya ang Iyang Kaugalingon, moingon sila, “Asa Mo man nakuha kining mga ulat? Unsa ma’y ilang gibuhat sa Imong kamot?”

257 Moingon Siya, “Oh, nangakuha ko kini didto sa balay sa Akong mga higala.” Kita n’yo? Oh, dayon maamgo nila nga gipatay diay nila ang Mesias. Apan unsa man ang Iyang itubag? Pareho ra sa gitubag ni Joseph. “Gibuhat n’yo lang kadto aron pagpreserba og kinabuhi; dili nga. . . kondili magluwas og kinabuhi. Ayaw kamo’g kasuko sa inyong kaugalingon.” Tungod, nga, ang mga Gentil wala unta makasulod kung wala gibutahan ang mga Judio. Busa, giluwasa Niya ang kinabuhi sa Iglesia, pinaagi sa mga butang nga ilang gibuhat. Busa tan-awa. Mao kana ang hinungdan, sa karon, nga dili nila masabtan Kini; dili pa kini ang takna.

258 Mao usab kanato nga dili nato masabtan kining mga butanga hangtud moabot ang panahon nga masabtan na Kini. Oh, grabe! Pito Ka Mga Dalugdog, sa Pinadayag, hinaut nga ipakita na Niya sa Pangasaw-on kung unsaon pagpangandam alang niining dakung pagtoo aron masakgaw!

259 Karon dalion na nato, tungod duna na lang kita og mga kinse, baynte minutos.

260 Karon, unsay kahulogan niining puting kabayo? Tugoti ko nga basahon ang. . . napalayo na ako og ayo; pasayloa ko nga napalayo ako sa akong hilisgutan. Apan, hinoon basahon nako ang bersekulo pag-usab, ang duha ka bersekulo.

Ug nakakita ako sa diha nga ang Cordero nga mibukhad sa usa sa mga selyo, ug nadungog ko, ang tingog nga daw usa ka dalugdog, ug ang usa sa upat ka mga buhing-binuhat nga nagaingon, Umari ka. . . tuman-aw.

Ug nakita ko, ug ania karon ang usa ka puting kabayo: . . .

261 Karon moadto kita sa ika-2 nga bersekulo.

. . . usa ka puting kabayo: ug ang nagkabayo niini may usa ka pana; ug gihatagan siya og usa ka purongpurong, (wala pa siya niini kaniadto) . . . diha kaniya: ug siya milakaw nga nagmadaugon, ug aron sa pagpanaug.

262 Kini na ang tanan niini. Mao kana ang Selyo. Karon susihon nato ang maong mga simbolo.

263 Nakita nato kung unsay kahulogan sa Dalugdog. Eksaktong, nahibaloan na nato kana, kita n'yo. Ang Dalugdog mao ang Tingog sa Dios, sa diha nga giablihan ang Selyo.

264 Karon, unsay pasabot sa puting kabayo? Karon, ania ang kapadayagan nga nagaabot. Ingon ako ka sigurado bahin niini, maingon nga nagatindog ako dinhi, sa pagkasayod nga kini gayud ang Pulong.

265 Nabasa ko na ang matag libro nga akong makita nga naghigot bahin niini. Ug gamit ang usa ka . . . akong . . . Sa usa ka higayon kaniadto nga akong—gisulayan nga hisgotan kini, nga itudlo kini, mga traynta na ka tuig ang milabay, gibasa ko ang maong libro . . . Adunay nagsulti kanako nga ang mga Adventista kono adunay mas labaw nga kahayag mahitungod sa ikaduhang Pagbalik ni Cristo kay sa ubang mga tawo nga ilang nailhan, busa nakita ko ang pipila sa ilang maayong mga libro, aron basahon. Nagkaaduna usab ko og libro ni Smith bahin kang Daniel, mga kapadayagan. Ug miingon siya nga kining puting kabayo nga minggula mao nga kini puti, ug tungod nagasimbolo kono kini og usa ka mangdadaug. Ug sa niining pagpangdaug . . . Daghan kaninyo nga mga igsoong Adventista nga ania dinhi nakahibalo na bahin niining libro, ug daghan pa kaninyo, usab, ang nakabasa na niini. Ug—ug ang uban niini, nakabasa ko og duha o tulo pa. Nabasa ko, ug dili ko mahinganlan lang . . . Aduna pa og duha ka libro ang gibasa ko, ug duha sila parehong nagkauyon nga husto kana. [Nagapanuktok si Igsoong Branham diha sa pulpito sa makalimang higayon—Ed.] Mga maayong magtutudlo kadto, giila ingon nga duha sa mga pinaka banggiitan, nga adunay labing maayong panabut. Busa nahunahuna ko, “Bueno, ingon nga wala ko kabalo, igasulti ko na lang kung unsa ang gisulti nila, paninguhaan kining itudlo sa ingon niana nga paagi.”

266 Gisaysay gyud nila kini pag-ayo, kung unsa ang kahulogan niini. Ug ingon nila, “Karon, ania ang puting kabayo, ug ang puting kabayo usa ka gahum, usa ka panggubat nga kabayo.” Ug miingon pa, “Ang tawo nga naglingkod niana, sa—sa nianang puting kabayo, mao ang Balaang Espiritu nga mitungha niadtong nahaunang kapanahonan ug gidaug kadto nga kapanahonan alang sa Ginharian sa Dios. Aduna

siya og pana sa iyang kamot, nga nagkahulogan, sama ni Cupido, ginapana niya ang mga udyong sa gugma ngadto sa mga kasingkasing sa mga tawo, ang gugma sa Dios, ug nagmadaugon siya.”

²⁶⁷ Karon, maanindot kaayo kana paminawon, apan dili kana mao ang Kamatuoran. Dili, sir. Oo. Dili gayud. Ang pagkamaputi nagkahulugan pud og pagkamatarung. Atong—nasayod kita niana. Ang puti nagkahulogan kini nga matarung. Gitudlo kini sa mga magtutudlo, nga kini kono mao ang Balaang Espiritu nga nagapangbuntog sa nahaunang kapanahonan; apan ang kapadayagan kanako, pinaagi sa Balaang Espiritu, dili ingon niana.

²⁶⁸ Ang kapadayagan kanako, pinaagi sa Balaang Espiritu, maoy: si Cristo ug ang Balaang Espiritu mao ang pareho-rang Persona, magkalahi lang nga porma. *Busa, ania* si Cristo nga nagatindog, ang Cordero. Nahibalo kita nga Siya mao ang Cordero. Nagatindog Siya *dinhi* nga may dala og mga Basahon diha sa Iyang kamot; ug *anaa* kanang mangangabayo sa puting kabayo, kita n’yo, busa dili gyud kana ang Balaang Espiritu.

²⁶⁹ Karon, usa kana sa mga tinago sa kaulahiing mga adlaw, kung giunsa nga ang kanang Cristo mahimong tulo ka persona diha sa Usa ra. Dili kini tulo ka managkalahing persona, Amahan, Anak, ug Espiritu Santo, ingon nga tulo ka mga Dios, susama sa ginapamugos nga isulti kanato sa mga trinitarian nga ingon niana kono Kini. Tulo kini, tulo kini ka manipestasyon sa mao ra nga Persona. O, mahimo ninyo kining tawgon og tulo ka mga opisina. Kung nagapakigsulti ka sa mga ministro, dili mo mahimong gamiton ang pulong nga opisina; tungod kay, husto, kalit lang nahunahuna ko, naka-teyp diay ko. Busa sultihan ko kamo. . . Siyempre, dili moingon si Cristo nga, “Mag-ampo Ako sa Akong opisina, ug ipadala Niya kaninyo ang usa pa ka opisina.” Kabalo na kita niana. Apan kung gusto ninyong himoon kining. . . Tulo kini ka mga kinaiyahan sa mao ra nga Dios. Kita n’yo? Dili kini tulo ka Dios. Tulo ka kinaiyahan sa mao ra nga Dios! Kita n’yo?

²⁷⁰ Ug busa unsaon man pagkaadto ni Cristo *didto*, nga nagsakay sa puting kabayo, nagapangbuntog, ug ania *dinhi* nga adunay Basahon diha sa Iyang kamot? Dili gyud, bisan pa man. Dili gyud kini si Cristo.

²⁷¹ Matikdi karon, ang Balaang Espiritu (diha sa kapadayagan) ug si Cristo, kini, ang Balaang Espiritu mao si Cristo diha sa ubang porma. Husto.

²⁷² Matikdi, ang Cordero mao ang nag-abli sa mga Basahon, ug ang Cordero mao si Cristo. Ug si Cristo wala na magpakita, pagkahuman niana, apan makita na usab Siya diha sa Basahon sa Pinadayag, sa ika-19 nga kapitulo, nagaabot nga nakasakay sa puting kabayo.

273 Kung gusto ninyong basahon kini, ablihan nato ang Pinadayag 19:11, unom- . . . Ug dalion lang nato kini sa pagbasa samtang kita—samtang kita . . . Aduna pa kita og igong oras, naglaum ko, aron himoon kining mas klaro pa alang kanato. 19, 19:11, magsugod sa ika-11 nga bersekulo, ug basahon paubos, lakipon ang ika-16.

Ug nakita ko nga naablihan ang langit, . . . ania karon ang usa ka puting kabayo; (dili dinhi sa yuta; didto sa Langit, kita n'yo) ug siya nga nagakabayo diha niini ginganla'g Kasaligan . . . Matuod, . . . diha sa pagkamatarung siya nagapanghukom ug nagapakiggubat.

Ang iyang mga mata . . . kalayo nga nagasiga, ug sa iyang ulo diha'y daghang mga purongpurong, (tan-awa ang maong diadema!); ug siya may sinulat nga ngalan, nga walay bisan kinsa nga nasayod, gawas . . . iyang kaugalingon.

274 Gusto ko unta nga maghunong ako dinha sa makadiyut. [Nagapanuktok si Igsoong Branham sa pulpito sa maka-usa, ug mihunong—Ed.] Oh, grabe! Aduna ko'y maayong ideya, apan . . . Siguro mahimo nako, kung inyong . . . [Nagaingon ang kongregasyon, "Ipadayon lang!"]

275 Kita n'yo, walay usa nga nasayod Niini. Kabalo ba mo nga ang Ngalan nga "Jehovah" dili husto? Nahibalo si bisan kinsa niana. Dr. Vayle, nasayod ka nga tinuod kana. Ang mga maghuhubad dili man gud nila Kini mahubad. Ang espeling Niini maoy J-u-h-v . . . J-v-h-u, ang buut kong ipasabot. Dili kini "Jehovah." Dili nila Kini masabtan. Wala sila makahibalo kung unsa gyud Kini. Gitawag lang nila Kini nga "Jehovah," apan dili kana ang Iyang Ngalan.

276 Tan-awa, sa matag higayon nga maangkon ang kadaugan, o pag-adunay nagakahitabo, usa ka ngalan ang ginabag-o.

277 Tan-awa ang mga adlaw ni Abraham. Siya kaniadto, una, Abram, ug wala gayud niya unta naangkon ang bata kung wala gibag-o ang iyang ngalan ngadto sa Abraham. Ug si Sarra, S-a-r-r-a, usa lang gayud unta ka patay nga taguangkan kung ang iyang ngalan wala gibag-o ngadto sa S-a-r-a-h.

278 Ang *Jacob* nagkahulogan og "mangingilog, maglilimbong," ug mao kana ang iyang gibuhat. Nagbutang siya og panit sa carnero sa iyang kaugalingon, ug gilimbongan ang iyang amahan nga manalagna, aron makuha ang pagkapanganay. Ug nagbutang siya og mga sanga sa alamo diha sa mga paimnanan, gipuntikan ang mga niini, gihadlok ang panon sa mga baka sa dihang sila nanamkon pa lang sa . . . ilang mga anak, aron kini makapanganak og kabang nga mga baka ug mga carnero. Walay lain kondili usa gyud ka maglilimbong!

279 Apan usa niana ka gabii nakahawid siya sa kung unsang Butang nga tinuod, ug nasayod siya nga Kini tinuod. Ug padayon niyang gihawiran Kini, ug gihawiran gyud niya hangtud nga nadaug niya. Ug gibag-o ang iyang ngalan, ug gitawag na siya nga *Israel*, nga nagkahulogan “usa ka principeng kusgan sa atubangan sa Dios.”

280 Husto ba kana? [Nagaingon ang kongregasyon, “Amen.”—Ed.] Ang matag magdadaug usab!

281 Si Simon usa ka mangingisda. Apan sa dihang nakuha sa iyang pagtoo ug hingsayran nga kadto mao si Jesus, sa dihang Iya siya giingnan nga Siya mao ang Mesias, ug giingnan kini kung unsa ang iyang ngalan ug kung unsa ang ngalan sa iyang amahan, nadaug siya niadto, ug gibag-o ang Simon ngadto sa Pedro.

282 Saulo, maayong ngalan. Si Saulo, usa niadto ka hari sa Israel, apan siya, ang ngalan nga *Saulo*, dili takus alang sa usa ka apostol. Siguro okey lang para sa usa ka hari, apan dili maayo para sa usa ka apostol. Busa gibag-o ni Jesus ang iyang ngalan (gikan sa unsa?) gikan sa Saulo ngadto sa Pablo.

Tan-awa na lang “Kining mga anak-nga-lalaki sa dalugdog,” ug tanang uban pa.

283 Ug, si Jesus, ang Iyang ngalan dinhi sa yuta mao ang “Manunubos,” nga si Jesus. Niadtong ania pa Siya dinhi sa yuta, Siya ang Manunubos, tinuod kana. Apan sa diha nga Iyang gibuntog ang kamatayon ug impiyerno, ug gibuntog Niya ang mga niini, ug mikayab ngadto sa Kahitas-an, nagdawat Siya og usa ka bag-ong Ngalan. Mao kana ang hinungdan nga mosinggit man mo sa paagi nga ginabuhat nila, ug wala sila’y makuha sa gihapon og unsa man.

284 Igapadayag ra kini diha sa mga Dalugdog. Uh-huh. Kita n’yo? Matikdi ang mga tinago. Magaabot Siya, nga nagasakay . . . Kinahanglan aduna gyu’y Butang nga mobag-o niining Iglesia. Nasayod mo niana. Kinahanglan aduna gyu’y Butang. Matikdi, “Walay tawong nasayod, kondili ang Iya rang Kaugalingon.” Karon, matikdi, “Walay tawong nasayod, kondili Siya ra.”

Ug siya nagasul-ob og bisti nga gikatuslob sa dugo: ug ang Iyang Ngalan maoy gitawag Ang Pulong sa Dios.

Oh, grabe! Matikdi!

Ug ang mga kasundalohan sa langit nagasunod kaniya nga nanagkabayo sa mga puting kabayo, nga sinul-oban sa lino nga manipis, maputi ug mahinlo.

Ug gikan sa Iyang baba nagagula ang usa ka mahait nga espada, nga mao’y iyang itigbas sa kanasuran: ug sila pagaharian niya sa olisi nga puthaw: ug siya magagiuk sa pug-anan sa vino sa mabangis ug sa kapungot sa Dios nga Makagagahum-sa-tanan.

Ug aduna sa iyang bisti ug sa iyang dapidapi nahasulat kini nga ngalan, HARI SA MGA HARI, UG GINOO SA MGA GINOO.

285 Ania nagaabot ang Mesias. Ania Siya; dili ang kining tawo nga nagsakay sa kabayo *dinhi*. Tan-awa ang kalainan. Ania Siya nagatindog nga adunay Basahon diha sa Iyang kamot, *dinhi*, ang buluhatong pagtubos bag-ohay lang. . . Wala pa Niya gikuha ang Iyang puwesto. Busa, dili kadto ang Cristo nga miadto, ang Balaang Espiritu.

286 Dili sa pagsupak kanila nga inila nga mga tawo. Dili, sir, dili ko kana buhaton. Dili ko gigusto nga buhaton kana, apan mao kini kung unsa—kung unsa ang kapadayagan ko mahitungod Niini. Kita n’yo? Kung lahi man ang anaa kaninyo, bueno, okey ra kana, apan dili kini okey alang kanako. Nakita n’yo, akong—sa ingon niining paagi ko ginatoohan Kini. Kita n’yo, karon, nasayod na mo kung unsa. Kita n’yo?

287 Ug, matikdi, wala na magpakita si Cristo, kita n’yo, gikan niadtong panahona. Apan nagasakay Siya sa puting kabayo. Busa kung kining tawhana nagasakay usab sa puting kabayo, siya ang nagpakaaron-ingnon lamang nga Cristo. Kita n’yo? Nakuha ba ninyo kana? [Nagaingon ang kongregasyon, “Amen.”—Ed.]

288 Matikdi, kining nagasakay sa puting kabayo wala man lang ngalan. Nagagamit man siya og duha o tulo ka mga titulo, kita n’yo, apan wala siya og unsa man lang nga ngalan.

289 Apan si Cristo adunay Ngalan! Unsa man kini? Ang Pulong sa Dios. Mao kana kung unsa kini. “Sa sinugdan mao ang Pulong, ug ang Pulong kauban sa Dios, ug ang Pulong mao ang Dios. Ug ang Pulong, nahimong unod.” Kita n’yo? Kining nagasakay walay ngalan, apan si Cristo gitawag og, “Ang Pulong sa Dios.” Mao kana kung unsa Siya. Gitawag Siya nga ingon niana. Karon aduna Siya og usa ka Ngalan nga walay tawo ang nasayod; apan Siya gitawag og, “Ang Pulong sa Dios.”

Kining tawhana wala gitawag og unsa man, kita n’yo, apan nagsakay siya sa usa ka puting kabayo.

290 Ang maong mangangabayo walay mga udyong para sa iyang pana. Namatikdan ba ninyo? Aduna siya’y pana, apan walay gisulti bahin sa kung aduna ba siya’y mga udyong, busa siguradong usa siya ka tigpakaaron-ingnon. Husto. Mahimong aduna siya og daghang dalugdog, pero walay kilat. Apan makita ninyo, si Cristo aduna og parehong kilat ug dalugdog, tungod kay gikan sa Iyang baba nagagula ang usa ka mahait nga Espada nga duhay-sulab, ug Iya Kining igatibas sa kanasuran. Pero kining tawhana walay bisan unsa man lang nga panigbas, kita n’yo, apan manglihok siya nga nagpakaaron-ingnon. Nagapangabayo siya, nagasakay sa puting kabayo, migula aron sa pagpangdaug.

291 Si Cristo adunay usa ka mahait nga Espada, ug, bantayi, nagagikan Kini sa Iyang baba. Ang buhi nga Pulong, nga mao, ang Pulong sa Dios nga gipadayag ngadto sa Iyang mga alagad. Sama sa Iyang giingon kang Moises, “Lakaw, tindog ka didto, ug ibayaw kana nga sungkod didto; tawga ang mga langaw,” ug mitungha ang mga langaw. Oo. Bisan unsa ang iyang gisulti, gipahitabo kadto sa Dios; ug nangatuman, ang Iyang buhing Pulong. Ang Dios ug ang Iyang Pulong mao rang Persona. Ang Dios mao ang Pulong.

292 Kinsa man kining misteryosong mangangabayo sa unang kapanahonan sa iglesia kung ingon niana? Kinsa man siya? Hunahunaon nato kana. Kinsa man kining misteryosong mangangabayo nga sugod mitungha niadtong unang kapanahonan sa iglesia ug nangabayo diretso ngadto sa Eternidad, paingon sa katapusan?

293 Mitungha ang Ikaduhang Selyo ug nagpadayon kini hangtud sa katapusan. Mitungha ang Ikatulo nga Selyo ug nagpadayon kini hangtud sa katapusan. Ang Ikaupat, Ikalima, Ika-unom, Ikapito, ang matag usa kanila, mipadayon mismo dinhi sa katapusan. Ug sa katapusang panahon, kining mga Basahon nga linukot sa tanan niining nangaging mga panahon, uban sa niining mga tinago kanila, naablihan Kini. Dayon nanggawas ang maong mga tinago, aron makita kung unsa kini. Apan, sa pagkatinuod, nagpasugod kini sa unang kapanahonan pa sa iglesia, tungod kay ang iglesia, ang unang kapanahonan sa iglesia, nadawat man ang Mensahe nga sama Niini. [Nagapanuktok si Igsoong Branham sa pulpito sa tulo ka higayon—Ed.]

294 “Usa ka nagsakay sa puting-kabayo ang migula.” Kita n’yo? Kinsa man siya? Gamhanan siya sa iyang nagapangdaug nga gahum. Usa siya ka bantugan nga tawo sa iyang nagapangdaug nga gahum. Gusto n’yo bang isulti ko kaninyo kung kinsa siya? Siya ang anticristo. Sa kaeksakto kung unsa siya. Karon, tungod kay, nakita n’yo, kung anticristo man; miingon si Jesus, nga, “Ang duha mamahimong halos magkapareho na gyud hangtud ipahisalaag niini ang mismong mga Pinili (ang Pangasawonon) kung arang mahimo pa.” Anticristo, kini ang anticristong espiritu.

295 Hinumdomi, sa mga kapanahonan sa iglesia, sa dihang gihisgotan nato ang unang kapanahonan sa iglesia kaniadto, nakita nato nga ang Balaang Espiritu supak gayud sa usa ka butang nga ilang gisugdan sa nianang kapanahonan sa iglesia, ug gitawag kadto nga “mga buhat sa mga Nicolaita.” Nahinumdoman ba ninyo kini? [Nagaingon ang kongregasyon, “Amen.”—Ed.] Ang buut ipasabot sa *Nikao* mao “ang pagpanaug.” Ang *laita* ang buut ipasabot niini “ang iglesia,” ang mga yanong tawo. *Nico-Laita*, “ang pagpanaug sa mga yanong tawo.” “Pahawaon ang Balaang Espiritu gikan sa iglesia

ug ihatag Kini tanan ngadto sa usa ra ka balaang tawo. Himoon siyang mao ang dakodako sa tanan niini.” Natun-an na ninyo kini, kita n’yo, Nicolaita. Matikdi, ang Nicolaita kaniadto “usa—usa pa lang ka panultihon,” diha sa usa ka iglesia. Dayon nahimo kining “usa ka doktrina,” sa sunod nga kapanahonan sa iglesia. Ug sa ikatulong kapanahonan sa iglesia, kini’y “usa na ka pag-puwersa,” ug gipahigayon nila ang Konseho sa Nicaea. Ug nahimo kini didto nga usa—usa na ka doktrina sa iglesia. Ug unsa man ang unang butang nga nahitabo? Usa ka organisasyon ang natukod gumikan didto! Karon, husto ba kana? [“Amen.”]

²⁹⁶ Sultihi ko ninyo kung asa naggikan ang unang organisadong iglesia. Ang iglesiang Romano Katoliko! Sultihi ko ninyo kung wala ba nagsulti ang Pinadayag, diha sa Basahon sa Pinadayag 17, nga, “Siya usa ka bigaon, ug ang iyang babayeng mga anak mga bigaon usab.” Kana’y pareho rang butang nga nag-organisar nga kauban kaniya, “mga bigaon.” “Ginatudlo ang mga dulumtanan, kahugawan sa ilang mga pagpanapaw, ingon nga mga doktrina.” “Ilang gipaka-doktrina ang mga kasugoan nga iya sa tawo.” Himatikdi.

²⁹⁷ Tan-awa, nagsugod siya sa pagpangbuntog. Matikdi, wala siya’y korona. Ang nagsakay sa puting-kabayo, ang ginahisgotan ko dinhi. Kita n’yo? “Usa ka pana; ug usa ka korona ang gihatag kaniya, sa katapusan.” Kita n’yo? Wala siya’y korona, sa sinugdanan, apan pagkahuman usa ka korona ang gihatag kaniya. Matikdi, sa kaulahian gihatagan siya og korona, oo, tulo kini, tulo diha sa usa ra. Kana’y tulo ka gatus ka tuig pagkahuman niadto, didto sa Konseho sa Nicaea. Sa dihang nagsugod pa lang siya, usa ra ka espiritu sa Nicolaita, aron magtukod og usa ka organisasyon taliwala sa mga tawo. Ug dayon nagpadayon kini, nga nagpadayon, nga nagpadayon, nga nahimong “usa ka panultihon,” dayon nahimo nang “usa ka doktrina.”

²⁹⁸ Hinumdoman ninyo, si Cristo namulong didto sa iglesia, miingon, “Imong ginadumtan ang mga buhat sa niining mga Nicolaita, nga ginadumtan Ko, usab.” Nangingkamot sa pagpangbuntog, pulihan ang Balaang Espiritu og aron usa na lamang ka santo nga tawo; nga makapasaylo sa tanang sala ug tanan na.

²⁹⁹ Ug bag-ohay lang nato kini nabasa dinha, si Pablo nga naghigot bahin niini. Kana nga butang molingkod na sa katapusang mga adlaw. Ug dili pa siya mahimong ipadayag hangtud sa katapusang mga adlaw. “Dayon, Siya nga nagapugong niini, kuhaon na ang Espiritu sa Dios dinha; ug dayon iya nang ipadayag ang iyang kaugalingon.”

³⁰⁰ Karon anaa siya ilalum sa pagtakuban sa usa ka puting kabayo. Bantayi kon ginaunsa niya pagbalhin gikan nianang puting kabayo, taudtaud. Dili lamang siya nahimong usa ka

puting kabayo; nahimo siyang mananap nga adunay daghang mga ulo ug mga sungay. Kita n'yo? Kita n'yo? Sa puting kabayo, usa siya ka maglilimbong, ug kana ang hinungdan nga ang mga tawo wala masayod niini sa tanan niining nangaging mga panahon. Gihunahuna nila kini. Apan ania na kini karon, mapadayag na kini pinaagi sa Kasulatan. Himatikdi.

³⁰¹ Sa dihang ang Nicolaita, kita n'yo, ang anticristo, sa kaulahian nahimo siyang tawo, dayon gikoronahan siya. Sa dihang nagsugod pa siya, ingon nga espiritung Nicolaita sa iglesia, usa siya ka espiritu. Dili n'yo man mahimong koronahan ang espiritu. Apan paglabay sa tulo ka gatus ka tuig, nahimo siyang usa ka papa, ug dayon gikoronahan na nila siya. Wala pa siya'y korona, sa sinugdanan. Apan nagkaaduna siya og korona, sa kadugayan, kita n'yo, sa diha nga kanang espiritu nahimong usa na ka tawo. Kita n'yo? Nahimo na siyang usa ka tawo. Ang Nicolaitang doktrina nahimong tawo, dayon puede na nila siyang koronahan. Dili pa nila siya makoronahan kaniadto, tungod kay, usa pa man lang siya ka doktrina.

³⁰² Himaya! Himatikdi! Ug kung kining Balaang Espiritu nga ania kanato magpakatawo kanato, Kining ania sa atong taliwala karon diha sa pormang Espiritu Santo, magpakatawo sa ato, sa Persona ni Jesus Cristo, ato Siyang pagakoronahan nga Hari sa mga hari. Husto kana. Kita n'yo?

³⁰³ Karon, hinumdumi, sa mao rang panahon nga miabot si Cristo sa Trono, miabot usab ang anticristo sa iyang trono, si Judas. Sa mao rang panahon nga mibiya si Cristo sa yuta, mibiya usab si Judas sa yuta. Sa mao rang panahon nga mibalik ang Balaang Espiritu, ang anticristo mobalik usab.

³⁰⁴ Kabalo mo, si John miingon dinhi, “Mga anak, dili ko buut nga dili mo masayod, kabalo mo, bahin sa anticristo, nga siya ania na karon ug nagalihok sa mga anak nga dili- masinugtanon.” Ang anticristo kung ingon-ana, anaa na kaniadto, nga nagasugod porma kaniadto og espiritu sa Nicolaita, aron magtukod og usa ka organisasyon.

³⁰⁵ Mao diay nga gikasilagan ko gyud kana nga butang! Kita n'yo? Kita n'yo? Mao kana. Dili kini ako; ang Usa ka butang kini nga ania sa sulod. Anaa na ang maong butang. Nahayag na kini. Nakita ba ninyo kini? [Nagaingon ang kongregasyon, “Amen.”—Ed.] Ug galibot-libot lang ako ani sa una. Dili ko makita kini hangtud lang karon. Ug nasayran ko na kini karon. Anaa na kini. Kanang espiritu sa Nicolaita, gikaligtugotan sa Dios.

³⁰⁶ Ug karon kana nga espiritu nahimong usa na ka tawo, ug gikoronahan nila kini. Ug ania na kini mismo, kung unsa ang giingon sa Biblia nga ilang buhaton bahin niini. Pagkatukma gayud. Oh, grabe! Usa na ka tawo! Nahimo na nga usa ka tawo, ug dayon gikoronahan na nila siya.

307 Basaha og ayo, himatikdi! O, basaha, diay, kung unsa ang giingon ni Daniel nga magahari kini sa gingharian sa iglesia. Gusto ba ninyong basahon kini? [Ang kongregasyon, “Amen.”—Ed.] Aduna pa kita og oras aron himoon kana, dili ba? [“Amen.”] Sige. Paminaw. Mobalik kita kang Daniel, sa makadiyut lang. Balikan nato ang Libro sa Daniel, ug basahon lang nato sa makadiyut. Ug dili man kita siguro magdugay og dugang kinse, baynte minutos, o traynta, o mga ingon niana. Sige? [“Amen.”]

308 Adtoan nato ang Daniel, ang ika-11 nga kapitulo, ug basahon nato ang ika-21 nga bersekulo. Ania si Daniel, si Daniel nga nagahisgot karon kung unsaon paghari niining tawhana.

Ug sa iyang dapit motindog ang usa ka tawo nga talamayon, (Roma, ang gipahanungdan niini), nga kaniya wala nila ikahatag ang kadungganan sa gingharian: (karon bantayi) apan siya moanha nga madaiton. . . moanha siya nga madaiton, ug makuha ang gingharian pinaagi sa mga pag-ulo-ulo.

309 Eksaktong mao gyud ang gibuhad niini! Mao kana ang gisulti ni Daniel nga pagabuhaton niining anticristo. Mohaom siya sa gusto sa mga tawo. Oo, mohaom kini sa ilang—sa ilang mga hilig alang niining adlaw, alang niining mga iglesia. Tungod, sa niining kapanahonan sa iglesia, dili nila gusto ang Pulong, si Cristo, apan gusto nila ang iglesia. Ang unang butang, dili sila mangutana kaninyo kon kamo ba Cristohanon. “Miyembro ka sa unsa man nga iglesia? Unsa nga iglesia?” Ayaw nila kang Cristo, ang Pulong. Adto mo, sultih sila mahitungod sa Pulong ug unsaon nga magmatul-id, dili sila gusto Niana. Gusto nila ang butang, nga puede silang magkinabuhi og unsa na lang nga gusto nila, ug magpabilin sa gihapon nga miyembro sa iglesia ug mao lang gihapon ang ilang testimonyo. Kita n’yo? Kita n’yo? Busa, mohaom mismo siya sa ilang mga hilig. Ug, hinumdumi, sa kaulhian gitawag siyang “babaye,” diha sa Biblia, ug siya usa ka bigaon ug nanganak og mga babaye. Nagahum gyud sa urog niining adlaw, kung unsa ang hilig sa mga tawo. Ania na kini.

310 Gisaad na kini sa Dios. Sa dihang gisalikway ang Pulong, nan igatugyan sila ngadto sa ilang mga hilig. Basahon nato pag-usab ang Mga Taga-Tesalonica. Tugoting. . . Gusto kong bantayan ninyo dinhi sa kadali. Oo, bueno, nabasa nato kana, bag-ohay lang. Ikaduhang Mga Taga-Tesalonica 2:9-11. Giingon Niini nga ila gyud kining buhaton. “Nga nagadumili, ginasalikway ang Kamatuoran, mao nga igatugyan sila ngadto sa dunot nga pagpanghunahuna, ug managpanoo sa usa ka bakak ug pagahukman tungod niini.” Karon mao kana ang—mao kana ang gisulti sa Balaang Espiritu.

311 Karon, dili ba kana man ang gusto sa iglesia karon? [Nagaingon ang kongregasyon, “Amen.”—Ed.] Sulaying isulti sa

mga tawo nga kinahanglan nila nga buhaton *kini, kana*, o ang *uban pa*, ug pahibaloon ka dayon nila nga mga Methodist sila, Presbyterian, o unsa pa, nga sila “ayaw nilang makigbugsay nga kauban mo diha sa inyong sakayan.” Kita n’yo? Mao gyud. Mao kana’y ilang gusto.

³¹² Ug miingon ang Dios, “Kung gusto nila kini, pasagdan Ko sila niini. Ug sa tinuod lang ipatoo Ko sila mismo nga kana ang Kamatuoran, tungod kay hatagan Ko sila og dunot nga pagpanghunahuna mahitungod sa Kamatuoran.” Karon tan-awa dinhi kung unsa ang gisulti sa Biblia, pud, “Maingon nga si Jannes ug Jambres misupak kang Moises, maingon man usab sa niining mga tawo sa katapusang mga adlaw, nga adunay dunot nga pagpanghunahuna mahitungod sa Kamatuoran; ug ginabaylo ang grasya sa atong Dios ngadto sa kalaw-ayan, nga ginalimod ang Ginoong Dios.”

³¹³ Karon nakita ninyo kung asa na kini; dili lamang sa Katoliko, kondili sa Protestante. Tibuok na kini. Tibuok na kini nga organisadong kalibutan. Ingon niana ang nagasakay sa puting-kabayo, ilalum sa—sa pamaagi sa—sa—sa usa ka (puti) pagkamatarung, iglesia, kita n’yo, apan anticristo diay. Kinahanglan nga halos pareho gyud kon tan-awon. Sa kabayo, pa lang, pareho gyud sa pag-abot ni Cristo nga nakasakay sa kabayo. Kita n’yo? Oh, anti, halos magkapareho gyud nga kon mahimo malimbongan ang mismong mga Pinili! Ug ania na siya. Siya mao ang anticristo.

³¹⁴ Nagsugod siya nga nagasakay sa kabayo diha sa unang kapanahonan sa iglesia. Karon padayon siya nga nagapangabayo, diha sa tanan nga nangaging mga kapanahonan. Karon bantayi siya. Moingon mo, “Gikan pa, sukad pa ba kaniadto sa panahon sa mga apostoles?” Gitawag lang siya nga “Nicolaita” kaniadto. Dayon, sa sunod nga kapanahonan sa iglesia, nahimo na siyang “usa ka doktrina” sa iglesia. Una, siya kaniadto “usa ra ka panultihon,” dayon nahimo siyang “usa ka doktrina.”

³¹⁵ Ang mga maayong-laki, mga tawong inila, nagbisti-og-maayo, edukado, hinashasan, ayaw nila nianang tanan nga mga pagsaba-saba sulod sa iglesia. Ayaw nila, “Kanang mga butang nga iya sa Espiritu Santo. Kinahanglan nga usa ra gyud ka iglesia! Ug kitang tanan magaagi gayud sa Konseho sa Nicaea, ug kung unsa pa, sa Roma.” Dayon pag-adto nila didto, nakuha nila ang pagka-iglesia, ug nakuha nila ang paganismo, ang Romanong Katolisis...o ang paganismo, ang paganong Roma, ug ang pipila ka mga tootoo. Ug gidawat si—si Astarte, “ang rayna sa langit,” ug gihimo kini nga Maria, ang inahan. Naghimohimo og mga tigpataliwala gikan sa mga patay nga tawo, ug uban pa. Ug gidawat kanang lingin nga kosher nga ostya, ginahimo nila kini gihapon nga lingin, ug gitawag kini nga lawas ni Cristo, “tungod kay ginarepresentar niini kono

ang inahan sa langit.” Ug kada agi sa Katoliko, manguros siya. Tungod kay, ang kahayag nga nagadilaab dinha, mao man kono ang ostya nga nahimong Dios, tungod sa gahum sa pari. Sa dihang, kini walay lain kundi klaro lamang nga paganismo gyud. Kita n’yo? Husto kana.

³¹⁶ Dili ko gyud kini masabtan. Pero, oo, nasabtan ko. Oo, nasabtan ko. Oo, sir! Nasabtan ko kini, tungod sa grasya sa Dios. Tinuod.

³¹⁷ Karon matikdi. Oh, grabe, giunsa man nila kana pagbuhat! Kita n’yo? Ug gitugyan sila ngadto sa ilang mga hilig. Dili, tinuod kana, dili n’yo man kinahanglan nga buhaton Kana. Dili, sir. Kon dili ninyo gustong buhaton Kana, dili man mo pugson nga buhaton gyud Kana. Kon dili ninyo gustong mosunod sa mga pamaagi sa Dios sa pagkinabuhi ug ingon-anang mga butang, ug ang pagsimba, dili n’yo man kinahanglan nga buhaton Kana. Wala man ang Dios gapamugos kang bisan kinsa nga buhaton gyud Kana.

³¹⁸ Apan tugoting isulti ko kaninyo ang usa ka butang. Kung ang inyong ngalan nasulat sa Libro sa Kinabuhi sa Cordero sa wala pa ang pagkatukod sa kalibutan, malipayon kaayo mo nga buhaton Kana, dili na mo makahulat pa og diyutay aron nga buhaton Kana.

³¹⁹ Tan-awa dinhi. Moingon mo, “Buut kong masabtan mo, nga relihiyoso pud ko!” Bueno, mahimong tinuod kana.

³²⁰ Tan-awa, kinsa man ang makasulti nga ang mga pari kaniadto dili relihiyoso, niadtong mga adlaw ni Ginoong Jesus? Kinsa man ang makasulti nga ang Israel kaniadto dili relihiyoso, didto sa kamingawan? Sa dihang sila kaniadto bisan . . .

“Bueno, ang Dios nagpanalangin man kanako sa daghang mga higayon!”

³²¹ Oo, Iya pud silang gipanalanginan, kaniadto. Ni dili man gani nila kinahanglan magtrabaho aron mabuhi. Gipakaon Niya sila gikan sa langit. Ug miingon si Jesus, “Silang, tanan, nangalaglag ug nangamatay ug nangahanaw.”

³²² “Ang among mga ginikanan,” ang ingon nila, “nangaon sa mana sa kamingawan, sulod sa kuwarenta ka tuig.”

³²³ Miingon si Jesus, “Ug sila, ang matag usa kanila, nangamatay, Walay Katapusan nga nahimulag.” Kita n’yo? Miingon Siya, “Apan Ako mao ang Tinapay sa Kinabuhi nga nagagikan sa Dios sa Langit. Ang tawo nga nagakaon niining Tinapay, dili na gayud siya mamatay.” Kita n’yo? Siya ang Kahoy sa Kinabuhi.

³²⁴ Matikdi kung giunsa ug sa diha nga miabot si Jesus. Kadtong mga pari, silang mga atua didto, mga relihiyoso kaayo. Aba, wala ni usa ang makasulti nga sila dili mga maayong tawo. Grabe! Naglakaw sila subay gayud nianang linya sa

kasugoan. Ang tanan mismong gisulti nianang iglesia, gibuhat nila. Kay kung dili man, pagabatohon sila. Ug busa miadto Siya didto. . . Kabalo mo kung unsa ang tawag ni Jesus ngadto kanila? Gitawag sila ni Juan kaniadto, “Kamong pundok sa mga bitin sa kasagbotan! Ayaw kamo paghunahuna, tungod nga miyembro kamo nianang organisasyon, aduna na kamo’y kahilambigitan sa Dios.” Ug miingon si Jesus, “Ang yawa, mao ang inyong amahan.” Miingon pa, “Sa matag higayon nga ang Dios nagapadala og propeta, unsa man ang nagakahitabo? Ginabato ninyo siya ug ginalabay siya ngadto sa lubnganan. Ug karon nagaadto mo didto ug ginapasinaw sa iyang lubnganan.”

³²⁵ Dili ba mao ra man kana sa gihapon ang gibuhat sa iglesiang Katoliko? Tan-awa si Joan of Arc, ug si San Patrick, ug ang tanang uban pa kanila. Sila kadto ang naglubong kanila. Ug dayon gikalot ang patay’ng lawas ni Joan of Arc, ug gilabay kini ngadto sa suba, duha ka gatus ka tuig ang milabay. Ug gisunog siya ingon nga usa ka barangan.

³²⁶ “Ang yawa, mao ang inyong amahan, ug ang iyang binuhatan inyong ginapangbuhat.” Eksakto gyud kana. Mokaylap kini sa tibuk kalibutan. Kita n’yo? Husto! Mao kana ang giingon ni Jesus.

³²⁷ Ug naghunahuna kamo nga kini maayo, maanindot tanawon, kining puti nga kabayo. Apan tan-awa kung unsa ang nadangtan ninyo. Eksaktong ingon niana ang nagasakay niini. Karon, apan miingon Siya nga gigusto man nila kini, busa dalhon Niya sila ngadto sa buhat sa kasaypanan.

³²⁸ Hinumdomi, kining bigaon sa Pinadayag 17, siya mao ang tinagong, “TINAGONG, BABILONIA, ANG INAHAN SA MGA BIGAON.” Ug nahingangha si Juan kaniya. Sama sa niining tawo. . . Tan-awa, sa makadiyut, mopadulong kita niana ug bantayi siyang nagatan-aw sa niining kabayo dinhi. Kita n’yo? Apan matikdan ninyo kini. . . Ang nahitabo niini, nga, “Siya nahingangha kaniya sa dakung pagkahibulong.” Apan ang tinago mao, nga, “miinom siya sa dugo sa gipamatay’ng mga saksi ni Cristo.” Usa ka maanindot nga iglesiang napahimutang didto, nadayandayanan sa purpura ug bulawan, “Ug siya adunay copa diha sa iyang kamot, ang kahugaw sa iyang mga pagpakighilawas.”

³²⁹ Unsa ma’y pasabot og pagpakighilawas? Ang dili matarung nga pagkinabuhi. Kana ang doktrina nga iyang ginapakaylap. Gamiton ang Pulong sa Dios ug himoon Kining walay-epekto, pinaagi sa pipila ka “Maghimaya ka Maria,” ug tanan na niining uban pa nga matang sa mga butang, ug itudlo kini. “Ug ang mga hari sa yuta nakapakighilawas uban kaniya.”

“Bueno,” moingon mo, “ang iglesiang Katoliko man kana.”

³³⁰ Apan siya man ang “inahan sa mga bigaon,” kita n’yo, mao pud sila kung unsa siya. Mao gyud.

331 Unsa ma'y nahitabo? Sa dihang ang repormador namatay ug ang iyang mensahe milabay na, inyong gi... Giorganisar ninyo kini, ug nagbutang og pundok sa mga "Ricky" dinha, ug gisugdan ang butang pabalik aron magkinabuhi na usab sa paagi nga gigusto ninyo. Dili ninyo gustong magpabilin sa Pulong. Imbes nga magpadayon kauban sa Pulong, mihunong hinoon sila dinha og, "*Mao na Kini.*" Huh! Ayaw gyud ninyo kana buhata.

Siya, Kini na, kita n'yo, Siya nga atua sa Kahitas-an!

332 Himatikdi, kana ang usa ka butang. Gusto pa natong mahisgotan ang pipila ka mga dapit niini sa dili pa ang pagtapos.

333 Siya ang prinsiphe nga nagpamatay; sa katawhan ni Daniel. Nagatoo ba kamo niana? Karon isaysay ko kini, kung tabangan lang ninyo ako ug tugotan ninyo ako sulod sa pipila lang ka minuto, akong—buhaton ko kini nga mas madali ingon sa akong mahimo. Apan gusto kong buhaton kini nga positibo, tungod kay akong... gihatag Kini kanako sa Balaang Espiritu, nga ingon ka sigurado nga ako nagabarug dinhi. Kita n'yo? Kita n'yo?

334 Karon tan-awa, kuhaon nato, balikan nato sa Daniel pag-usab, sa makadiyut lang. Aduna ko'y gustong basahon para sa inyo, kung unsa... Kung ayaw ninyong balikan, okey lang. Gusto kong basahon ang Daniel 9, Daniel 9. Ug gusto kong basahon ang ika-26 ug ika-27 nga bersekulo sa Daniel 9. Ug, bantayi, kung siya ba ang maoy magapamatay sa katawhan ni Daniel, unsa ba ang iyang pagabuhaton.

Ug sa tapus ang kan-uman ug duha ka semana, ang Mesias pagapatyon,...

335 Kita n'yo, kana ang kan-uman ug duha ka semana nga Siya pagapatyon, gikan sa kapitoan ka semana.

... dili para sa iyang kaugalingon: apan alang sa mga tawo ug ang prinsiphe (ang hierarkiya kana sa karon) nga moanha (nga magaabot pa lang kaniadto) maoy moguba sa siyudad ug... sa santuwaryo; ug ang katapusan niini mahiuban sa dakong baha, ug bisan hangtud sa katapusan sa gubat mga pagkalumpag gitagal nga daan.

336 Aduna ko'y gustong ipangutana kaninyong mga tawo. Sa tapos nga si Cristo nahimulag gikan sa yuta, human sa tulo ug tunga ka tuig sa Iyang pagministeryo, ug unsa man ang nagguba sa templo? Kinsa man ang nagguba niini? Ang Roma! Oo. Si Constantino o, dili, pasayloa ko, si Titus diay, ang Romanong heneral, siya nga maoy nagpatay sa prinsiphe. Karon matikdi.

Bantayi kini, mga igsoon. Dumuol mismo ngari, niining bongbong.

337 Sa dihang natawo si Jesus, ang pula nga dragon sa langit miadto mismo sa babaye, aron tukbon ang iyang Anak inigkahimugso na Niini. Husto ba kana? [Nagaingon ang

kongregasyon, “Amen.”—Ed.] Kinsa man kadto, nga naninguha nga matukob ang maong Bata pagkahimugso Niini? [“Roma.”] Ang Roma. Kita n’yo? Kana mao ang pula nga dragon. Ania ang inyong prinsiphe. Ania ang inyong mapintas-nga-mananap. Kita n’yo? Mao kana sila, ang matag usa kanila, mao ra, kita n’yo, “tukbon ang maong Bata.” Gisakgaw Kini sa Dios pataas ngadto sa Langit ug nagalingkod na diha sa Iyang Trono. Dinha kon diin karon si Cristo hangtud sa gikatakadang panahon. Kita n’yo? Karon, bantayi kung unsa ang iyang pagabuhaton.

³³⁸ Karon, oh, karon, nagatoo ko nga nakigsulti ako kaniadto sa usa ka igsoon dinhi. Tingali si Igsoong Robertson kadto nga ania karon, o ubang igsoon nga akong gika-estorya, bahin niini; Dili bahin niini dinhi, pero pareho lang nga butang. Nagatoo ko nga nawali ko na ang bahin niini dinhi, dili pa lang dugay, kung unsa ang mahitabo niining Estados Unidos, bahin niining kahintang sa salapi. Kita n’yo? Bueno, nagapangutang kita karon nga pagabayran gikan sa mga buhis nga pagakolektahon pa lang kwarenta ka tuig gikan karon. Ingon niana na kita ka ulahi. Nakapaminaw na ba mo sa KAIR, o sa Lifeline, ug nadungog kini, kita n’yo, kadtong gikan sa Washington? Aba, grabe na ang atong pagkabangkaruta. Kana tanan.

³³⁹ Unsa man ang hinungdan? Aduna na’y nanghipos sa mga bulawan, ug ang mga Judio mao na ang nagkupot sa mga dokumento sa panalapi. Pero ang Roma ang manag-iyang niini sa kaulahian. Karon bantayi. Nasayod kita kung kinsa ang nanag-iyang sa dagkung mga tindahan, pero ang Roma ang adunay pinakadaku nga bahin sa bahandi sa kalibutan. Ang uban niini, panag-iyang sa mga Judio. Karon bantayi kini. Karon paminawa kini, kung giunsa kini pagpadayag sa Balaang Espiritu kanako.

Ug siya magapamatuod sa lig-on nga tugon uban sa daghan sulod sa usa ka semana: (karon bantayi) ug sa tunga-tunga sa semana iyang pahunongon ang paghalad ug ang mga halad-nga-kalan-on, . . . ibabaw sa pako sa dulumtanan moanhi ang magalumpag, ug bisan hangtud sa pagtibawas, ug kana sanglit natagal na gyud ang kaligutgot igabubo sa ibabaw sa linumpag.

³⁴⁰ Bantayi! Oh, daw sa unsa ka maliputon nga butang siya! Ania na siya. Karon, nakuha nato ang paghulagway ug nasayran nga siya mao ang Roma. Nasayran nato nga siya ang nagasakay sa puting-kabayo. Nasayod kita nga siya ang migawas ingon nga usa ka doktrina. Ug unsa man ang nahitabo sa paganong Roma? Nahimo nga papanhong Roma, ug gikoronahan.

³⁴¹ Karon bantayi, “Sa katapusan nga panahon.” Dili sa unang mga adlaw niadtong si Cristo nagawali pa, kondili, “sa katapusan nga panahon,” sa katapusan nga bahin sa semana, diin bag-ohay lang nato gihisgotan ang kapitoan ka semana ni Daniel. Ug si Cristo nagproposiya sulod sa tulo ug tunga

ka tuig, ug tulo ug tunga ka tuig pa ang nahabilin. Husto ba kana? [Nagaingon ang kongregasyon, “Amen.”—Ed.] Ug kining principe nianang panahona magahimo og usa ka pagpakigsaad uban sa kaliwat ni Daniel, nga mao ang mga Judio.

Gisakgaw na ang Pangasaw-onon nianang panahona. Dili na niya kana masaksihan.

³⁴² Matikdi, sa ulahing katunga sa semana ni Daniel, ang maong mga tawo mosulod sa usa ka pakigsabut. Ang kining principe mosulod sa usa ka kasabutan uban sa Roma, mosulod sa usa ka kasabutan uban kanila, sa walay duhaduha tungod kini sa mga bahandi, tungod nga ang Katoliko ug mga Judio mao na man ang nagkupot sa bahandi sa kalibutan.

³⁴³ Didto ako kaniadto sa Vatican. Nakita ko ang triple nga korona. Aduna unta ko og usa ka pagpakighinabi sa papa didto; si Baron Von Blomberg ang nagpahigayon niadto alang kanako, sa usa ka . . . sa Miyerkules unta kadto sa hapon sa alas tres.

³⁴⁴ Ug sa dihing dalhon na nila ako sa maong hari, ilang gitangtang ang mga pinilo diha sa akong karsones. Okey ra man kana. Gisultihan ako nga dili gayud siya talikdan, pagmohawa ka na. Okey ra man kana.

Apan ingon ako, “Unsa ma’y akong buhaton atubangan niining tawhana?”

³⁴⁵ Miingon, “Bueno, mosulod ka lang ug iluhod mo ang usa ka tuhod ug mohalok sa iyang tudlo.”

³⁴⁶ Miingon ako, “Dili puede. Dili puede na. Dili, sir.” Ingon ko, “Akong—tawgon ko ang si bisan kinsa man nga tawo nga gustong mamahimong igsoon. Puede ko pud siya tawgon nga reberendo, kung gusto niya ang maong titulo. Apan, ang simbahon ang usa ka tawo, para lang gyud kana kang Jesus Cristo.” Kita n’yo? Dili. Dili, sir. Dili nga mohalok sa kamot sa tawo nga sama niana. Dili, gayud. Busa, wala ko gibuhat kadto.

³⁴⁷ Apan nalibot ko gyud ang tibuok Vatican. Aba, dili mo kini mapalit bisan ginatus pa ka binilyon nga dolyares. Bueno, inyong . . . Ug hunahunaa n’yo lang, “Ang bahandi sa kalibutan,” ang ingon sa Biblia, “nakaplag diha kaniya.” Oh, kung mahunahunaan n’yo lang ang magarbohong mga lugar, nga binilyon ka pilo . . .

³⁴⁸ Nganong mitungha man ang komunismo didto sa lugar sa Russia? Kasukaon gyud ko, pagmadungog ko ang daghang mga ministro nga nagasinggit batok sa komunismo, ug wala gani sila masayod kung unsa ang ilang ginasinggit. Husto kana. Bale wala ang komunismo. Usa lamang kini ka himan diha sa kamot sa Dios, aron magdala og pagpanimalos ibabaw sa yuta, tungod sa mga dugo sa mga balaan. Husto kana.

³⁴⁹ Ug human nga masakgaw na ang Iglesia, ang Roma ug—ug ang mga Judio maghimo og usa ka pagpakigsaad sa usa’g

usa. Nagsulti ang Biblia nga buhaton nila, kauban ang balaang katawhan. Ug karon matikdi, buhaton nila kana tungod kay (ngano man?) kini nga nasud mabangkaruta man. Ug ang uban pa nga nasud sa kalibutan nga anaa sa bulawan nga basihan magkabangkaruta pud. Kabalo mo niana. Kung nangabuhi kita gikan sa mga buhis, tungod sa mga utang, buhis nga pagakolektahon pa lang mga kwarenta ka tuig gikan karon, asa na kita?

³⁵⁰ Adunay usa lamang ka butang ang puedeng mahitabo, kanang, ang bag-ohon ang panalapi ug bayran ang mga utang. Ug dili nato kini mabuhat. Gipanag-iya na sa Wall Street ang mga niini, ug kontrolado sa mga Judio ang Wall Street. Ang tanang uban pa niini atua sa Vatican. Ug ang uban pa niini gikuptan sa mga Judio didto sa Wall Street, uban na niini ang komersyo sa kalibutan. Dili nato kini mapulihan.

³⁵¹ Ug kung mabuhat man nila kini, sa hunahuna ninyo ba . . . Kining mga tawo nga nagahimo'g bino ug—ug ang tanang mga tawo nga nagahimo'g tabako, nga, mokita og binilyon ka pinilong dolyares matag tuig, ug paubsan ang tibuok balayronon nila sa buhis tungod niining mga mahilas nga mga hulagway ug ingon-anang mga butang. Ug mamuhunan didto sa Arizona, ug mamalit og mga minilyon nga ektarya-ektarya sa yuta, o mga linibo niini, ug mangkalot og dagkung mga atabay, sa singkwenta ka libong mga dolyares, ug dili na pabayron og buhis sa kinitaan. Ug ibalhog kamo nila sa bilangoan kung dili ninyo bayran ang sa inyo. Apan dili na sila ginapabayad, ug mangkalot sila og mga atabay, ug magpadala og mga bulldoser. Ug unsa man ang ilang ginabuhat? Mangtukod sila didto og mga proyektong pabalay, pagkasunod nga termino, gamit ang ilang mga kinita. Kinahanglan nilang mamuhunan. Ug mangtukod og mga balay, mga proyekto, didto, ug ipangbaligya kini sa minilyon ka dolyares. Sa hunahuna n'yo ba nga magapakigkompromiso sila, aron mapulihan ang mga panalapi?

³⁵² Pareho niining tawhana dinhi sa . . . Unsa gani iyang ngalan? Si Castro. Gibuhat niya ang pinakamaalamon nga buhat nga iyang gibuhat, dayon, sa dihang wala niya giila ang mga dokumentong panalapi, gipangbayaran kini ug gipakawalay-bili kini.

³⁵³ Himatikdi, apan dili nato mabuhat kana. Dili kini katugotan sa niining mga tawo. Mga adunahan nga mga negosyante sa kalibutan ang nagkupot niini.

³⁵⁴ Ug dayon adunay usa lamang ka butang ang puedeng buhaton. Mahimo kining bayaran sa iglesiang Katoliko. Siya lamang ang nag-inusara nga adunay kwarta. Ug may kasarang siya nga bayaran kini, ug buhaton niya kini. Ug sa pagbuhat niya niini, aron mahimo niya kini, makigkompromiso siya sa mga Judio, aron magkaadunay kasabutan. Ug pag-aduna na

siya'y kasabutan sa mga Judio . . . Karon, hinumdumi, ginakuha ko kini gikan sa Kasulatan. Ug karon, pagnabuhat na niya kini, ug aduna na'y kasabutan, mamatikdan nato, diha sa Daniel 8:23 ug 25, “pagapauswagon niya ang panginabuhian,” ug ang panginabuhian mao ang *paghimo'g-mga-produkto*, “diha sa iyang kamot.” Ug ipahigayon niya kining kasabutan kauban sa mga Judio.

³⁵⁵ Ug, sa tunga-tunga niining, tulo ug tunga na sa mga tuig, gubaon niya ang iyang gikasabutan, pagnakontrolar na niya ang maong tibuk butang, ug pagnahigtan na niya ang salapi sa mga Judio. Ug sa dihang napahigayon na niya kana . . . Oh, grabe! Oh, grabe!

³⁵⁶ Siya ang gitawag nga anticristo hangtud na sa katapusan sa kapanahonan sa iglesia, tungod kay siya man ang . . . siya ug ang iyang mga anak batok man kang Cristo ug sa Pulong. Kining tawhana gitawag nga anticristo.

³⁵⁷ Karon, pagakontrolon niya ang mga panalapi. Ug dinha kon diin sa tan-aw ko nga mosulod kini. Sa makadiyut lang, sa dihang gisulti ko na man kini, gusto kong balikan kini sa kadali.

³⁵⁸ Gitawag siya nga anticristo, ug pagatawgon nga ang anticristo, sa panan-aw sa Dios, hangtud sa katapusan sa panahon. Karon, apan pagatawgon usab siya og uban pa.

³⁵⁹ Karon, sa dihang nakontrolar na niya tanan ang panalapi, “Pagkahuman niana gubaon niya kining pagpakigsaad niya uban sa mga Judio,” sumala sa gisulti ni Daniel dinhi nga iya gyud kining buhaton, “diha sa tunga-tunga sa ulahing katunga sa kapitoan ka semana,” ni Daniel. Ug dayon, igsoon, unsa man ang iyang pagabuhaton? Maangkon niya ang tanang patigayon sa kalibutan ug ang komersyo, usa ka kasabutan sa kalibutan, tungod kay siya na ang nagkupot sa bahandi sa kalibutan, ang kinatibuk-an niini. Ug nianang panahona, magatungha kining duha ka mga propeta ug pagatawgon kanang usa ka gatus ug kap-atan ug upat ka libo. Dayon unsa man ang mahitabo? Nan ang marka sa mapintas-nga-mananap, diha sa Pinadayag 13, mosugod na, tungod siya man ang nagkupot sa tanang komersyo, patigayon, ug tanan nang butang sa kalibutan. Ug unsa man ang mahitabo dayon? Ang marka sa mapintas-nga-mapintas ipahamtang niya, nga, “Walay tawo ang makapamalit o makapamaligya, gawas kadtong adunay marka sa mapintas-nga-mananap.” [Nagapanuktok si Igsoong Branham sa pulpito sa tulo ka higayon—Ed.]

³⁶⁰ Salamat sa Dios, ang Iglesia makatagamtam og dakung kalipay sulod sa tulo ug tunga ka tuig didto sa Kahimayaan, nga dili na kinahanglan moagi nianang kasakitan.

³⁶¹ Karon matikdi, sa katapusang panahon, sa katapusan sa mga kapanahonan sa iglesia karon, gitawag siya . . . Siya ug ang iyang mga anak gitawag nga anticristo, tungod ang si kinsa man

nga batok kang Cristo maoy anti-Cristo. Ug ang bisan unsa nga batok sa Pulong batok kang Cristo, tungod kay si Cristo mao ang Pulong. Karon usa siya ka anticristo.

³⁶² Dayon, sa Pinadayag 12:7-9, sa dihang si Satanas gitambog na, ang magsusumbong. Puede ninyong isulat kana, tungod kay gusto kong basahon ninyo kini. Wala na kita og oras karon; halos, baynte o kinse minutos na lang para mag-alas diyes, kita n'yo. Apan diha sa Pinadayag 12:7-9, “si Satanas,” ang espiritu, “ang yawa,” nga atua didto karon, “ang magsusumbong sa atong mga kaigsoonan.” Sige.

³⁶³ Ang Iglesia pag-gisakgaw na, ug si Satanas igatambog usab. Sa dihang gisakgaw na ang Iglesia, si Satanas mokanaug, dayon magpakalawas siya sa iyang kaugalingon diha sa anticristo ug pagatawgon siyang “ang mapintas-nga-mananap.” Dayon, sa Pinadayag 13, ipahigayon na niya ang mga pagmarka. Kita n'yo?

³⁶⁴ “Sa dihang Siya nga nagapugong,” lamang karon, ang Cristianismo nagapabilin gihapon sa kalibutan diha sa iyahang kaputli, maoy tungod, “Kaniya nga nagapugong.”

³⁶⁵ Hinumdumi dinhi balik sa Mga Taga-Tesalonica, “Nagalingkod sa templo sa Dios, nagapatawag sa iyang kaugalingon nga Dios, nagapasaylo sa mga sala ibabaw sa yuta.” Ug magapadayon kana, “ug ang kadautan magadugang pa,” ug uban pa. Tungod kay, dili kini mailhan, pa, hangtud moabot ang iyang panahon nga maipadayag na.

³⁶⁶ Ug dayon ang Iglesia pagasakgawon. Ug sa dihang masakgaw na Kini, nan usabon na niya ang iyang kaugalingon gikan sa pagka-anticristo nianang tungora, oh, grabe, “ang iglesia, ang bantugang iglesia ug niana,” karon nahimo na siyang “ang mapintas-nga-mananap.” Uh-huh! Kung maipakita ko lang unta kana sa mga tawo.

³⁶⁷ Karon hinumdumi, ang anticristo ug ang mapintas-nga-mananap sila mao ra nga espiritu. Tan-awa ang maong trinidad. Oo, sir. Tulo kini ka hugna sa mao ra nga gahum sa yawa. Hinumdumi, ang Nicolaita, kita n'yo, kinahanglan kini nga mahimong tawo sa dili pa kini pagakoronahan. Kita n'yo? Karon bantayi kini, ang tulo ka hugna. Ang unang hugna, gitawag siyang anticristo; ang ikaduhang hugna, gitawag siyang mini nga propeta; ang ikatulong hugna, gitawag siyang ang mapintas-nga-mananap.

³⁶⁸ Himatikdi, ang Nicolaita, ang pagtulon-ang anticristo nga nagsugod sa panahon pa ni Pablo, nagabatok sa Pulong sa Dios, mao nga anticristo.

³⁶⁹ Dayon gitawag pud, siya, ang mini nga propeta. Kon diin, sa dihang ang maong pagtulon-an nahimong tawo, siya ang propeta sa maong pagtulon-an nga iya sa herarkiya, sa—sa herarkiya sa iglesiang Katoliko. Ang papa mao ang propeta sa bakak nga pulong, ug kana ang nagpahimo kaniya nga mini nga propeta.

370 Ang ikatulong hugna mao ang mapintas-nga-mananap, usa ka tawong gikoronahan sa katapusang mga adlaw, nga aduna kaniya ang tanang gahum nga aduna kaniadto sa paganong Roma. Tungod kay, ang mananap nga adunay pito-ka-ulo, ang dragon, gitambog gikan sa langit, ug mianhi nga nagpakalawas sulod sa mini nga propeta. Tan-awa kini, aduna siya'y pitong korona, ug gitambog siya ug gihulog ngadto sa yuta ug sa dagat. Sige.

371 Unsa man ang atong ginasulti? Kinsa man kining mangangabayo, nga nagasakay niining kabayo? Nasayod ba mo kung unsa kini? Mao kini ang superman ni Satanas.

372 Duna ko'y giadtoan sa miaging gabii, uban niining duha ka mga igsoong lalaki nga naglingkod niining iglesia karon; si Igsoong Norman, dinha sa luyo, ug, siguro, si Igsoong Fred. Miadto kami aron maminaw niadtong usa ka tawo nga nagtudlo mahitungod sa anticristo. Usa ka inila-kaayo nga tawo, usa sa pinaka-maayo nga aduna ang Assemblies of God, ug ang interpretasyon niya sa anticristo, mao nga, "Aduna sila'y matang sa bitamina nga kuhaon gikan sa, gikan sa usa—usa ka tawo, ug ibalhin kini nga kinabuhi gikan sa usa ka tawo paingon sa usa ka dakong imahen nga mahimong . . . nga mahimo konong lakwon ang usa ka bloke sa siyudad sa usa ra ka lakang. Ug kana'y . . ." Mahunahuna ba ninyo ang usa ka tawo nga puno sa Espiritu Santo, nga mapailalum nianang ilusyon nga sama niana, o nag-angkon nga ingon niana?

373 Sa dihang, ania ang Biblia, nga nagaingon kung kinsa ang anticristo. Dili kini usa ka . . . Usa kini ka tawo. Matikdi, kining mangangabayo walay lain kondili ang superman ni Satanas, ang yawa nga nagpakalawas. Usa siya ka edukadong utokan. Karon, nagalaum ako nga abli ang inyong mga igdulongog. Gisulayan sa mga tawo ang usa sa iyang mga anak, dili pa lang dugay, diha sa telebisyon, aron makita kung siya ba mas maalam kay sa tapad niya nga lalaki, nga modagan para sa pagka-Presidente. Kita n'yo? Apan, bisan pa man, maalam gyud siya; ingon niana man pud si Satanas. Gisulayan niya nga ibaligya kini. Nabaligya niya kini ngadto kang Eva. Nabaligya niya kini kanato. Dugay na kitang nangandoy alang sa usa ka superman. Aduna na kanato kini. Sige. Ang tibuok kalibutan nangandoy og usa ka superman. Maangkon nila kini. Paghulat lang usá hangtud nga ang Iglesia pagasakgawon na, ug si Satanas pagahinginlan; nga magpakalawas siya. Husto kana. Gusto nila nga adunay tawong makahimo sa maong trabaho. Pagabuhaton niya kini.

374 Edukado! Kini'y ang usa ka . . . Superman ni Satanas, adunay edukasyon, maalamon, nga ang teolohiya sa iglesya anaa mismo sa kaugalingong niyang mga pulong, sa kaugalingon niyang mga buhat. Ug nagasakay siya sa iyang puti nga denominasyong kabayo, aron pagalimbongan ang mga tawo. Ug pagadaugon niya ang matag relihiyon sa kalibutan,

tungod kay mopaingon man silang tanan ngadto sa usa ka konpederasyon sa—sa . . . sa mga kaiglesiahan, ug ang pangkalibutang konpederasyon sa mga kaiglesiahan. Ug aduna na sila og ilang mga bilding nga natukod, ug ang tanan napahiluna na paingon sa maong kadangtan. Wala na ni usa ka butang ang nahabilin. Ang tanang denominasyon paingon na gyud niini, ang pederasyon sa mga kaiglesiahan. Ug unsa man ang nagapaluyo niini? Ang Roma. Ug ang papa nagasinggit karon, “Kitang tanan usa ra. Maghiusa kita ug maglakaw nga magkauban.”

³⁷⁵ Ug kining mga tawo, bisan gani ang uban kaninyong mga Full Gospel, ginasalikway na, kinahanglan ninyong isalikway ang inyong pang-ebanghelyong pagtulon-an, aron mahimo ang ingon niana nga pagdesisyon. Unsa man ang nabuhat ninyo? Nabutahan na, nianang denominasyong butang, nga inyo nang gisalikway ang Kamatuoran. Ug ang Kamatuoran giplastar mismo sa ilang atubangan, ug ilang—ilang gitalikdan Kini, ug gibiyaan Kini. Ug karon sila “igatugyan ngadto sa buhat sa kasaypanan, aron managpanoo og bakak ug pagahukman tungod niini.” Eksaktong ingon niana gyud kini.

³⁷⁶ Ug kamkamon kini tanan sa anticristo. Ug miingon ang Biblia, nga, “Iyang nalimbongan ang tanan,” usa ka a, duha ka l [“all” kung sa iningles—Mhbd.], “ang tanan nga anaa ibabaw sa yuta, kinsang mga ngalan wala mahisulat ilalum niadtong mga Selyo sukad pa sa pagkatukod sa kalibutan.” [Ginapalampak ni Igsoong Branham ang iyang kamot sa makausa—Ed.] Hum! Karon, kung gisulti sa Biblia nga nalimbongan niya, nalimbongan gyud niya.

³⁷⁷ Moingon sila, “Bueno, miyembro man ako . . .” Tan-awa. Oo. Eksakto gyud kana. Kini ang mao ra gihapon nga institusyon sa mga bigaon. Kini ang mao ra gihapon nga sistema nga nagpasugod niini sa sinugdanan, nga mao ang anticristo, hangtud karon.

³⁷⁸ Siguradong duna gyud ko’y madungog tungod niini, apan kana’y . . . Kini ang Kamatuoran. Ginapaabot ko kini. Amen.

³⁷⁹ Karon, matikdi, siya’y mangdaug. Ug halos anaa na kini sa iyang kamot karon, samtang usa pa siya ka anticristo, sa dili pa siya mahimong mapintas-nga-mananap. Paghisgotan na ang bahin sa mabangis nga silot? Hulata n’yo lang. [Nagapanuktok si Igsoong Branham diha sa pulpito sa upat ka higayon—Ed.] Bantayi kung unsa ang pagaagian nila nga mga nahabilin dinhi sa yuta nga makasinati gayud niini. Uh-huh. “Magkaaduna og mga paghilak, ug pagdangyunguy, ug pagkagut sa mga ngipon. Tungod kay ang dragon, ang Roma, nagbuga og tubig gikan sa iyang baba, aron sa pagpakig-away batok sa binhi sa babaye, nga nahabilin sa yuta human nga ang Pangasaw-onon gipili na ug gisakgaw. Ug ang dragon magapakig-away

batok sa mga nahabilin, nga dili gustong magpamiyembro, ug ginapanggukod sila.”

³⁸⁰ Ug ang matuod nga Iglesia magaagi niana kung mahimo; apan, nakita n’yo, human na silang napailalum sa niining Dugo, pinaagi sa grasya ni Cristo, ug dili na makasinati pa og unsa man nga Kasakitan. Dili na sila moagi og panahon sa Kasakitan. Ang sunod nga butang alang sa Iglesia mao ang Pagsakgaw. Amen, ug amen! Dalaygon ang Dios. Oh, gusto ko kaayo kini!

³⁸¹ Tugoting sultihan ko kamo. Ginaingon nato kung unsa ka grabe nga pagpanaug ang iyang pagabuhaton, ug magapanaug gayud siya. Gihimo na niya kini. Sigurado na kini, kana lang; siguradohon gyud niya kini, pinaagi og salapi, mahugaw’ng pagpanapi. Eksakto gyud kana. Mas labaw pa silang nahigugma sa salapi kay sa Dios. Ang tanan na lang nga ilang ginahunahuna sa karon maoy, “Unsa kaha ka daghang salapi aduna siya?” Unsa kini?

³⁸² Kabalo mo, gisulti na kini, sa makadaghang higayon, “Hatagi ang iglesya og salapi, ug bug-os niyang pagausabon ang kalibutan. Hatagi ang iglesia og salapi, ug magpadala siya’g mga ebanghelista sa tanang bahin sa kalibutan. Ug unsa man ang buhaton niya? Iyang buntogon ang kalibutan alang kang Cristo.”

³⁸³ Sultihan ta ka og usa ka butang, makaluluoy kong, buta nga higala. Ang kalibutan dili mabuntog pinaagi og salapi, kondili pinaagi sa Dugo ni Jesus Cristo. Hatagi ang Dios og maisugong mga kalalaken-an, nga magabarug nianang Pulong, mabuhi man o mamatay; sila kanang magapangdaug. Uh-huh. Aduna lamang og usa nga makapangbuntog, kadtong mga ngalan nila nahisulat na sa Libro sa Kinabuhi sa Cordero sukad pa sa pagkatukod sa kalibutan. Sila lamang ang makadungog Niini. Ang salapi walay kahilambigitan niini; ipahilayo lang sila niini padulong sa ilang denominasyonhong mga tradisyon.

³⁸⁴ Tan-awon nato. Oo, aduna siya’y kahawud-sa-salabutang pang-edukasyon, mamahimo siyang ingon niana. Maalamon kaayo siya. Grabe, grabe, grabe! Ug ang tanan sa iyang mga anak nga nakapalibot sa iya maalamon kaayo, Ph.D., LL.D., doble pa ang pagka L.D., Q.S.D., A.B.C.D.E.F. hangtud na sa Z. Aduna sila niini tanan, mga maalamon gayud. Ngano man? Misunod ra man sila kung unsa nga matang si Satanas. Ang unsa man nga maliputong kaalam nga batok sa Biblia iya ni Satanas.

³⁸⁵ Eksaktong ingon niana ang paglimbong niya kang Eva. Miingon si Eva, “Oh, nahisulat na, ang Dios miingon kanamo nga dili gyud namo buhaton kana.”

³⁸⁶ Miingon siya, “Apan, hulat usá. Siguradong dili kana buhatan sa Dios. Pero pagaablihan ko ang imong mga mata ug mahatagan ka’g kaalam.” Nadawat gyud niya kadto.

³⁸⁷ Dugay na nato siyang gusto. Nadawat nato kini, usab, sa niining nasud. Matikdi, pagabuntogon niya ang tibuok nga

relihiyosong kalibutan. Mangbuntog siya, magahimo og usa ka kasabutan uban sa mga kaliwat ni Daniel. Ania na, pareho ang Gentil ug ang mga kaliwat ni Daniel, ang mga Judio alang sa katapusang semana. Ug ania kita karon, gi-drawing pa gani kini diha sa mga pisara. Ug makita ninyo kini, sa hingpit, nga ania na kini. Salamat sa Dios. Anaa na siya. Kanang sistemang organisasyon nga iyaha sa yawa. Ug wala na ta'y pugong-pugong pa bahin niana, bisan pa man. Kita n'yo? Eksakto kaayo. Gamut kana nga iya sa yawa. Kini ang. . .

³⁸⁸ Karon, dili nga ang mga tawo, dili nga ang mga tawo dinha. Mga tawo man sila sa Dios, daghan kanila. Apan, mahibal-an ninyo kung unsa, pagmakaabot na kita dinhi, hangtud nga mahisgotan na nato ang bahin niining pagtingog sa mga Trumpeta; ug, sa sunod nga pag-anhi ko, kining mga Trumpeta na nga nagabudyong. Hinumdumi, sa diha nga kining, ang katapusang manulonda. . . Pagmoabot na kanang ikatulong manulonda, "Gumula kamo kaniya, katawohan Ko!" Pagmolupad na kanang Manulonda, mao usab kana ang panahon nga ihatud ang Mensahe dinhi alang sa katapusang Trumpeta, katapusang Mensahe sa manulonda, katapusang Selyo nga naablihan. Ang tanan niini dungan nga mahitabo. Oo, sir. Ang tanan niini magapadayon ug mopaingon ngadto sa Eternidad.

³⁸⁹ Karon unsa man? Sa mao rang higayon nga ang kining tawo nagapangdaug. . . Pahuman na ko. Aduna usab pagabuhaton ang Dios nianang tungora, usab. Dili nato tanan ihatag kang Satanang ang kadungganang dinhi, kita n'yo. Dili na kita maghisgot bahin kaniya, karon. Kita n'yo? Samtang nagakahitabo kining grabe nga butang, ang kining dakung sistema nga nagahatud niining mga organisasyon, ngadto sa usa ka panaghiusa, aron mahugpong nila ang ilang mga kaugalingon ug mobarug batok sa komunismo, ug wala nasayod nga gipatungha diay sa Dios ang komunismo aron buntogon sila. Oo.

³⁹⁰ Unsa—unsa—unsa ma'y hinungdan nga mitungha ang komunismo sa Russia? Tungod sa pagka-dautan sa Romanong iglesia ug uban pa. Gikamkam nila ang tanang salapi nga aduna sa Russia, ug gipagutman ang mga tawo hangtud mangamatay, ug wala sila'y nahatag og bisan unsa man lang, kondili, nagkinabuhi hinoon nga sama lang sa uban pa sa kalibutan.

³⁹¹ Didto ako sa Mexico, dili pa lang dugay, ug nakita ko didto ang makaluluoy'ng gagmay'ng mga bata. Basta Katoliko nga nasud dili gyud masuportahan-ang-kaugalingon niini. Wala man lang ni usa. Pangutan-a ko kung aduna ba. Ipakita ninyo kanako kung asa man kini. Basta nasud nga kontrolado sa Katoliko dili gyud makasuporta sa kaugalingon niini. France, Italy, ug tanan sila, Mexico, bisan asa mo moadto, dili sila makasuporta-sa-ilang-kaugalingon. Ngano man? Ginakuha sa

simbahan ang tanan nga anaa kanila. Mao kana ang hinungdan kon nganong gipalagput kini pagawas sa Russia. Timan-i kung unsa ang mga nangahitabo.

³⁹² Nasayud ako niini, mismo. Atua ako didto. Ug maghunahuna ka nga adunay bulawanong jubileo, may madungog kang mga kampana nga ginabagting. Ug ania ang usa ka kabus nga babaye, paluhod, nga nagalakaw diha sa dalan. Ug usa ka amahan nga kugos ang usa ka bata; ug duha o tulo kanila, nagahilak. Nagahimo ang maong babaye og pagpenitensya ngadto sa kang kinsang patay'ng babaye didto. Aduna ang iyang. . . Nagdahum nga makaadto siya sa Langit, tungod niana. Oh, makaluluoy gayud!

³⁹³ Dayon nakita ko, sa pagtindog ko didto, ania nagaabot. . . Ang ilang ekonomiya dili gyud balanse! Ginakamkam og ayo sa simbahan ang tanan nga aduna sila. Ania, ang gamay nga si Pancho, siguro—siguro ang Pancho kung sa ato pa'y Frank. Nagaadto siya didto, ug usa siya ka mason, ug ang bayad kaniya—ang bayad kaniya baynte pesos ra sa usa ka semana. Apan gikinahanglan ang tibuok baynte pesos, aron mapalitan niya ang iyang kaugalingon og usa ka pares nga sapatos. Ingon niana ang ilang ekonomiya. Apan karon, dinhi, unsa na lang siya kung—kung siya, ingon nga usa ra ka mason ug usa ra ka tigpatung og tisa, ug ang bayad kaniya baynte pesos sa usa ka semana, pananglitan lamang. Wala ko kabalo kung pila gyud ang madawat niya, apan ingnon na lang nato nga ingon niana ang pagkabalanse sa ilang ekonomiya. Matikdi, karon, kung baynte pesos ra gyud sa usa ka semana ang madawat niya.

³⁹⁴ Ania usab si Chico, kita n'yo, nga nagkahulogan og “makaluluoy'ng tawo,” ug nagatrabaho siya didto sa suweldo nga singko pesos ra kada semana. Ug aduna siya og napulo ka mga anak nga pakaonon, unya adunay usa ka tawo nga manuktok sa iyang pultahan, [Nagapanuktok si Igsoong Branham diha sa pulpito sa makadaghang higayon—Ed.] aron kolektahon kadtong mga singko pesos, o ang kwatro niini, bisan pa man, aron ibayad sa sebong kandila nga igasindi didto sa usa ka milyong-dolyar, bulawang halaran alang sa iyang mga sala. Tan-awa ra. Ingon niana ang pagkabalanse sa ilang ekonomiya. Ingon niana ang maong mga nasud.

³⁹⁵ Ang maong butang maoy nagakamkam sa tanan niini. Ang tanan-tanan ginakamkam sa iglesia. Anaa kini tanan sa iyang kamot. Kana lang. Ug siya, uban sa salapi sa mga Judio, tungod nianang kasabutan, sumala sa giingon sa Biblia, makamkam gyud nila ang tanan-tanan.

³⁹⁶ Ug dayon mahimo na siyang usa ka mapintas-nga-mananap. Dili na niya tumanon ang iyang gikasabutan, ug mangilog na siya. Pagalutuson niya ang tanang nahabilin nga binhi sa nianang babaye, nga sama niana. Ug mangbuga siya og tubig

gikan sa iyang baba; magapakiggubat. Ug magkaaduna og mga paghilak, pagdanguynguy, ug pagkagut sa mga ngipon.

³⁹⁷ Ug ang Pangasaw-onon ginakasal na, didto sa Kahimayaan, kita n'yo, sa parehong higayon. Ayaw sipyata kini, higala. Dios tabangi ako! Ako—gusto kong mahiadto didto. Dili ko igsapayan kung unsa man ang mahimong bugti niini. Ako—gusto kong mahiadto gyud didto.

³⁹⁸ Karon, himatikdi, sa mao rang higayon nga nagakahitabo kini, sa dili pa kini mahitabo, diay, sa ibabaw sa yuta, nagsaad ang Dios. . . Samtang anaa ang tanan niining mga kalibog sa mga denominasyon, naglantugiyay sa ilang mga diperensya mahitungod sa ilang kredo, nagsaad ang Dios nga ipadala Niya kanato ang usa ka matuod nga propeta sa matuod nga Pulong, nga may dalang Mensahe; aron ipasig-uli kita ngadto sa orihinal nga Pulong sa Dios, ug “sa Pagtoo sa mga amahan,” aron ipakanaug ang Gahum sa Espiritu Santo sa taliwala sa mga katawohan, uban ang gahum nga magatuboy sa iglesia paibabaw niining mga butang ug magpasulod kaniya, sa mao rang higayon. Oo. Ang mao ra nga Pulong nga gipamatud-an, mahitungod kang Jesus Cristo, nga Siya mao sa gihapon kagahapon, karon, ug hangtud sa kahangturan! “Ania karon, Ako magauban kaninyo sa kanunay, hangtud sa pagkagun-ob. Ug ang mga buhat nga Akong ginabuhat inyo usab pagabuhaton. Ako magauban mismo kaninyo. Sa diriyut na lang nga panahon, ug dili na sila makakita Kanako,” tungod nga iorganisa man nila ang ilang kaugalingon ug manggisimang. “Apan makita ninyo Ako, kay Ako magauban man kaninyo. Ako magauban bisan sa sulod kaninyo, hangtud sa pagkagun-ob.” Sa dihang, miingon Siya nga ang iyang kaligutgut igabubo bisan pagkahuman sa pagkagun-ob. Tan-awa ra. Oh Dios!

³⁹⁹ Kinsa man kanang nagasakay sa puting-kabayo? Dili man kamo buta. Makita na ninyo kung kinsa kini. Ang anticristo kini, ug kana ang malimbungon nga espiritu nga ania karon ug nakasulod na nga wala namatikdan. Ginahimong. . . Ug, dayon, kita n'yo, ginabalik-balik lang kini sa Dios. Ginapakita niya kini ingon nga usa ka tawo nga nagasakay sa puting kabayo, ug dala ang iyang pana ug walay udyong. Siya usa ra ka tigpakaaron-ingnon. Wala siya og gahum. Moingon, “Ang gahum diay sa iglesia!” Asa na man? Unsa ma'y ilang gibuhat? Moingon sila, “Kami ang orihinal nga iglesia.” Ang orihinal nga iglesia naghingilin og mga yawa, nag-ayo og mga masakiton, ug nagbanhaw og mga patay, nakakita og mga panan-awon, ug tanang uban pa. Asa na man kini karon? Kita n'yo? Usa ra ka pagpakaaron-ingnon, pana nga walay udyong. Huh! Husto kana.

⁴⁰⁰ Apan, nakita n'yo, pagmoabot si Cristo, usa ka Espada ang mogula gikan sa Iyang baba, sama sa pagpangidlap sa kilat. Magagula kini ug pagalamoyon ang Iyang mga kaaway, ug

itambog ang yawa. Pagaputlon niini ang tanang uban pa nga mga butang. Ug moanhi Siya, nga ang Iyang bisti gikatuslob sa dugo, ug diha sa Iyang dapidapi dunay nakasulat, “Ang Pulong sa Dios.” Amen. Ania Siya nga nagaabot, uban sa Iyang kasundalohan, nagaabot gikan sa Langit.

⁴⁰¹ Kanang mangangabayo nga nagasakay sa puting-kabayo dugay nang ania ibabaw sa yuta. Mobalhin siya gikan sa pagka-anticristo. Ginabuhat niya kana, ug nahimo siyang usa ka mini nga propeta. Kita n’yo, nagsugod siya una, nga usa ka anticristo, ang espiritu; dayon nahimo siyang usa ka mini nga propeta; dayon, sa kaulahian, sa dihang ang yawa gihinginlan, nagpakalawas dayon siya ingon nga yawa. Tulo ka hugna! Ang una, usa siya ka yawa, sa sinugdanan, espiritu sa yawa; dayon nahimo siyang usa ka mini nga propeta, magtutudlo sa mini nga doktrina; pagkasunod, nagaabot siya ingon nga yawa na mismo, nga nagpakatawo. Kita n’yo? Anaa na siya.

⁴⁰² Ug sa mao rang higayon nga gihulog kini nga yawa gikan sa Langit ug nagpakalawas diha sa usa ka tawo, ang Espiritu Santo mikayab ug mikanaug nga nagpakatawo sa mga tawo. Amen. Oh, grabe! Pagkamaanindot nga panahon!

Ugmang gabii, kon kabubut-on sa Dios, sa Ikaduhang Selyo na.

⁴⁰³ Gihigugma n’yo ba Siya? [Nagaingon ang kongregasyon, “Amen.” Si Igsoong Branham mihunong kadali—Ed.] Karon, nagatoo ba mo Niini? [“Amen.”]

⁴⁰⁴ Gipahunong ko lang ang teyp. Karon makapaminaw na ako gikan Niana. Kabalo mo niana, kita n’yo. Apan gapaabot gyud ko.

⁴⁰⁵ Aduna ko’y isulti kaninyo, igsoon. Nahibaloan ko na karon, usa ka higayon sa akong kinabuhi, kon nganong kanunay akong gipasidan-an nianang Espiritu batok niining, mga organisasyon. Mapasalamaton ako sa Ginoong Dios sa pagpakita Niya kanako sa niining mga butang. Nasayod ako nga Kini mao ang Kamatuoran. Ania na kini, napadayag na mismo dinha. Ania siya nga nagapangabayo sa tanang kapanahonan, ug miabot dinhi mismo ug nagpakita sa iyang kaugalingon mismo sa karon, sa ingon ka hingpit gayud. Kita n’yo, mao kana siya. Karon wala kita nalimbongan niana. Karon naablihan na ang inyong mga mata. Pahilayo mo gikan nianang matang sa butang. Ug higugmaa ang Ginoo sa tibuok ninyong kasingkasing, ug magpabilin mismo kaniya. Oo, sir. Panggawas mo gikan sa Babilonia!

⁴⁰⁶ [Blangkong bahin sa teyp—Ed.] Ang tulo ka mga butang: gipamatud-an sa Pulong, gipakita pinaagi og retrato, gipadayag pinaagi sa mga buhat sa Espiritu, nagapanghimatuud nga Kini mao ang Pulong.

407 Itugot nga ang Pulong magapaibabaw niining mga panyo, Ginoo. Ayoha ang mga masakiton. Ayoha ang tanang masakiton nga tawo nga ania karon, Ginoo, ug kadtong mga atua sa halayo nga nagasulat ug nagapanawag.

408 Amahan, sa niining oras, adunay usa pa ka pag-ayo ang kinahanglan pagabuhaton mismo karon, ug magpadayon kami sa panerbisyo sa pagpang-ayo. Pero, Ginoo, ang kalag kini, nga maoy gusto namong mapahiluna diha sa husto, Ginoo. Ug kining mga butanga kinahanglan gayud nga mahitabo.

409 Nagaampo kami, Dios, nga dalhon Mo kining mga pulong karon nga gisulti, ug himoa kini nga tinuod ngadto sa mga tawo. Itugot nga makita nila Kini, Ginoo. Ingon nga wala na'y oras, ug, Kabalo Ka, Amahan, busa nagaampo ako nga igo na ang mga gisulti nga ang Balaang Espiritu na ang magakuha Niini ug magapadayag Niini ngadto sa mga kasingkasing. Kadtong nanagsulat sa mga Kasulatan, hinaut nga tun-an nila Kini. Kadtong nanagrekord og mga teyp o—o—o nagapaminaw sa mga teyp, hinaut nga tun-an nila Kini; dili nga isukip ang ilang kaugalingong interpretasyon Niini, kondili nga tun-an lang ang Pulong. Itugot kini, Amahan. Sa Ngalan ni Jesus, ginatugyan ko kining tanan Kanimog, ug alang sa Imong himaya. Amen.

410 [Nagapanagna ang usa ka igsoon nga lalaki. Nangalipay ang kongregasyon—Ed.] Amen. Oh, salamat Kanimog! [Padayon nga nangalipay ang kongregasyon.] Oh!

411 Kung aduna ma'y tawo dinhi nga wala pa makaila Kaniya, ang pagpangayo og pagpasaylo, buhata kini karon. Paminawa kanang diretsahan, bug-at nga pagpangbadlong. Kung nagpaabot ka nga mapaduol, sulod sa daghang mga adlaw human niini, buhata kini karon.

412 Unsa na lang kung mao na kadto ang pag-abli nianang Selyo? Unsa na lang kung mao kadto ang Manulonda nga gipadala didto, nga nagpabuto (halos) kanako paitaas gikan sa yuta, sa miaging adlaw, sa pagtindog ko didto, sa dihang ang tulo ka mga saksi nagatindog sa duol ra. Kana ang gisulti ko kaninyo sa wala pa ako moadto, "Adunay mahitabo nga pagbuto nga halos magaalisa kanako paitaas." Ug gikuha ako paitaas sa pito ka Manulonda, ug paingon sa sidlakan. Mora og giuyog ako sa maong butang gikan sa yuta.

413 Husto ba kana, Igsoong Norman, Igsoong Fred Sothmann, sila kadtong nagatindog duol kanako sa dihang nahitabo kadto, didto sa Tucson? Ug ang—ang. . . Paglingkod ko, nga gitangtang ang mga tunok sa akong mga sinina, nga eksakto sa kung unsa ang gisulti sa panan-awon. Ug habagatan kadto sa. . . paingon sa Tucson. Kung tinuod kana, ipataas ang inyong kamot, Igsoong Fred, Igsoong Norman. Mao kana sila. Tindog kamo, aron makita sa mga tawo nga didto gayud kamo, ingon nga saksi. Wala pa

gyud ako makadungog og bisan unsa man nga sama niadto, sa tibuok kong kinabuhi.

⁴¹⁴ Ug, sa gilayon, wala na sila mangayam, sa tibuok nahabilin nga adlaw. Gihangyo ko si Fred, sa pagkasunod buntag. Wala siya masayod niini. Gihangyo ko siya nga moadto og mangayam, nga nagsige'g ingon nga, "Pangayam na. Pangayam na."

⁴¹⁵ Apan miingon ang Dios, nagsulti Siya kanako didto, "Dili siya mangayam. Mopaingon ka sa Sidlakan, karon na mismo."

⁴¹⁶ Ug kadtong pito ka mga Manulonda! Ang unang pagbusikad, miabli kini. Oo. Unsa kaha kung mao na kadto? Ania na kita sa katapusan nga takna. Kita n'yo?

I love . . .

Simbahon nato Siya.

I love Him

Because He first loved me

Manindog kita.

And purchased my salvation

On Calvary's tree.

⁴¹⁷ Hinloan nato ang atong mga kasingkasing karon, mga igsoon, samtang iduko nato ang atong mga ulo. Mga igsoon kong babaye, nakigsulti ako nga bug-at ra nganha kaninyo, apan gibuhat ko kini nga may diosnong gugma. Gibuhat ko kini tungod kay gihigugma ko kamo; mahitungod sa pagpataas sa buhok, ug pagsinina ug paglihok sa husto. Gibuhat ko kini tungod sa diosnong gugma. Himoon nato nga putli ang atong mga konsensya karon samtang—samtang anaa pa ang Clorox sa Dios.

⁴¹⁸ Sa buntag, mahimong ulahi na kaayo. Mahimong mohawa na Siya. Kining nagakahitabo nga mga butang nga sama niini, mga kaigsoonan, tingali mao na kini ang katapusan sa pagpatigpataliwala Niyang buluhaton. Nahunahunaan n'yo ba kana? Bueno, wala ako masayod kung mao na kini. Wala ako nagaingon nga mao na gyud kini. Apan unsa kaha kung mao na kini? Unsa kaha kung mao na kini? Mag-unsa na lang? Wala na'y katubsanan; wala na, pagmoabot kana nga panahon. Nanghinaut ko nga dili pa, apan adunay posibilidad nga mao na kini.

I love Him, I . . .

Hinloi kami, Ginoo. [Blangko nga bahin sa teyp—Ed.]

. . . love Him

Because He first loved me

And purchased my salvation

On Calvary's tree.

⁴¹⁹ Bulahan ang Ngalan sa Ginoo! Himaya sa Dios! Ganahan ko nianang malomo nga pagbati. Dili ba ninyo mabati Kana?

Ang Balaang Espiritu kini, nga, nagapalibot kaninyo, nga nagapalibot kauban Niini. Oh, pagkamaanindot! Oh, kung hunahunaon lang gyud ang Iyang kalooy!

I love Him, I love Him
Because He first loved me
And purchased my salvation
On Calvary's tree.

⁴²⁰ Ayaw kalimti Kini, higala. Ayaw kalimti Kini. Dad-a Kini sa inyong pagpauli. Pagpabilin Niini. Kupti Kini diha sa inyong unlan. Ayaw ninyo Kini kalimti. Pagpabilin gayud Niini. Ang Dios magapanalangin kaninyo karon.

Si Igsoong Neville, ang inyong pastor.



ANG UNANG SELYO CEB63-0318
(The First Seal)

SERYE SA KAPADAYAGAN SA PITO KA MGA SELYO

Kining Mensahe ni Igsoong William Marrion Branham, unang giwali sa Ingles niadtong Lunes sa gabii, Marso 18, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org